

NATIONAL ASSEMBLY OF SEYCHELLES

Wednesday 13th April, 2022

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou staff ki pe asiste nou. E nou piblik ki pe swiv nou. Nou a re pran travay pou ozordi. Nou a pran de *item* avan nou a return lo Mosyon. Premye Onorab Sylvanne Lemiel, mon ava envit ou pou prezant Rapor Komite silvouple.

HON SYLVANNE LEMIEL

Mersi Mr Speaker. Bonzour Mr Speaker. Bonzour tou mon bann Koleg Manm Onorab e tou dimoun a lekout. Mr Speaker, i avek plezir ki mon prezant Rapor Komite Lasirans Gouvernman, koni koman (COGA) pou peryod Novanm 2020 ziska Desanm 2021.

Mr Speaker, Lartik 104 dan Konstitisyon Republik Sesel, i donn Lasanble Nasyonal pouvwar pou kree

bann komite. Sa i enn bann mekanizm ki a dispozisyon Lasanble Nasyonal dan son zefor pou asir bonn gouvernans, latransparans e ki Legzekitiv i rann kont.

Komite pou bann Lasirans Gouvernman, (GOGA), Setyenm Lasanble Nasyonal, ti ganny etabli swivan en Mosyon aprouve par Lasanble Nasyonal le 7 Novanm, 2020. I en komite restren e son manda i ekspire a lafen sak term. Son fonksyon i osi ganny gouvernen par *Standing Orders* ki fer provizyon pou bann regilasyon e prosedir bann komite.

COGA son rol prensipal se pour sirvey e swiv bann promes ki Legzekitiv i fer dan Lasanble. Sa i anliny avek bann rol enportan ki Lasanble i annan manda pou fer, sa rol sirveyans lo Legzekitiv.

Sa komite i konpri 7 Manm ki pe ganny nonmen par zot parti respektif avek sipor 3 manm staff Sekretarya. Sa komite i dirize par mwan menm, Onorab Sylvanne Lemiel, koman *Chairman*. Onorab Norbert Loizeau koman *Vis-Chairman*. Onorab Rocky Uranie, Onorab Wallace Cosgrow, Onorab Richard Labrosse, Onorab Phillip Monthy e Onorab Deshiela

Bastienne koman Manm Ordiner.

Fodore note ki ti annan sanzman dan Manm Komite an 2021. Onorab Richard Labrosse ti ganny apwente koman en Manm Komite pou ranplas Onorab Clive Roucou apre ki i ti'n termin son manda koman Manm dan Lasanble.

Manmzel Telma Julie i asiste sa komite koman sekreter e i ganny asiste par Manmzel Linda Gerry ek Nasha Camille respektivman koman asistan sekreter.

Lo sa *note* mon osi oule remersi Manmzel Gerda Panagary pou son travay e komitman pandan ki i ti asiste nou komite koman asistan sekreter ant peryod 2020 a 2021.

Pandan sa peryod Novanm 2020 ziska Desanm 2021, Legzekitiv in vin reponn kestyon, fer *statement*, fer bann promes, donn zot langazman e lasirans lo diferan keksoz oubyen ka spesifik dan nou Lasanble.

Pou asire ki sa bann promes e langazman i ganny akonplir ziska lafen, komite i fer swivi atraver anvoy bann let pou demann bann *update*, al vizit bann proze, swa ki ankor dan faz lenplimantasyon oubyen ki'n konplete.

Apre sa bann vizit, komite i fer bann rekomandasyon neseser pou bann Minister, Departman ek Lazans konsernen. Malgre sityasyon pandemik COVID-19 pandan lannen 2021, sa komite in fer tou sa ki ti dan son kapasite pou konplet tou sa ki ti lo son programm.

An vi ki pei in bezwen adapte avek en novo normal, bokou keksoz in bezwen ganny fer elektronikman e bann restriksyon mouvman dimoun ek regroupman a sa letan ti fer ki nou ti bezwen travay dan lakour.

Sa komite osi in ganny afekte par bann lefe advers sa pandemik, par lefe ki nou'n souvandwa bezwen anvoye oubyen kennel bann vizit ki ti'n programmen. Me selman Komite in kapab konvok son bann *meeting* ki ti'n ganny prevwar.

Premye *meeting* sa Komite ti ganny fer le 11 Novanm 2020 e nou'n fer 7 lezot *meeting*. Nou'n konsider e adopte 134 lasirans, an plis 73 lezot lasirans depi sizyem Lasanble. 11 ladan in ganny onore. Pou larestan i bann proze ki ankor ankour e komite pou kontinyen swiv zot lenplimantasyon.

Nou'n anvoy 28 korespondans e resevwar

selman 15 repons. Nou'n osi fer vizit pou enspekte bann proze ki ankor dan faz devlopman oubyen ki'n konplete. Sa ti enplik vizit kot servis litilite piblik, (PUC) kot nou ti al vizit danm La Gogue. Minister Lagrikiltir, Sanzman Klima ek Lanvironnman, kot nou ti fer en seri vizit diferan proze, laba.

Nou'n al get sant karantenn bann zannimo, sant resers pou lagrikiltir Anse Boileau, sant zenetik Grand Anse Mahe, renovasyon ki'n ganny fer lo Bazar Victoria.

Nou'n osi al kot Lazans Zone Endistriyel kot nou ti vizit zone 20 Providence pou vwar bann proze devlopman lenfrastriktir.

Kot Lotorite Port, komite ti kapab ganny en apersi lo bann defi e konstrent ki zot pe rankontre e nou ti osi vizit lespas kot zot pe anvizaze fer lagrandisman Por.

Komite ti osi deplase pou al fer l'investigasyon lo plizyer proze ki pe ganny enplimante lo Praslin ek La Digue. Pandan sa bann vizit, bann Manm Komite in enterakte avek bann O Zofisyen Legzekitif. E atraver bann rekomandasyon in propoz bann solisyon pou akseler lenplimantasyon bann proze.

Mr Speaker, baze lo nou enterakson avek plizyer

Minister, Departman e Lazans, COGA in fer sa bann rekomandasyon swivan;

1) Ki tou Minister, Departman ek Lazans Gouvernman i donn kont randi COGA lo bann lasirans ek langazman ki zot vin fer devan Lasanble Nasyonal dan en dele letan ki zot in ganny enformen.

2) Bann Minister, Departman ek Lazans i bezwen respekte okenn *meeting* ki COGA i programmen a tou moman, sof si zot kapab prodwi en rezon valab ki a ganny determinen par sa komite.

4) Komite pou pran en lapros proaktiv pou angaz li avek Legzekitiv an swivan de pros bann langazman ki zot fer e pou asire ki sa bann langazman i ganny enplimante dan en dele letan ki akzeptab.

4) Ki Legzekitiv i planifye son bann proze byen davans avan soumet en propozisyon Bidze, pou redwi bann risk ki kapab afekte lenplimantasyon bann proze. E,

5) Ki Sekretarya Lasanble Nasyonal i konsider bann loportinite formasyon pou Komite an zeneral, pou maksimiz performans COGA vizavi son manda.

Mr Speaker, i enperativ ki tou Manm komite i ganny loportinite pou agrandi zot

konesans dan divers domenn teknik atraver lentervansyon en eksper dan sa sekter ki sorti dan en lot ziridiksyon, e ki annan preski menm pratik ki nou isi Sesel.

I enportan pou note ki bann Manm in komans diskite lo nivo komite pou etabli korperasyon avek bann lorganizasyon ki relevan, pou ogmant kapasite e partaz konesans komite. I donk an faver okenn loportinite a lavenir pou travay avek lezot komite sanblab sorti dan lezot pei.

Pou promot travay COGA, komite i anvoy lenvitasyon pou bann Lazans Medya ler ki i per fer son bann aksyon mandate. Media i ganny envite pou kouver tou bann vizit COGA ek son bann enteraksyon avek son bann diferan brans Gouvernman, pou gard manm piblik azour avek travay sa komite.

Travay Komite i osi ganny pibliye o sit *web* Lasanble Nasyonal, lo *Facebook* ek lo *Instagram* pou pli byen promouwar son travay vizavi piblik.

An konklizyon Mr Speaker, malgre bann defi pandemik COVID-19, mon rekonnet e apresye zefor tou Manm pou zwenn osi regilyerman ki posib, pou

diskit bann langazman ki'n ganny fer vizavi Lasanble Nasyonal. E pou swiv dapre lenplimantasyon sa bann langazman dan bann proze Gouvernman.

Komite i rekonesan anver Sekretarya pou sipor ki i donnен e pou reste azour avek volim travay ki annan. Komite Lasirans Gouvernman i remersye ou Lofis, Mr Speaker e tou manm *staff* ki'n fasilit son travay pandan Novanm 2020 ziska Desanm 2021. Komite i osi oule remersye bann Minister, Departman e Lazans ki'n mentenir en Polisi laport ouver e zot volonte pou partaz bann defi ki zot fer fas avek dan lenplimantasyon proze. E osi bann ki'n reponn nou bann korespondan dan en dele letan rezonnab.

Mon oule met ankor lanfaz lo pli bon lantant e fason travay pou lannen 2022. Avek sa Mr Speaker, mon oule prezant ou nou rapor pou peryod Novanm 2020 ziska Desanm 2021. Mersi.

(APPLAUSE)

MR SPEAKER

Mersi Onorab Lemiel. Mon rekonnet ki ou komite i en lenstans enportan pou travay Lasanble dan son rol *oversight*

lo Legzekitiv e mon felisit zot pou zot travay e mon donn mon langazman pou siport ou kot i neseser. Mersi bokou.

Madanm reporter, ou a pran Rapor kot Onorab Lemiel silvouple.

Antretan ki madanm reporter, pe fer sa pti devwar, nou a kapab prosed lo en lot *item*, e sa se nou annan en *First Reading* lo *Order Paper*. E mon ava envit Madanm Deputy Clerk, pou fer *First Reading*.

MADAM DEPUTY CLERK

Mersi Mr Speaker. *This Act may be cited as the Statute Law Revision (Miscellaneous Amendments) Act, 2022.*

MR SPEAKER

Mersi Madanm Deputy Clerk. Nou aprezan reoran travay lo Mosyon. E mon pou envit Onorab Francois Adelaide, pou prezant son Mosyon.

HON FRANCOIS ADELAIDE

Mersi Mr Speaker. Bonzour Mr Speaker, bonzour tou Manm Lasanble Nasyonal. Bonzour *secretariat* Lasanble Nasyonal, tou travayer isi. E tou Seselwa ki a lekout. Mr Speaker, nou Mosyon i lir koumsa: -

Dan en bi pou asir devlopman soutenab ekonomik e sosyal, tout an prezervasyon

nou lanvironnman e anrisir nou pei, Lasanble Nasyonal i aprouve pou etabli en Komite Sektoryel ki pou travay pre avek sa bann departman, e dan sa bann domenn swivan:

Lagrikiltir, Lanvironnman, Lenerzi Renouvlab, Sanzman Klima, Zil ek Lekonomi Ble.

Mr Speaker i bon pou nou fer remarke o komansman, labitud ler nou anmenn Mosyon, nou pe demann Gouvernman pou li petet azir. Me la ozordi safwasi mannyer nou pe fer li. Nou koman en Lasanble, nou pe fer en Komite, ki nou pou sey asiste Gouvernman, pou zot kapab delivre o maksimonm.

Parey mon dir Mosyon pe demann ki Lasanble, i etablir en Komisyen Sektoryel, ki pou annan sa *oversight* tre spesifik, lo tou bann fonksyonnman sak sa bann sekter, pou ki tou langazman e lasirans ki zot donn Lasanble Nasyonal e lepep Seselwa, i enn ki realizab, e anmenn prosperite pou nou pei, e nou pep.

Tro bokou letan nou'n trouv bann senp, senp keksoz ki ti merit ganny adrese dan bann fason direk ki ti a kapab, fasilit bann pli gro keksoz. Me akoz ki latansyon i ganny neglize, e souvandfwa i zis parey enn pti krose, i vin en gro lapse menm devlop dan en

kanser, ki apre i difisil pour deal avek.

Akoz ki nou bezwen en tel komite, e akoz ki nou'n swazir sa bann departman e sekter parey? Larepons i senp, dan en lemonn kot i annan bokou lensertitud, tel ki lager ant bann Nasyon, bann lepidemi ouswa bann pandemik, zis parey *COVID-19*, kot sak pei i bezwen met li pare pou nenport evantyalite ki kapab arive.

Nou devret fer sir, ki menm nou kapab mank bann keksoz materyel, me sekirite alimanter pa devret zanmen ganny konpromi dan nou pei. Nou konnen ki sanzman klima osi, i kapab enterfer avek nou sekter alimanter. Legzanp deranz bann teren lagrikiltir, deranz fason larivyer i koule, andomaz nou lans, nou koray eksetera.

Me nou bezwen get keksoz dan en fason kolabore, pour ki nou ganny maksimonm. San bezwen fer bokou destriksyon, tout an mazinen bann lenpak lo nou lanvironnman. Nou pou bezwen konsidere, rod alternativ pou evit gaspiyaz, promot soustabilite, tout an mazinen, ki nou tou nou viv dan sa lemonn ki toulezour nou tande pe ganny afekte par bann diferan aktivite imen.

Menm bann aktivite naturel ki nou napa kontrol lo la. Eski nou koman en Lasanble Nasyonal, atraver nou rol ki nou'n, ki nou annan koman reprezantan lepep pa kapab vreman entervenir, pou rod meyer solisyon pou sey retard bann lenpak negativ ki kapab menas nou legzistans koman nou pti pei?

Ki mannyer nou pou fer sa? Pou fer sir nou annan manze abordab, nou bezwen fer lagrikiltir, lapes, kot nou kapab eksplwat nou later e nou lanmer, pou nou soutenir nou pep. Lagrikiltir i ganny fer lo zil. Ler nou pe konsantre lo devlopman lagrikiltir, nou bezwen mazin nou lanvironnman. Koup tro bokou vezetasyon, i ede dan destriksyon lanvironnman.

E i kapab ede dan anmenn sanzman klima. Me si nou konsyan, lo sa ki nou pe fer byensir nou pou fer keksoz pli byen e dan en lot fason.

Dan plas servi zis elektriske ki sorti kot stasyon *PUC*, nou kapab mazinen pou servi fotovoltaik. Menm anmenn delo kot bann laferm par teknik *gravitational flow*. Kot delo pa sorti dan okenn laponp, me prensip servi ladal parey lontan. Bann fason e resours naturel, ki nou, nou

konsider koman bann lenerzi renouvlab. Konsiltasyon i lakle, pou nou trouv sa lekilib si nou anvi sirviv pli lontan.

E pli prepare pour sirmont bokou bann evantyalite. Sesel nou annan bokou bann bon nide, ki si nou ekoute e aprann met an pratik. Nou pou kapab fer bokou bann bon keksoz.

Menm sirmont bokou difikilte, e amelyor lavi bokou nou bann sitwayen. Nou koman bann Manm ki pe reprezent Lepep, nou'n ganny ekspose avek bokou bann konesans, ki parfwa ni bann teknisyen swa bann enzenyer, bann teknokrat bann PS, Minis e menm Prezidan pa pou zanmen okouran.

Me si nou permet sa bann lesanz, menm koz lo la dan Lasanble. E si nou ganny byen ekoute, analize, e met tou sa bann keksoz an pratik. I a kapab anmenn bokou solisyon tanzib, ki pour sirman ed nou progrese koman en Nasyon.

Nide dan Sesel i annan par kantite later. *Free consultancy* i preski partou dan nou pei. Bokou larzan ki mwan, mon apel i ganny gaspiye. Me si nou ti vreman senser, keksoz ti a kapab ganny fer en lot fason.

E sa bann tel larzan ti a ganny mete dan bann domenn pli spesifik. Mr Speaker pran

par egzanp nou proze Anse La Mouche. Si zot a rapel dan sizyem Lasanble, mon ti enn parmi sa MNA, ki ti anmenn en propozisyon avek Gouvernman sa letan, pour rekonsider devlopman proze Anse La Mouche.

Kot ti annan zis bann *rock armoring*, ki ti pe al ganny fer. E sa lans, ti pou al ganny detrir. Avek sipor mon kominote, nou ti kapab met sa an konteks. E nou ti fer li vin en realite. Ozordi Mr Speaker, laprev i la. Si nou vin Baie Lazare Anse La Mouche, kot sa lans ki ti ganny degrade, in osi re-konble.

Me ozordi, mon santi ki nou bann lavwa i a pe ganny neglize. In annan en lot faz, proze, pou kontinyen avek sa amelyorasyon. Me pep Baie Lazare, pa'n ganny ekoute. E si zot ti vreman ekout nou, nou ti kapab fer keksoz, otreman.

Me mon met sa a latansyon, Minis avek son Minister Lanvironnman, pour retourn lo lans Anse La Mouche e regeete ki mannyer nou, nou kapab kontribye pou ede aranz nou lans.

Akoz destriksyon nou lans, byensir nou pa anvi. E nou pa anvi keksoz i vin tro - (mannyer nou apel sa ?) Nou anvi sa bann devlopman, i vin

pa zis kosmetik. Me nou le li i vin pli naturel.

So mon ti a kontan ki demars i ganny fer, pou nou kapab rekonsider bann devlopman lo sa landrwa. Nou tou koman bann sitwayen ki sanse pou viv lo sa later, nou bezwen mazinen, kit sa later pli meyer, ler nou ale isi ba.

E nou osi, nou bezwen fer sir, nou kapab ganny mazinen koman sa enn ki'n fer sa diferans. Pli move, ler ou ganny swazir ankor, par ou kominote pou reprezant zot. Sa i en privilege, e ou pou bezwen a tou pri travay for e travay dir. E ede amelyor zot lavi.

E vwala sa *spirit*, ki sa komite i bezwen adopte ler i pe fer son travay. Sa komite i pou fer, sir ki enn parmi son fason travay se konsilte, ekoute, analize, konsilte e kontinyen konsilte.

La deor, mon konvenki ki nide e fason fer i plis ki nou konnen. E nou devret fer sir, ki napa nide ki ganny pran koman enferyer. Me nou a kapab touzour pe anbelir bann propozisyon pou byennet e progresyon nou Nasyon.

Mr Speaker, parey Mosyon in dir. Nou pe travay avek Sekter Lagrikiltir, avek bann lezot. Me mwan mon konsernen avek Sekter Lagrikiltir, dan en

bi promot souverennte e sekirite alimanter.

Premyerman Mr Speaker, nou okouran ki nou Gouvernman, in siny en Deklarasyon *Maputo*. Ki dir ki 10 poursan Bidze pei, i devret ganny mete dan lagrikiltir. Eski sa pe vreman arive ozordi? E sa komite ki pou, bezwen fer sir ki si nou'n komit nou lekor dan bann desizyon aletrance, nou pou bezwen kapab fer li. E donn lagrikiltir son vre plas, dan Sesel, an zeneral.

Mr Speaker, Lekol Lagrikiltir, ti en komitman ki Gouvernman ti donn nou ki i pe al ganny konstrir, sa lannen atraver en Fon *Kuwait*. Me ou konnen ler nou pe marse, nou pe demann kestyon. An menm tan ki ou annan sa lentere, a ker dan ou leker. Ou souvandfwa apros bann dimoun, pou demande. Eski progre pe arive? Mr Speaker dezole, mon'n tann dir ki Lekol Lagrikiltir, sa lannen pa pe al ganny fer.

E pli move, ler mon get nou bann *staff*, nou bann *teachers*, nou bann *support staff* laba, i paret ki zot pa pe ganny gete, parey zot devret ganny gete. Sa i mon ki pe dir, akoz sa ki mwan mon'n retrouve. Me selman petet realite i kapab diferan. Be ler

mon'n koz avek zot, mon'n trouve poudir i annan en pe neglizans, lo kote Lekol Lagrikiltir.

E si nou koman en Gouvernman, nou anvi ki lagrikiltir i pran son plas dan pei, mon krwar i demars nou Lasanble, pou nou pran tou keksoz serye. E annan sa *oversight* direk, kot bann keksoz pa ava ganny neglize.

Mr Speaker, i enportan ler nou pe dir, nou pou protez bann fermye. Nou pou met divan anba zot lavwal, nou pou met plis larzan dan zot pos, ki nou vreman senser avek nou parol ki nou pe dir. An pasan kot bann fermye Mr Speaker, mon'n ganny sans koz ek zot, e toulezour mon koz ek zot.

I mank, en sinerzi serye. Oli bann dimoun ki annan bann bon nide, lo kree bann korperativ? Ozordi lotel pe dir, i pa kapab aste legim avek fermye, zis akoz i pa kapab ganny son stok ki i bezwen.

Mr Speaker, ankor si nou fer bann swivi lo la, i annan bann bon fason fer ki nou bezwen fer, e ki fermye i ava benefisy. Atraver korperativ, kot nou ava kapab klasifye bann legim, bann pli o grad avek bann grad pli ba.

Si lotel i anvi aste pli o grad, lotel i ava aste. Si Seselwa

i annan son mwayen pou aste pli o grad. Li osi ava aste, e si li i pe santi poudir son mwayen finansyel, pa permet li, i ava *still* annan en swa pou li fer e i ganny legim abordab, dan son fanmir.

Mr Speaker, en lot keksoz ankor akoz, ki sa komite i bezwen egziste. Sirtou pou vey lo sa Sekter Lagrikiltir. Nou tande ki nou ganny bann *Grant*. Me zisteman dan Bidze, Minis ti dir poudir nou pe sipoze pe al ganny en - nou sipoze pe al fer en labatwar. E ziske prezan nou pa ankor ganny later, kot nou pou *build*, sa labatwar. E si nou tarde, byensir sa *Grant* nou pou perdi.

E lekel ki pou soufer, se byensir pep Seselwa. An pli gran parti bann fermye, ki pe *invest* dan zot laferm. Zot pe sonny zot zannimo, pou zot kapab ganny en meyer lavi. E sa komite i pou enportan, pou nou osi sivre sa bann zafer mank legren, mankman bann bezwen de baz pou bann fermye.

Tel ki langre e bann lezot keksoz. Akoz si nou oule fermye prodwir, nou bezwen fer sir nou donn li en kontinyite, dan son prodiksyon. Nou, nou vin Lasanble Nasyonal, nou ganny peye tou le mwan, be mazinen si fermye li, i mank en keksoz dan son sirkit, pou li kapab li

osi rekolte, e definitivman, i pou anmenn problem Mr Speaker.

Delo pou fermye, nou ti dir napa delo e la mon pe koz spesifikman Val D'En D'Or. Be bann fermye zot in leve zot in debrouye, avek bann led bann lezot lorganizasyon. E la mon profite, pou remersi *WaterShed Committee*.

Ki si ou mont Val D'En D'Or ou pou vwar bokou delo ki zot in mete. E bann basen ki zot in fer, e nou ankor pe ganny en pti pe problem avek sistem irigasyon. Ki zis delo i dan basen. E pas de pti soley, nou fermye i konplent, napa delo.

So nou pou bezwen koz ek Gouvernman, nou pou bezwen met zefor dan bann landrwa koumsa, pour ki fermye, menm si zot ti dir napa delo. Fermye in bouze, zot in a travay, zot in rod delo. Be zis pou fer bann pti koneksyon pou ariv koz zot.

I pa sipoze en problem. E nou dan, pou nou ankouraze, sa Komite pou bezwen fer sir ki sa bann keksoz koumsa i pa ganny arive. I souvan bann senp, senp keksoz. Me ki nou pa gard latansyon avek. Nou pa kit latansyon lo la e sa ganny devlope koman bann problem e souvandfwa, *MNA* i ganny *call* pou li vin get problem delo. Ki ler ou vini delo i annan, me zis pou fer desann kot fermye.

Mr Speaker, nou koz fermye, prodwir? Napa problem be nou bann *extension officer* avek nou bann lezot travayer. Eski napa bann plan, ki mannyer nou kapab kordinen. Kot fermye, tou fermye pa plant menm keksoz. E ki i ava annan en programm, e nou ava annan en, nou ava annan *assorted* prodwi lo marse.

E kot tou prodwi i ava ganny vann, san bezwen kas *market*. San bezwen fer keksoz desann pli ba, kot konsonmater i a benefisy e menm fermye osi i ava benefisy.

Mr Speaker, ankor Polisi lo later lagrikiltir. De pwa en mezir. En pwa de mezir. Mr Speaker nou trouve kot i annan later lagrikiltir kot dimoun pe rode. Nou dir napa, bann ki annan later, pa pe onor zot langazman.

E bann ki ganny later i deside fer lotel, swa restoran lo later lagrikiltir. Apre dir loder fimonyen, i fatig li, i fatig son kliyan. Me tousala, nou pou bezwen gete. Konbyen bann dimoun avek bann gro pos, ki zot in zis pran later lagrikiltir, dormi lo la. Espere kan valer i monte, pou zot vann pli ser?

Mr Speaker, si nou serye dan lagrikiltir tou sa bann keksoz nou bezwen get li o

profon pour ki fermye ki anvi, benefisye avek en bout later lagrikiltir i gannyen. E i kapab, i kapab plante pour son fanmir epanouir.

Mr Speaker mon konsantre enn pti git lo lagrikiltir akoz ler mon ti mazin pou fer, sa Komite Lagrikiltir ti enn ki ti dan mon lespri. Me apre ler nou *Caucus* in anbelir, nou'n trouve ki annan bann lezot landrwa ki nou kapab kontribye.

Dan bann fason pozitiv, ki tre senp pou nou kapab ed sa Gouvernman bouz devan e pep benefisye. Mr Speaker ler, dan nou Mosyon nou pe koz osi lo lanvironnman. I annan en keksoz ki, souvandfwa ler ou marse lo semen ou tande. E i gou ler ou koz ek dimoun. Mr Speaker etranze i dir mwan. Be Sesel, dimoun si i pa bezwen travay, sa i son problem.

Me Sesel ou kapab viv dan en lanvironnman ki ou pou leve, ou pou manze, ou pou bwar, ou pou dormi, ou pa bezwen enkyet. Sesel napa okenn bebet feros ki pou anpes ou dormi kot ou anvi, napa okenn lafreser, tanperatir i ideal.

Manze ou ale dan lanatir, legitim an abondans. Menm pou ou bennyen, larivyer tro bokou. E en dimoun Sesel i kapab, viv

ere. Akoz? Akoz nou lanvironnman, i enn ki sen e dan lemonn preski napa ankor parey nou lanvironnman isi.

Me solman malgre ki i annan tou sa bann fasilité, e bann possibilite. Nou bezwen tou kou *mindful of* nou lanvironnman. Mon pa fek vini, bokou avan mwan in ganny fer. Mwan mon la, mon osi mon pe sey ede. E menm ler mon kit sa lemonn, sa ki pou vini ankor pou fer.

E sa komite i annan en devwar vreman enportan. Nou lanvironnman parey ti dir, i parey diber lo nou dipen. So si nou pa fer atansyon, dimoun pou arete vin get nou, pou vin vizit nou. E vi ki nou depan lo touris, nou pou ganny afekte bokou.

Mr Speaker lo sa komite osi, i annan nou zafer zil, pour bokou letan sa zafer zil in reste en topik kontansyon, parmi lapopilasyon.

Nou tande ki serten zil, menm si i apele pou Sesel, Seselwa pa kapab met lipye, menm vizit. Akoz i koumsa? Eski i vre? Sa komite pou bezwen fer sir, i donn Lepep Seselwa leksplikasyon. Nou'n tande poudir zil, i *appartient* pour serten dimoun. Nou'n menm tande ki petet, mon pa pou nonm non - be nou dir

poudir Mr Savy, i annan zil. Mr Savy i annan zil.

Me Mr Speaker, i normal pou Seselwa annan sa bann panse koumsa. Ou konnen ou. Ler ou, ler ou defann en keksoz par ler, petet ou pe anpes en dimoun vin lo en keksoz. Pa kestyon ou pe anpes li vini, me ou pe dir li poudir i annan bann prosedir.

I vini poudir ou be non la ou pe fer dominer, sa pou ou, ou krwar sa pou ou. E ler i ale i poudir son dalon mon pa'n antre laba akoz sa pou sa boug. E sa i kontinyen dan lespri. E finalman i vin en fe akonplir, zil pou sa boug.

Nou, nou pou bezwen fer sir ki nou dir Seselwa, zil pou Seselwa. E nou ava gete ki bann devlopman ki annan lo la. E si Seselwa e pei pe benefisye. I bann keksoz koumsa ki nou pou bezwen fer. E byensir, ouver lavi lo zil pou bann dimoun kapab al vizite. Akoz sa osi i pou ed zot, mantalman pou zot kapab viv an bonn sante.

Mr Speaker, ler nou pe koz lo zil avek lagrikiltir; Sanmdi mon pe koze avek de msye. I pe dir mwan nou pe al, mon dir li nou pe al fer sa komite. I dir mwan be, "eski zot pe al fer lagrikiltir menm lo zil?" Mon dir li be wi pa ti en bon, pa ti, lide

pa mal. Akoz i pou benefisye bokou Seselwa.

I dir mwan "be, mazin pli devan. Ozordi nou pe ganny problem, la avek sa lager laba *Ukraine*, manze zannimo i pe vin en pe problem. Akoz zot pa rod en zil, ki nou kapab plant mai lo la. A en gran scale, napa bokou fermye ki plant mai lo gran scale isi.

Me sa i ava ed nou dan fer nou bann manze zannimo. E sa i a fer ki manze zannimo i ava reste, son pri i ava reste abordab. E sa i ava benefisye nou. Akoz lavyann i ava reste abordab. E an plis i pa pou nou afekte bann lezot prodikter isi Mahé."

So i bann keksoz ki nou ki nou sa komite, ki pe travay lo sa bann keksoz nou pou bezwen met devan Gouvernman, e rod nide lo la. Mr Speaker, nou pe koz sa komite osi, nou pou bezwen get en pe dan bann zafer lenerzi renouvlab.

E ler nou dir lenerzi renouvlab, nou pe mazin soley. Mr Speaker, ki kantite letan Sesel i annan soley. E si nou ti vreman annan en Gouvernman ki *believe* ki Seselwa i devret ganny sa ki meyer. Eski pa lontan nou ti devret tap dan sa posibilite, e *provide* bann dimoun avek bann sistenm fotovoltaik, pour ki zot ava

kapab amelyor zot lavi, pey mwens elektrisite?

Be akoz ki nou pa'n fer sa. Rezon i senp Mr Speaker. Akoz sa Gouvernman ti kontan dimoun depan lo zot. E ler zot ti pe vann *fuel*, se zot ki ti benefisy. Me si nou ti'n azir koman, en Gouvernman responsab, byensir nou ti pou trouve ki nou pep in erit en paradi. E i merit bann keksoz pou benefisy li e fer son lavi fasil.

Mr Speaker nou koz lo Lekonomi Ble. Eski bokou Seselwa i konpran ki savedir Lekonomi Ble? Ouswa Lekonomi Ble zis pou bann, gran, gran zwer bann *top* akter ki konnen ki mannyer pou li akse sa *fund*, pour li kapab kontinyen vin pli ris?

Mr Speaker sa bann zafer *Grant* dan Lekonomi Ble, i enportan ou sa komite osi al gete. Nou ava gete ki mannyer i ganny depanse. E si vreman i annan *accountability* dan tou sa ki zot pe fer.

Mr Speaker, sanzman klima osi i enn ki sa komite, pou bezwen port latansyon lo la si nou anvi en pei kot nou pep, i viv dan tout sekirite. So vwala enn de bann keksoz ki mwan koman loter Mosyon, mon pe mazinen pou sa komite angaz li ladan, pour ki nou a kapab fer

nou lavi nou pep, en pe pli meyer.

An konklizyon Mr Speaker, parey mon'n dir nou'n ganny sa privilez pou reprezent nou dimoun ki'n konfye nou pou defann zot zentere. Nou responsabilite, i obliz nou fer sir ki Gouvernman pa pran e donn okenn leskiz pou anpes devlopman en pep. Nou pou vwar koman en Lezislater. I permet nou, pou nou met bann Lalwa e bann regleman ki kapab koriz, e amelyor tou bann fason fer keksoz, pou anmenn plis prosperite pou nou Nasyon.

Alors parey mon'n dir, sa Mosyon, i enn ki ideal dan demars pou fer pep Seselwa e Gouvernman, a tou pri - pans (Mr Speaker eskiz mwan) Alors sa Mosyon i enn ki ideal, dan demars pou fer pep Seselwa, Gouvernman e tou parti prenon dan pei, vin pli ofe avek devlopman, komitman, soustenabilite e dan tou sa ki nou anvizaz-e fer, pour sirman anmenn progre e prosperite pou nou Nasyon.

Parey nou kontan dir, si nou kontan Sesel, nou bezwen fer sir ki nou fer tou bann bon keksoz. Pou epanouisman nou pep, pour ki Seselwa i ava touzour reste sa Nasyon beni o monn.

Mr Speaker avek sa, mon le prezant Lasanble avek sa Mosyon, pou zot segonde e konsidere si zot pou aksepte pou nou kapab kree sa komite. Mersi Mr Speaker.

(APPLAUSE)

MR SPEAKER

Mersi Onorab. Mon ava aprezan apel segonnman pou sa Mosyon. Onorab William.

HON WAVEN WILLIAM

Bonjour Mr Speaker. Bonjour tou dimoun ki a lekout. Mr Speaker, mwan annan gran plezir pou segonn sa Mosyon. E an segonnman sa Mosyon, mon ti a kontan dir de pti mo an sipor, avek ou permision.

MR SPEAKER

Wi Onorab William. Ou kapab adrese.

HON WAVEN WILLIAM

Mersi Mr Speaker. Mr Speaker i en gran plezir ozordi pou mwan segonn sa Mosyon, en an menm tan mon konnen poudir i en gran plezir pou ou osi akoz nou'n ganny sans annan serten dyalog letan mon'n sorti *Meeting Zeneral IPU* resaman.

Kot dan diskisyon letan mon ti pe lev sa size mon vwar poudir ou osi ou *in sync* avek

kwa ki pe passe enternasyonalman e kwa ki nou Parlman i devret pe fer an sipor pou montre nou osi koman reprezantan lepep nou pe bouz dan ban direksyon pou fer sir ki enn nou planet i ganny proteze.

Mr Speaker Mosyon parey in ganny lir se dan en bi pou air devlopman soutenab ekonomik e sosyal, tout an prezervan nou lanvironnman e anrisir nou pei, Lasanble Nasional i aprouve pou etablir en Komite Sektoryal ki pou travay pli pre avek sa bann departman swivan; Lagrikiltir, Lanvironnman, Lenerzi, Sanzman Klima, Zil e Lekonomi Ble.

Mr Speaker i vreman enteresan lafason ki Onorab prezantater Mosyon dan son *wording* ki in servi pou li prezant sa Mosyon. E bann mo kle ladan enn se pou asir devlopman soutenab e kominate sosyal ki koman en pti pei Sesel kot nou napa bokou resours nou bezwen angaze nou tou pou fer sir ki sa i ganny preserve.

Mr Speaker i pe koz lo prezervasyon nou lanvironnman, Mr Speaker la ankor koman en pti leta zil ki pe depan lo touris, an gran parti nou lanvironnman i reste touzour sa bout dyanman ki

nou bezwen toulstan pe prezerve.

Mr Speaker letan i pe koz lo anrisir nou pei, la nou pe koz lo rezilyans Mr Speaker, rezilyans akoz enn ler ou napa rezilyans Mr Speaker i pa donn ou lespas pou ou kapab bouze e fer sa ki ou anvi.

Mr Speaker letan mon pe get bann plizyer sekter ki sa Komite pou okipe, Lagrikiltir, Lanvironnman, Lenerzi, Sanzman Klima, Zil e Lekonomi Ble Mr Speaker, i fer mwan mazinen ki petet koman en pti Parlman ki anvi fer bokou, sa petet i ava vin koman en *wakeup call* Mr Speaker, pou nou petet revwar lafason ki Parlman zot bann komite ozordi i ete.

Nou anvi fer bokou be solman nou annan pe resours imen e petet nou bezwen bouz petet e bann Komite Sektoral en pti pe pli ouver. Mr Speaker mon anvi di ki sa kote kontan ti'n devret ganny formen. In annan en lesey dan sizenm Lasamble me ki nou pa ti kapab fer li, Mosyon ti'n ariv devan, me i pa'n monte, me mon kontan ozordi parey mon dir ozordi ki enn sa Mosyon in monte.

Mr Speaker Sesel koman sa pti pei pe fer fas avek bann divers kalite fenomenn lo en

lespas global ki tous lo nou koman en pti pei osi. Mr Speaker i annan sa nesesite koman reprezantan Lepep pou nou *être* angaze.

Mr Speaker mon konnen poudir bokou bann Manm parlman ki al partisip dan bann misyon aletranze, la mon pe koz lo nivo SADC, PAP e CPU menm IPU. Mr Speaker sa size Sanzman Klima size lanvironnman, size Sekirite Alimanter, Lekonomi Ble i bann size ki toulstan pe monte.

E Mr Speaker nou ganny demande koman bann Manm Parlman bann diferan Manm pei po nou zwe nou rol e fer sir ki serten bann target ki ganny aksepte lo nivo global ki vin o nivo nasyonal osi, sak pei i bezwen met son bann target devan ki sa bann target i ganny zwenn.

Me nou konnen poudir pa tou pei ki son lekonomi i permet li kapab zwenn sa bann target dan en fason vit parey Sesel, nou bezwen bann lasistans. Nou bezwen bann lasistans me an menm tan ki nou pe rod sa bann lasistans i neseser osi ki Sesel i montre poudir i osi i pe fer serten keksosz.

E Mr Speaker mon ti a kontan ozordi sezi sa loportinite pou felisit tou bann dimoun, tou bann Seselwa e menm nou

bann zanmi etranze, ki'n vreman angaze pou kapab fer sir ki Sesel i kapab mentenir serten nivo pou li kapab *achieve* sa bann diferan target.

Mr Speaker Sesel o nivo global i ganny rekonnet, i ganny rekonnet koman en akter kle parmi bann Pti Leta Zil ki pe vreman pouse lo size Lanvironnman, Sanzman Klima e Lekonomi Ble.

Mr Speaker la mon ti a kontan partaz serten mon leksperyans kot o nivo *COI*, o nivo *ACPU* e o nivo *IPU* Sesel i toultan proaktiv kot i pe inisyé bann konversasyon, e pran linisyativ pou anmenn dimoun ansanm pou kapab diskit lo sa bann diferan size.

Mr Speaker par egzamp mon konnen poudir Onorab Clifford Andre pe fer sa o nivo *ACPU* e lo kote SADC osi mon konnen poudir nou bann reprezantan Parlmanter zot pe zwe zot rol e o nivo *IPU* osi Sesel i kote avek *Fiji* pou pouss sa bann size.

E mon pou dir ou ki a 3 repriz dan Lasamble Zeneral *IPU* Sesel in reisir avek bann pri leta zil konvenk tou bann Manm pou kapab siport bann size ki annan pou fer, ki annan sa laspe sanzman klima e prezervasyon lanvironnman,

sekreter alimanter pou kapab pran bann rezolisyón.

Mr Speaker me solman ler mon pe regarde la, mon vwar poudir sa komite li menm 1 i pou en Komite ki ler ou pe koz lo travay lo *oversight* i annan en ta travay pou fer. E mwan mon ti ava demande Mr Speaker, mon ti ava demande ki wi sa lannen petet nou pa pou kapab donn li sipor bidzeter.

Me solman prenon kont kantite travay enportan ki sa komite pou bezwen fer ler ou konpar li avek serten bann komite - la mon pa pe dir poudir tou bann komite pa pe travay. Me ler ou pe get langazman, lenportans e priyorite ki sa bann diferan size ki antour sa Mosyon pe demande Mr Speaker, i annan travay la. Travay i la Mr speaker.

E Mr Speaker mon anvi osi dir ki nou pe ganny demande koman Manm Parlman pou nou servi nou pouvwar lezislatif e nou pouvwar bidzeter pou nou kapab diriz e angaz Gouvernman pou li annan bann komitman solid.

Mr Speaker i malere ki nou napa o nivo Parlman en standar lo nivo en *toolkit* pou kapab vreman fer bann *oversight*. E sa en size ki aktyelman *IAC* pe okip li ki fason nou kapab devlop serten

fason fer pou nou kapab *conduct oversight*.

Mr Speaker letan mon regarde Sesel in fer bann komitman, Sesel in fer plizyer bann komitman o nivo enternasyonal letan i ale. E preznan Egzekitiv in fer son bout me preznan se devwar, se devwar Parlman pou kapab swivre e fer sir ki sa bann target in ganny mete. Sa bann target, bann stratezi e bann aksyon e desizyon i annakor pou nou arriv lo sa bann target.

Mr Speaker la ankor sa eleman alokasyon bidzeter osi, Lasanble osi i bezwen vvar eski ozordi Sesel koman en pti pei ki sanpyon lanvironnman e sanzman klima, eski son Bidze i en Bidze ki *climate change friendly?*

Sa bann kestyon ki monte, Mr Speaker mwan mon pou bezwen al donn en rapor an Oktob an *Rwanda* lo ki Parlman pe fer Sesel e an menm tan ki pei pe fer vizavi bann target ki nou'n dir nou pou *achieve*.

Mr Speaker mon reste konfortab pou dir lo kote parlman mon vvar *ex-Speaker Prea* in pran liniyat e ou osi resaman mon'n vvar poudir in annan serten bann keksoz ki ou'n fer koman bann aksyon konkret, ki demontre poudir Parlman Sesel i reste angaze.

E Mr Speaker mon konnen ki ou osi ou annan bann lezot keksoz ki ou anvi pouse pou fer arive, pou montre poudir wi koman Parlman Sesel nou pa zis koze me nou pe pran bann aksyon.

Me o nivo nasyonal Mr Speaker nivo nasyonal ki mon santi poudir sa kordinasyon, sa travay Parlman avek Egzekitiv pou vreman *monitor* e sirvey bann aksyon avek bann desizyon i annan serten febles e sa nou pou bezwen amelyore.

E Mr Speaker ozordi letan pou pe koz tou lo sa bann size nou demande la deor la Seselwa pep Seselwa lo sa bann size ki nou pe diskite, eski vreman sa bann keksoz pou zot pe rezonnen dan zot lespri, pou zot konpran ki fason nou lekonomi i ganny santre o toultour sa bann size ki nou pe koz lo la.

Mr Speaker i pou enportan, i pou enportan ki Lasanble Nasyonal i osi angaze avek bann plizyer akter pou nou kapab fer sa travay ansanm.

Mr Speaker preznan i reste pou vvar parmi tou sa bann sekter ki sa komite pou angaze avek, i pou bezwen annan enn ki nou pou bezwen donn priyrite. I pou bezwen annan enn ki nou donn priyrite akoz sa enn ki nou pou bezwen donn

priyorite i pou afekte lezot Mr Speaker.

Par egzanp si ou pou demann mon, mon pou *side* avek sanzman klima. Mr Speaker akoz ozordi in ganny rekonnet e la i pa zis ganny rekonnet dan en fason dan lezer me par sipor bann resers. Par egzanp ou annan sa Komite *IPCC* ki ozordi pe donn bann rapor regilye Mr Speaker ki demonstre ki sanzman klima pe ganny pli afekte par aktivite zonm. Par aktivite zonm pe ganny enfliyanse plis par aktivite zonm. Lafason ki ozordi dan e bann fason mon pou dir endirek me i direk lafason ki nou pe devlope e fer keksoz, san vreman pran konsyans ki i pou annan sa lenpak.

E parey mon'n dir mon vwar dan bann plan ki'n ganny met devan ki Sesel i annan ban komitman. Mr Speaker mon pa pou koz lontan, akoz mon konnen poudir lezot bann Manm i anvi koze, me parey mon dir pou mwan i en gran loner. Akoz letan mon pou al prosen renyon mon pou kapab dir ki poudir be regarde Sesel in fini met en komite an plas.

Sesel i reste angaze e mon mazinen poudir lezot bann pei osi i ava swivre, me nou koman sa pri pei ou pou bezwen

toultan pe kriy pli for Mr Speaker.

Parfwa mon konnen poudir dan bann *forum* internasyonal i annan serten bann pei pli devlope, zot en pri pe annwiye, me zot annwiye solman zot pa pe met zot dan nou soulye koman sa pti pei, ki bezwen fer fas avek dega ki zot, zot pe fer ki reperkisyon i tonm lo nou.

Mr Speaker avek sa 2 pti mo ankor enn fwa mon poudir ki sa Mosyon i tre enportan ki sa komite i ganny fer. E mwan mon pou la dispozisyon pou ede akoz mon santi poudir mon annan en ta lide pou kontribye e mon anvi ede. Avek sa Mr Speaker mon dir ou mersi e mon demann tou bann Manm pou donn sipor sa Mosyon. Mersi.

MR SPEAKER

Mersi Onorab William. Mon a verifye bann Manm ki'n lev lanmen pou entervenir. Mon annan Onorab Pillay, Lemiel, Aglae, Cosgrow, Loze, Larue, Woodcock, Hoareau e Esparon. Onorab Vidot i antre ladan, wi tre byen. Nou a komanse avek entervansyon bann Manm. Mon ava apel Onorab Loze.

HON JOHAN LOZE

Mersi Mr Speaker. Mr Speaker mon *welcome* Mosyon ki devan nou Lasanble ozordi. Mon *welcome* sa Mosyon akoz la fason ki mon pe get li mwan, se i pa en Mosyon ki pe *call* Lasanble pou *set-up* en Komite ki pou *press Government for action, oversight Government as such* ki pe ganny dir.

Mon get li koman en Mosyon ki pe *call* Lasanble pou mat nou e aktyelman fer nou travay ki reprezantasyon sa pep ki for *once* mon tann pe sorti dan zot labous aktyelman reprezant sa pep ki apel Seselwa.

Finalman nou a ganny nou en leskiz pou aktyelman fer sa louvraz pou lekel ki nou ganny peye pou fer. Parske nou pa fer li nou, nou asiz la anndan nou ekout kanmarad vini, koz lalang. Nou osi nou partisip dan lalang, nou koz lalang e nou ekout lalang.

MR SPEAKER

Onorab! Onorab!

HON JOHAN LOZE

This is what ...!

MR SPEAKER

Onorab be eskiz mwan, mon krwar dan sa ki ou pe dir ou pe fer en lakizasyon zeneral ki bann Manm i konstaman pe koz

lalang. E sa mon krwar pa zistifye, i pa bon pou limaz Lasanble, mon pou envit ou pou reviz ou parol silvouple, mon pa pe ni demann ou *retract* ni naryen, zis kontinyen e evite sa kalite lakizasyon. Mersi. Ou annan mikro.

HON JOHAN LOZE

Mersi Mr Speaker. Mr Speaker mon ava swiv ou gidans. Speaker in ler pou nou koman Lasanble Nasyonal Sesel aktyelman fer sa bann keksoz ki mon tann zot pe dir ki nou pou fer la ozordi bomaten.

Ki reprezant lanasyon Seselwa. Reprezant sa pep ki'n elekte nou e in met nou dan sa Lasanble. Nou pa kapab zis asize trankil ler kanmarad i vini i dir nou koumsa pe al donn logmantasyon ler 2022, nou tou nou asize trankil, nou konnen nou pa vre, nou konnen. E nou pa reprezante sa pep ki'n met nou la, nou pa dir be *hold-on, wait a minute*.

Dan Bidze to dir 2023 nou les *LOTO* asize lager sa lager li tousel, li tousel, *one-man army* li ki pou dir e zot tou zot riye, nou tou nou riye, nou pa'n fer, nou'n *fail* !

E la mon fer en *statement* zeneral Mr Speaker ki enkli mwan tou, nou'n *fail* pou reprezant sa pep ki apel

Seselwa, *I hope, I hope* sa pep Seselwa la i pe vin *forefront* lo nou *agenda* aprezan.

Akoz mwan mon konnen ki esansyelman zot pe lager ek zot prop Gouvernman la, letan Onorab bomaten in dir Gouvernman pa ekoute, Onorab ou Gouvernman ki pa pe ekout ou, pa 43an ki pa pe ekout ou.

Parske i pa 43an ki'n mont dan ou distrik ki'n fouy en lapas dan en *mudflat* e ou konnen ou sa i dan *mudflat*, ou peser osi i konnen, in debout lo televizyon in dir *huh* nou a gete.

Ou konnen ou pou bouse sa, se sa ki'n arive Anse la Mouche se sa ki nou bezwen vini sey dir diplomatikman la ozordi bomaten ki Minis ion monte in fouy lepase dan *mudflat* san konsiltasyon avek bann peser dan ou distrik. Esansyelman in pas en kwiyer dan *custard*.

Kot in pas sa kwiyer la, be pou re bouse sa *custard* pou antre ladan ankor li. Se sa ki'n arive, ou bezwen anmenn en Mosyon, ou bezwen kre en komite akoz ou prop Gouvernman i refize ekout ou ! E mon konpran mon kot ou Gouvernman pe refize ekout ou. Mwan mon pa krwar ki i annan enn zot la ki anvi war en zabitan dan zot distrik pey bis R12, pe

soufer pey 4 bis par zour R12, manman tousel avek detrwa zanfan.

Mon pa krwar mon, mon koman i annan zot la lo sa kote latab ler zot sey fer reprezentasyon kot ASP pou zot zabitan sa madanm kot ASP i dir avek zot koumsa poudir be mwan mon'n ganny anvoye la pou met lord mwan, mon pe fer sa ki mon ganny anvoye pou fer mon konnen i arive avek zot.

Mwan mon pa krwar zot *heartless* mon, mon pa krwar ki zot anvi fer soufer sa pep mwan, selman mon krwar ki zot napa kouraz pou lev zot lanmen pou ouver zot labous e pou fer sa ki byen. Sa ki mon pa krwar zot annan.

Mon pa krwar zot posed ase kouraz pou debout e reprezent sa pep Seselwa ki ozordi zot bezwen vini par laport deryer e anmenn en Mosyon sey fer krwar ki se sa lafason ki sa pep pou ganny reprezante.

MR SPEAKER

Onorab! Ou'n fer ase lakizasyon kont bann Manm *ok?* Mon pe demann ou pou respekte lezot Manm e osi respekte limaz Lasanble. Mersi. Ou a kontinyen Onorab Loze.

HON JOHAN LOZE

Mersi Mr Speaker. Mr Speaker i annan en kiltir pa koze ki pe antre dan nou pei ozordi. E tou Seselwa ki viv Sesel *sadly* pe vwar kot sa kiltir pe anmenn nou, i pe sorti dan lavwa politik i pe komans antre dan bann lezot lenstitisyon.

E nou tou ki Sesel an se moman mon krwar i annan en lour dan nou lekontrer nou pe vwar kote pa koze pa anmenn nou, kote anpes koze pe anmenn nou.

Mon pa pou antre plis ladan mwan, selman nou tou nou vvar bann *video* ki pe sirkile, nou tou nou vvar deriv ki pe arive dan nou sosyete. Me selman Mr Speaker lefe i reste sa pep ki apel Seselwa in soufer e nou, nou'n reste trankil, nou'n reste silansye, nou'n gard silans nou tou.

E zour nou anmenn en Mosyon nou rode poudir 43an pa'n met fotovoltaik sa Gouvernman ki ti la pa ti anvi met fotovoltaik. Romainville fotovoltaik ki lo la, ozordi ou menm ou Onorab ou pe pase dan ou distrik ou pe demande lekel ki pou kapab kalifye pou ganny sa *allotment* ki *PUC* in donnen pou sa soz fotovoltaik.

Proze US sa, i annan en lot pe al fer ankor, be Onorab si ou pa konnen vedir ou annan en gro problem ant ou ek ou

Gouvernman. Be selman proze fotovoltaik in fer li dan sa 43an ki'n pase - en kantite keksoz nou'n fer dan s a43an ki'n pase.

Be i pa sa 43 ki pe defann zot Gouvernman koz avek zot. I pa sa 43an ki pe fors zot anmenn en Mosyon ozordi pou zot aktyelman bezwen fors zot lekor fer reprezantasyon lepep Seselwa pou lekel zot in ganny elekte pou fer.

E sa pa ti devret bezwen en Mosyon sa, ti demann zis kouraz, zis kouraz pou nou defann sa pep protez li. Debout kont bann Polisi ki nou, nou konnen pa bon e pa byen. Nou tou nou ti kapab fer, nou pou le zis en kote fer, nou les siz en kote koze, nou tou nou asize nou *reap the benefits*, la prezan nou bezwen fer la.

Akoz ler problem ti ek *ASP* ti zis en kalite dimoun, nou ti reste trankil, ler problem ti ek *URS* ti zis en kalite dimoun, nou ti reste trankil, ler problem lannen pase ti arriv lo tiket bis ki mwan mon ti pe lager nou reste trankil ti zis en kalite dimoun i pa ti en problem pou nou sa.

Ozordi fuel in monte lo laponp en lot kalite dimoun la, la i en lot *issue* la, la tou sa ki ti reste trankil ler problem bis ti leve i komans koze aprezan. La

douler i pou nou tou la, *this is the issue.*

Mwan mon ti a kontan ki nou tou nou ti ava ase onnet pou ler nou ganny for lenformasyon, ler nou ganny mansonz annou nou tou devlop en leren debout koze, dir non. Annou dir i pa koumsa, i pa la realite zot asiz devan nou zot koz mansonz avek nou, nou tou kou krwaz lanmen nou asize nou gete, nou riye. La prezan nou bezwen Mosyon pou al regle pou al rektifye pou fer.

MR SPEAKER

Ou ankor pe persiste dan *impute improper motives* avek lezot Manm. Mon pe dir ou lareg Lasamble i dir ou pa kapab fer sa. Mon'n koz lo la detrwa fwa dan sa Lasamble e mon kontinyen ensiste lo la silvouple. Mersi. Reviz ou adres silvouple. Mersi.

HON JOHAN LOZE

Mr Speaker. Mwan mon'n asiz la anndan kot mwan ek tou manm lo mon kote in ganny maltrete voler, koronpi, kriminel, en, pa ti pe *impute* la? La ozordi ki *impute*? Ler mwan ek tou manm lo sa kote i ganny trete kriminel, voler, pa *impute*, la ozordi ki *impute*, ler douler i lo nou i apel *impute* en, ler i lo mwan i apel "tou Manm pe fer

zot politik, isi la anndan nou fer politik."

(laughter)

(APPLAUSE)

MR SPEAKER

Onorab! La ou'n fer en lakizasyon direk kont mwan ki mon'n toler lakizasyon lo zot kont lezot sa, mon pa'n fer sa, mon pa'n fer sa e mon pe dir ou, mon pe dir ou dernyen fwa si ou pa reviz ou diskour mon pou aret ou koze, mon pou aret ou koze. Mersi. Ou'n fini koze?

HON JOHAN LOZE

Mr Speaker.

MR SPEAKER

Silvouple mon pe envit ou si oule fer ou diskour byen al lo Mosyon e evit fer sa bann lakizasyon. Mersi.

HON JOHAN LOZE

Mr Speaker, Mon pa pou kontinyen koze si ou pe ensiste ek mwan ki mon bezwen koz mansonz parey tou lezot i koz mansonz.

MR SPEAKER

Mon pa pe ensiste ki ou koz mansonz, arete.

HON JOHAN LOZE

Parske mon pe koz laverite e ou pe dir mon pa koz laverite, mon pe koz laverite mwan Mr Speaker.

MR SPEAKER

Onorab! Onorab!

HON JOHAN LOZE

Mon pe koz laverite ou pe dir mon pa koz laverite, mon pe koz laverite mwan Mr Speaker. Sa ki mon'n dir i vre ou pa oule mon dir. *Ok mersi Mr Speaker.*

MR SPEAKER

Ok mersi. Mon a pran en lot entervenan e fotespere nou kapab koz lo Mosyon. Onorab Esparon.

HON REGINA ESPARON

Mersi Mr Speaker. Bonzour tou dimoun a lekout. Mr Speaker mon annan plezir pou siport sa Mosyon anmennen par Onorab Adelaide pou kreasyon en Komite Sektoryel ki pou travay pre avek bann diferan Departman Sanzman Klima, Sesion Zil, Lagrikiltir, Lanvironnman, Lekonomi Ble e Lenerzi Renouvlab.

Sa Mosyon in vin a en moman apropriye dan sa letan kot lemonn pe met bokou lanfaz lo proteksyon lanvironnman, e kot sak pei pe sansibiliz son pep lo bann lefe negativ ki sanzman

klima i kapab anmennen pou lemonn.

E sirtou bann Pti Leta Zil parey Sesel ki lo lakot e ki ganny afekte avek logmantasyon dan nivo lanmer ki vin an rezulta bann aksyon negativ kont limanite ki kapab destriktif pou bann kous *ozone*, e kre en logmantasyon an tanperatir ki anmenn avek li sa danze kot nivo delo i monte e pran en risk pou bann zil koter; sirtou bann Pti Leta Zil ki vin an danze disparisyon.

Mr Speaker letan nou pe koz lo sekirite alimanter, i pou osi en Komite ki pou get sa laspe lagrikiltir anba sa menm parasol, e osi sa laspe zesyon zil en size ki nou fek pe adrese dan en kestyion devan Lasanble boner sa lannen.

Ki mannyer i pou osi koman en Komite Lasanble ankouraz plis devlopman lagrikiltir lo nou bann zil elwanye e regarde ki mannyer i pou pouse pou demann Gouvernman pou met plis later pou nou bann zenn ki anvi plante.

E Mr Speaker lo kote lenerzi renouvlab ki poi osi tonm anba sa menm parasol, zis detrwa demann pase Lasanble fek debat e aprouv en Mosyon anmennen par Onorab Hoareau kot i ti pe demann

Gouvernman pou met an plas bann Polisi, kot tou novo lakaz i ganny ankouraze pou met pano fotovoltaik pou zer elektrisite.

Mr Speaker e lo sa laspe Lekonomi Ble sa komite i pou osi kapab regarde ki mannyer pei i pli byen itiliz son resours lanmer lo en laspe ekonomi. E i pou byen ki sa komite pa ava pe get zis en size an izolasyon me i pou regard tou bann size ki marye dan kanmarad ki annan pou fer ek lanvironnman e sanzman klima, dan en laspe pli konpreansiv.

I bon note ki ozordi li nivo mondyal, sa laspe sanzman klima i en topik diskisyon dan bokou *forum*. Mwan pase mon menm mon ti ganny sans partisip dan en deba vertyel lo nivo (*CPA*) - *Commonwealth Parliamentary Association*, i osi kapab ede promouvwar sa laspe proteksyon nou lanvironnman e sov nou plannet.

Akoz sanzman klima i en size ki konsern tou dimoun e ki bann madanm osi i kapab kontribye pozitivman dan bann deba lo sa size.

Diskisyon ti deroul otour *gender and climate change* e i ti trouv partisipasyon mwan menm sorti Sesel en lot madanm Parlman sorti Maldives, en pei ki pe ganny

afekte severman par sa lape sanzman klima, kot i ti fer resorti ki mannyer zour an zour bann zil i an danze disparisyon.

E Mer Lavil sorti *Uganda* li i ti fer resorti ki mannyer napa lapli oubyen tro bokou lapli parfwa ki annan pou fer direkteman ek sanzman klima ki mannyer i afekte bann madanm e zanfan;- swa zot ganny lasesres, swa zot ganny *flood*.

En pwen for dan sa diskisyon sete bann madanm pa devret ganny kit deryer dan bann diskisyon otour sanzman klima e lanvironnman e soustenabilite. E ki mannyer nou osi nou devret zwe nou rol dan bann deba e formasyon Polisi vizavi sanzman klima.

E Mr speaker sa Komite i osi kapab sansibiliz lepep lo danze ki bann move aksyon i kapab anmennen pou destriksyon lemonn. E osi sansibiliz nou pep lo ki mannyer pou sanz nou konportman vizavi lanvironnman, atraver bann programm sansibilizasyon ansanm avek Minister Lanvironnman.

E la mon panse ki enn son manda ki manda sa Komite i ava pou travay pre ek Minister Lanvironnman. E parey loter Mosyon in dir pou annan sa

konsiltasyon e sa *oversight* kot zot a kapab *press for action*.

Mr Speaker avek sa 2 pti mo, mon pou donn mon sipor sa Mosyon pou etabli en Komite Sektoryal ki pou travay pres avek bann Departman e dan sa bann domenn swivan; Lagrikiltir, Lanvironnman, Lenerzi Renouvlab, Sanzman Klima, Zil e Lekonomi Ble. Mon remersye ou Mr Speaker.

MR SPEAKER

Mersi Onorab Esparon. Mersi. Mon apel Onorab Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour tou Manm bonzour tou manm piblik ki pe ekout nou. Mr Speaker bomaten mon pe sey konpran sa Mosyon dan lafason ki in ganny prezante e mon pe sey konpran ki vreman lekspektasyon e kwa ki nou oule gannyen avek sa Mosyon.

Mon konfize, mon perdi dan kwa ki nou oule vreman, vreman *achieve* avek sa Mosyon. Mon krwar tou dimoun i ava dakor avek mwan, ozordi ler ki bokou Seselwa pe rod en fason ki mannyer pou fer 2 bouz zwenn e pou dil avek bokou difikilte ki lafanmir pe fer fas avek.

Annefe si nou reste konekte, nou reste nou koz ek bann dimoun, nou koz ek lafanmir, nou pou konstate ki i annan en pake problem ozordi la dan nou sosyete dan bann vwazinaz, dan bann kominote. Bokou pe fer fas avek problem kou lavi, bokou pe fer fas avek problem kou lavi.

Ozordi ou koz avek serten fanmir serten dimoun i dir ou poudir vre Seselwa in trounen pe komans demann pret en latet zonnyon. Seselwa pe demann en lanmok diri, Seselwa pe demann son vwazen pou ed li avek en bouyon. Se sa realite ozordi deor, se sa realite ki Seselwa pe fer fas avek.

Si nou get partou lo medya sosyal, nou koz avek travayer nou pou war ki Seselwa ozordi fas a bann difikilte ki zot pe viv avek mazorite travayer Seselwa pe rod en logmantasyon saler, pou zot kapab fer fas avek sa difikilte finansyel ki zot e zot fanmir pe fer fas avek, kantite problem la deor, kantite problem.

Parfwa nou, mon oule krwar zot lot kote latab e Gouvernman zot pe ferm zot lizye avek sa. Zot pa pe war, zot pa pe enterese.

E kwa ki fer mon dir sa Mr Speaker ozordi LDS dan Lasanble i vin avek en Mosyon

ki pou mwan i ensansib avek tou sa bann realite azordi. Ozordi avan Lasanble i fermen pou al lo *recess* nou ti kapab vin avek en Mosyon ki pli sansib avek la realite ozordi. Nou vin avek en Mosyon pou kre en lot komite.

(Interruption)

MR SPEAKER

Silvouple! Silvouple Manm i ava aret enteronp en Manm ki pe koze.

HON WALLACE COSGROW

Mersi Mr Speaker. Mon apresye ou pe demann zot pou aret disturb mwan, akoz mwan mon pa'n *disturb* personn dan zot koze mon kontinyen dir zot mon pa *disturb* zot mwan en?

MR SPEAKER

Onorab Larue! *Order!*

HON WALLACE COSGROW

Mon pa konnen ki son problem li Onorab Larue mwan.

MR SPEAKER

Onorab Cosgrow kontinyen.

HON WALLACE COSGROW

Mr Speaker nou pe ganny demande pou kre en lot komite ki *a mon avis* en Komite li pe sey

fer travay Legzekitif. Travay ki Legzekitif li menm i devret pe fer. Nou pe ganny demande pou kre en lot komite. Mon pa'n tann pep Seselwa lo sa bann zafer komite, komite, komite.

Kre Komite ankor pou ganny plis larzan? Pa kler dan Mosyon, pa dir dan Mosyon sa Komite pou en Komite ki nou pou travay volonteer or eski en Komite ki pou donn plis larzan Manm Lasanble, komite pour ki Manm Lasanble i al marse lo zil, komite ki Manm Lasanble i al marse partou dan bann laferm partou, deor partou.

Pa kler dan lentrodiksyon Mosyon Mr Speaker. Nou bezwen kler, pep Seselwa deor pe demann nou ki nou delivre, pe demann nou ki nou sansib avek zot bann problem, e nou, nou pe kre komite ankor.

So ennler mon ekout lentrodiksyon ankor mon dir Mr Speaker i pa kler. Dan lentrodiksyon sa ki mon'n kapab tire Mr Speaker se en linaksyon par Gouvernman dizour e fristrasyon dabor MNA li menm fristrasyon avek son Gouvernman en Gouvernman ki pa pe delivre.

Akoz si ou ekout byen bann diferan sekter ki in koz lo la e diferan lentervansyon ki i anvi sa komite i fer i montre ki poudir i napa konfyans dan son

Gouvernman. I napa konfyans dan *delivery* son Gouvernman.

E i anvi pran sa bann zafer ki sa Gouvernman i sipoze pe fer, pran sa bann zafer anmenn anba lezel Lasanble Nasyonal pou zot dir Gouvernman ki mannyer pou fer. Se sa ki'n sorti dan sa Mosyon ozordi, nou pa i war.

Ler ou pe koz pou al travay lo bann zafer fotovoltaik pou al travay lerozyon lakot, pou al travay lo bann zafer lagrikiltir sirtou dan ou distrik Baie Lazare Val D'En d'Or. Be sa i annan Minister ki sipoze pe fer. I annan Minister ki sipoze pe fer, i annan Minis ki sipoze pe travay pou sa.

Akoz ozordi koman en manm Lasanble Nasyonal kot nou devret pe fer serten louvraz *oversight* e fer sir ki sa bann Minis i delivre lo zot manda, sa bann Minister i delivre zot manda nou koman en Lasanble Nasyonal nou anvi-

(Interruption)

MR SPEAKER

Silvouple, man ki anvi adrese lev zot lanmen zot a ganny laparol aret bann komanter *off-mic*. Mersi, Onorab Cosgrow kontinyen.

HON WALLACE COSGROW

Nou anvi antre dan louvraz L'Egzekitiv. Nou Konstitisyon i fer kler separasyon pouwwar L'Egzekitiv, Lezislatif avek Zidisyer. I kler. Nou konnen kwa ki nou louvraz nou. Si demen bomaten L'Egzekitiv pa pe delivre, nou annan bann lenstans pou nou kapab kriy zot *call* zot to *order* dir zot poudir zot pa pe delivre e fer zot delivre.

Pa bezwen kre ankor lezot komite, akfer kre komite? Mwan pou mon Mr Speaker, mon pa war okenn nesesite si sa Gouvernman ti pe delivre lo son bann promes ki i ti donnen avan eleksyon, si i ti pe delivre lo sa bann promes ti pou napa nesesite pou sa kalite Mosyon. Ti pou napa nesesite.

16 mwan apre ki zot in dan Gouvernman zot in *fail*, zot in *fail* konpletman pou delivre. E Onorab in montre bomaten ankor ki son Gouvernman pa performan. Sansan zanmen i ti pou vin dir sa ki in dir ozordi bomaten. E mon pa konnen si in fer li konstaman me solman mwan, e mon krwar bokou Seselwa ki'n ekout sa lentrodiksyon bomaten in tir menn keksoz ladan.

Mr Speaker mon pa krwar i annan gran keksoz pou dir, malgre tou sa ki mon'n dir mon pa krwar i annan gran keksoz

pou dir li sa Mosyon. Nou lo kote sa latab, anefe mwan mon pa pou partisip dan kreasyon en lot komite. Zot si zot anvi partisip dan kreasyon en lot komite partisipe zot annan mazorite dabor, pep Seselwa in donn zot mazorite.

Mon war en pe dimoun pe konplent Lasanble Nasional. Be nou annan 10 nou, nou, pep Seselwa ti donn nou 10 dimoun pou reprezent zot, si zot anvi en keksoz diferan met mazorite lo kote isi e zot a war ki mannyer keksoz i ganny fer diferan.

(APPLAUSE)

HON WALLACE COSGROW

E zot pandan sa 16mwan Onorab Loze in dir taler pandan sa 16mwan zot in a size la, zot in a size zot in konplot ansanm avek zot Gouvernman, zot pa'n reprezent sa bann dimoun ki'n elekte zot, zot pa pe koz pou sa bann dimoun elekte zot, zot ensansib avek bann dezir, bann dimoun ki'n elekte zot, e zot ensansib avek sa bann promes ki zot ti fer avan eleksyon pou Seselwa.

Bann promes met larzan dan pos Seselwa, bann promes sekwe pye, bann promes kot pri lavi ti pou desann, bann promes kot saler ti pou ogmante, retret, larzan retret ti

pou ogmante. Sete sa bann promes, be vin avek bann Mosyon ki zot ti promet!

Pa bezwen vin avek bann Mosyon pou kre plis Komite pou pran plis larzan pou met dan zot pos, pou pran plis larzan pou met dan zot pos e tir larzan dan pos Seselwa.

So Mr Speaker mwan sirtou lo kote sa latab, mon pa pou partisip dan okenn kreasyon komite, selman Komite pou ganny kree li akoz mazorite i laba, pep Seselwa *next time* nou ava bezwen reflesir. Nou a bezwen reflesir avek en group dimoun ki sansib avek zot *issues* e non, pa met en group dimoun laba lot kote ki pa ni *care*, ki arive ek ou ozordi. Mersi Mr Speaker.

MR SPEAKER

Mersi. Mon krwar i neseser ki mon fer en komanter. Lasanble i bezwen tenir en ser ten konportman. Ozordi dan nou sosyete nou pe war tou kalite keksoz. Nou pe war manrmay dan lekol pe fer tou kalite aksyon. Nou pe war dimoun dan legliz pe lager avek per, mon pe dir Lasanble i bezwen donn legzanz.

Bann Manm silvouple zot annan laparol, me lev zot lanmen zot a kapab adrese e nou a kapab fer nou louvraz

annord silvouple. Mersi. Fotespere mon'n ganny byen konpran. Mon a ekout entervansyon Onorab Hoareau.

HON JOHN HOAREAU

Mersi Mr Speaker. Bonzour Mr Speaker. Bonzour tou dimoun a lekout. Mr Speaker i malere sa 2 dimoun ki'n koze dan Lopozisyon i ranpli avek zis negativite;- negativite, ki pa pou anmenn zot lwen parske zot pa pe kontribye pou pouz sa pei al devan, zot pe zis war keksoz dan en loptik negativ, konpletman negative zot in pri dan negativite.

(APPLAUSE)

HON JOHN HOAREAU

Mr Speaker mon oule konmanse poudir pa i ti ava ideal pou annan en komite ki sektoryal ki get tou sekter Gouvernman me i pa posib akoz nou resours imen premyerman, nou resours finansyel e letan osi ki devan nou pou fer lezot travay i pa posib pou nou fer li.

Me ozordi nou'n ganny sans pou nou don li, anmenn en linisyativ devan pou anmenn en komite ki pou get serten sekter gouvernans ki nou krwar poudir i enportan pou nou met serten lizye lo la e anmenn serten *oversight*.

Mr Speaker i annan en nesesite reel pou *monitor* e pou don sipor serten sekter L'Egzekitiv. E zis par travay avek L'Egzekitiv, angaze avek en sinerzi avek L'Egzekitiv ki nou pou kapab ede pou anmenn pouz progre pou sa pei. Fodre pa ki nou oubliye nou form parti sa 3 brans gouvernans Leta.

Alor sa i pou anmenn plis bonn gouvernans i pou anmenn plis la transparans e plis rann kont ki 3pwen kardinal fonksyonnan bon Gouvernman. Mr Speaker formasyon en tel komite i pou ede anmenn bann problem dan bann sekter enportan dan nou lekonomi a laporte lasante nou Lasanble ki *forum* kot nou anmenn bann Mosyon e provok bann konversasyon nasyonal e bipartisan.

Konsiltasyon avek nou dimoun dan nou distrik i pou fer ki letan nou anmenn bann propozisyon devan dan Lasanble nou pou kapab pe anmenn lavwa Lepep devan.

Mr Speaker Lagrikiltir, Lanvironnman, Sanzman Klima E Lenerzi Renouvlab E Lekonomi Ble tousala se bann size ki *interlink*.

E pou plizanpli vin o san tou deba nasyonal e internasyonal lo devlopman

soutenab. Promot lagrikiltir e pou revwar potansyel lagrikiltir dan nou pei avek bi pou pei akonpli sekirite alimanter e lotosifizans dan serten prodwi agrikiltirel i en nesesite. Alor sa komite ite i pou vvar li o sant pou promot sa bann nide, pou promot diskisyon e en deba lo sa bann keksoz.

An menm tan klima Lezislater nou bezwen ofe avek leko sistenm nou bann zil koralyenn e granitik e risk ki devlopman i kapab enpakte lo la.

Mr Speaker i enteresan pou vvar formasyon zouolozik pou revwar en pri pe formasyon zouolozik nou bann zil, i si oule en pe inik pou dan lefe ki Sesel nou larsipel i ganny formen par bann zil sa ki nou apel *oceanic islands* e an menm tan *continental islands*.

Continental islands se bann zil ki ler *Gondwana island* in bouz dan sid, e i annan bann landrwa ki ganny sibmerze e bann tipik in reste debout e sa in form parti nou bann zil granitik.

E bann zil *oceanic islands* se bann landrwa kot i osi annan bann lafors ki'n pouse ki'n fer bann pik dan losean par plas, e lo la bann koray in grosi e fer nou bann zil koralyenn.

Mon pe dir sa akoz, akoz i enportan pou nou konpran sa biodiversite ris ki Sesel i annan nou lespas *la flore*, e nou lespas *fauna* i vreman inik pou vvar ki Sesel nou annan tou sa *spectrum* depi keksoz biodiversite ki pouz dan bann kondisyon oubyen bann later kontinantal granitik e osi bann ki pouz dan bann landrwa koralyenn.

E osi enportan nou bezwen prezerv sa labote ki nou zil e labita bann lespes zwazo demer ki vin reprodwi nou resif koray, nou bann plato zerb soumaren ki annan potansyel koman bann *carbon sink* parey nou apel li.

Ozordi zour nou pe koz lo *blue carbon* e yer swar mon ganny sans ekout nouvel ki en msye Dr Amir i ti pe prezante lo kote travay ki zot pe fer avek *fund (SeyCCAT)* ki vedir *Seychelles Conservation and Climate Adaptation Trust* pou zot kapab senpleman fer letid lo potansyel bann lespes ki pe pouz lo lakot parey *mangrove* e bann plato kot i annan zerb soumaren pou kapab abzorb karbonn.

E Mr Speaker ler nou pe get tousala i fer nou realize ki kantite inik Sesel i inik. Kantite frazil i frazil e ki kantite bezwen ki nou annan pou nou get sa

bann size devlopman lo zil pli pre.

Menm si nou pe get lo nou later Mahe li menm nou bann *peaks* ki nou annan, ler ou pe fer fas avek lagrikiltir, demann lagrikiltir ou pe vvar poudir i osi anmenn bann risk deforestasyon bann risk lerozyon e glisman teren. E tousala i bann keksoz ki koman ban lezislater nou bezwen pran kont ler nou pe mazinen pou anmenn benn Lezislasyon e pou anmenn devlopman dan nou pei.

Mr Speaker en keksoz osi ki sa komite pou bezwen pe met son lipye lo la se get *carriyng capacity* lo nou bann zil.

Akoz lenpak dimoun lo zil i kapab osi detoryor oubyen fer ki nou bann zil i pa kapab soutenir sa la kantite lenpak. Alor sa bann letid koumsa i enportan, pou nou kapab konnen ki fason nou pou zer nou bann zil pli byen e ki kalite devlopman ki nou kapab possibleman mete lo nou bann zil.

Mr Speaker an dizan sa ler nou pe koz lo Lekonomi Ble nou vvar poudir lo nou bann Zil osi i annan bokou potansyel pou *mariculture*, pou lapes artizanal, pou sekter touris, pou leksplorasyon nou bann resif atraver plonze e lezot

letablisman touristik ki kapab anmenn bokou reveni pou nou pei.

Alor tousala an glob i bann sekter ki nou bezwen annan en lizye lo la e annan dimoun ki kapab ale pou vvar pou ganny *first hand exposure* avek sa bann keksoz pou konnen ki fason sa bann devlopman i kapab ganny mentenir dan en fason soutenab.

Akoz ozordi *the buzzword* partou kote enternasyonalman lokalman se devlopman dirab, devlopman ki soutenab.

Mr Speaker sanzman klima i reste en defi enorm pou sirmonte. I pe arive e levidans e ler nou get nou bann lakot partou ki pe perdi nou bann lans disab ki pe perdi lo nou bann lakot e lerozyon. Parey nou pe get Beau Vallon osi a en serten pwen i annan en kantite lerozyon ki pe arive partou lo lakot.

I annan lerozyon osi ki pe arive ek nou bann zil kot nou bann zil pe perdi zot laform e nou pe war osi *zone siklonik* ki pe mont pli onor. Ler mon pe dir sa i fer mon mazin sa siklone *Fontala* ki ti pas lo Farquhar 2016 e i ti pe anmenn bann divan sitan for, 167 kilomet aler ler son premye volim pase, e ler i ti retournen i ti retourn lo

menm tranzitwar avek divan pli fir i ti pran lentansite, e i ti ariv ziske aepre 350kilomet a ler e i ti detri Farquhar antyerman.

Mr Speaker se par sa fason ki nou pou bezwen anmenn sa bann keksoz pli pre avek nou laporte koman en Lasamble, pou gete ki fason nou kapab *mitigate* sa bann lefe sanzman klima e fer fas pli byen avek sa bann fenomenn.

Menas nivo lanmer in ganny dir poudir i kapab afekte nou bann zil koralyenn e i kapab annan potansyel pou fer nou perdi omwen 50zil koralyenn. E tousala se bann keksoz ki enportan koman lezislater pou nou *focus* lo la.

Mr Speaker avek sa mon pou remersye ou e mon krwar mon'n tous en pti p serten bann rezon fondamantal akoz nou bezwen en Komite Sektoryel pou get sa bann size Lagrikiltir, Sanzman Klima, Lekonomi Ble Lanvironnman e Lenerzi Soutenab.

Nou konnen poudir lenerzi soutenab sirtou i vreman en keksoz vreman enportan ki nou bann zil i kapab vin *self-reliant* lo lenerzi akoz zot izolasyon avek Mahe. So i en keksoz ki nou bezwen a tou pri pa zis lo fotovoltaik pilot bann lezot resers dan lenerzi renouvlab e fer sir ki nou bann zil i vin en

legzanp pou lemonn koman bann pti zil ki otosifizans lo kote lenerzi. Mersi.

MR SPEAKER

Mersi Onorab. Bon nou a pran poz la e nou a retournen 11er 5. Mersi.

(BREAK)

MR SPEAKER

Bon, nou a repran deba. Onorab Vidot.

HON AUDREY VIDOT

Mersi Mr Speaker. Bonzour Mr Speaker bonzour tou Manm Onorab e tou Manm piblik ki a lekout.

Mr Speaker depi bomaten ler mon'n ekout loter Mosyon bann pwen ki mon war in fer sorti dan son prezantasyon pou li entrodwir son Mosyon pou form sa komite, loter Mosyon i fer sorti kler ki sa i en diskisyon ki'n ganny fer antre zot dan *Caucus LDS*, pou vin ek sa komite pou anmenn tou sa bann striktir ki bann diferan *size parey* Lagrikiltir, Lanvironnman, Lenerzi Renouvlab, Zil e Lekonomi Ble pou zot form sa koman en komite.

In montre mwan poudir i kler ki zot pa pe vreman zwe sa rol enportan ki zot annan la

endividyelman la dan Lasanble ler zot vin *on the floor*, pou zot kapab koz la fransiz avek zot Gouvernman pou dir poudir zot pa pe travay vreman dan sa peryod letan ki zot sipoze amelyor sa bann sekter, pou vwar kot bann problem i ete. Zot pa pe vin devan pou zot koz lo la avek tou a fransiz ek zot Gouvernman.

E zot pe depan lo nou dan Lopozisyon *United Seychelles* pou fer sa pou zot. E par vin ek sa komite byensir zot pou bezwen Manm lo nou kote latab pou anrisir zot bann kontribisyon pou mete pou fer sir ki zot Gouvernman i travay.

Me zot osi zot annan en rol enportan, pa zis dan Kkmite me la anndan dan *Chamber* pou zot dir fran avek zot Gouvernman kote zot pe mal fer e kote ki zot pa pe adrese pou adres zot bann problem ki afekte zot distrik, espesyalman dan sa bann sekter.

Mr Speaker loter Mosyon in montre dan son prezantasyon ki kantite fristrasyon ki in annan anver son Gouvernman ki'n akimile tou sa letan. Mon konpran li mwan. Mon konpran li akoz ankor i konfirmen e i montre ki ler zot Prezidan ti vin fer son *speech* lo Leta Lanasyon i

montre ankor ki i pa'n vreman tous lo Leta son Nasyon.

Pou vwar vreman kote son bann MNAs dan son bann distrik pe ganny difikilte avek son bann Departman Minister kot i annan sa bann *issues* pou adrese, pou fasilit travay pou amelyor sa bann sekter spesifik.

Ankor la i montre ki zot annan en *failure* pou zot kapab azir fran e onnet avek zot Prezidan, pou zot kapab adres bann size ki tous sa bann Departman.

E pa blye i annan serten sa bann sekter ki zot in touse dan sa komite la, la parey lenerzi renouvlab. Be si i annan zot ki'n blye nou a fer zot rapel be zot Vis-Prezidan ti konplent ti dir s bann *fan* la, bann lelis ki in monte la, i pa ti dakor ek sa li i ti dir i fer tapaz ! Zot blye sa zot, la zot oule vin form komite ki pou fer? Pou dir li tire oubyen pou dir li kite?

Mr Speaker mon oule ranforsi klerman lo en keksoz, Lasanble i deza annan komite ki pe travay ki adres bokou sa bann size, i vre petet i pou annan serten ki pa neseserman pe ganny vreman ganny eleve an term son bann pwen, bann size enportan ki petet lo nivo enternasyonal nou bezwen met lanfaz lo la.

Me mon pa krwar form en komite spesifikman pou tousala i fer sans. Akoz ki Lasanble pa kapab servi son bann Manm ki deza annan bann reprezentan o nivo ki lo bann platform enternasyonal la par egzanp lo *IPU*, lo *SADC*, lo *CPA*.

Zot kapab anmenn sa bann Manm ansanm fer sa bann Manm bann travay ki zot al fer bann *oversight* ki zot al donn lenformasyon lo baz enternasyonal lo Sesel, kwa ki in nobou kapab progrese oubyen kot i annan difikilte, fer travay. Akoz ki ou pou bezwen al entrodwir en lot komite? Itiliz resours ki zot deza annan,

Mr Speaker Lasanble i bezwen pran li en rol serye, nou pa kapab zis deside poudir ozordi landmen nou vini, nou form en komite dan nenport ki size aprezan nou, nou menm nou Manm nou pa oule zwe nou rol pli enportan ki nou annan, se asire ki dan sa Lasanble letan sa bann zofisyen Gouvernman i vin devan nou, nou met ban *issues* bann konsern ki elektora in met nou la pou nou fer.

Mon santi poudir i annan plis rol ankor ki nou Manm nou kapab fer, nou kapab zwe pou nou kapab ranforsi nou travay, ki nou annan pou nou fer dan sa Lasanble Nasyonal. Lasanble

i kapab servi pli byen son bann resours annou travay pou nou fer marse nou bann lenstriktir ki deza la.

Par egzanp mon donn ankor lo kote bann rol ki sa bann komite ki deza egziste. Akoz nou pa kapab bann Manm ki annan bann *issues* dan zot bann distrik fer resorti ek sa bann komite, dir zot pou vwar ki bor. Sakenn i annan en *Caucus* fer resorti koumsa nou ava vwar bann komitman ki Gouvernman i donnen ki zot pa pe enplimante nou ava ranforsi lo la pou fer keksoz marse.

So mwan pou mon definitivman mon vreman *sorry* Onorab, mwan mon pa an faver pou annan okenn sa bann komite ki la dan, pou form li koumsa akoz mon santi ki Lasanble i kapab fer bokou pli byen e nou kapab servi resours ki nou deza annan pou nou kapab adres sa bann *issues* ki ou annan dan sa size lo komite.

Sa bann size i vreman enportan wi, me i annan landrwa ki nou kapab servi nou resours pli byen koman Manm Lasanble pou nou fer li. Mersi.

MR SPEAKER

Mersi Onorab Vidot. Mon ava apel Onorab Wavel Woodcock.

HON WAVEL WOODCOCK

Mersi Mr Speaker. Mr Speaker mon fransman mon en pti pe soke ki en Mosyon sitan enportan ki devan nou Lasanble ozordi ki bann Manm lot kote latab pe pran sa Mosyon koman en naryen ditou.

Annefe Mr Speaker sa Mosyon ki devan nou pe demann nou Lasanble pou etablir en Komite ki pou annan en *oversight* lo Sekter Lagrikiltir, Lanvironnman, Lenerzi Renouvlab, Sanzman Klima, bann konsern zil e osi Lekonomi Ble. Tousala i bann sekter ki vreman, vreman enportan dan nou pei ozordi pou nou sitwayen pou nou pei Sesel.

E parey Mosyon in dir sa komite pou swiv fonksyonnman sa bann sekter pou asir devlopman soutenab ekonomik e sosyal pou nou pei, tout an prenon kont prezervasyon lanvironnman avek bi Mr Speaker pou anmenn plis larises dan nou pei. E se sa ki nou pe rode, pou anmenn plis larises, devlopman dan nou pei pou lepanouisman nou zabitan.

Mr Speaker enn bann sekter enportan ki sa Mosyon pou adrese se nou sekter lanvironnman. E ozordi nou Gouvernman Mr Speaker in erit bokou konsern, bokou *issues*

bokou problem dan sekter lanvironnman ozordi. I annan bann keksoz ki dan lepase nou'n tann koz lo la me napa gran keksoz ki'n ganny fer.

E nou Mr Speaker koman en Lasanble responsab i nou responsabilite pou nou annan en *oversight* lo Gouvernman. E diferans ant nou Lasanble, ant sizyem ek setyenm Lasanble avek bann Lasanble presedans senkyenm e katriyenm Lasanble Mr Speaker se nou Lasanble, nou lo sa kote latab nou pa bann pou fer parey zot ti ete dan lepase.

Annou pa blyie lontan, ozordi nou pe koz travay, zot a pe koz travay, lontan Lasanble ti travay forse mon lanmwatye zournen apre zot ti al se zot zis en zour *plus*, Bidze ti ganny depouye dan enn de zour. Ozordi ou pe depouy Bidze Nasyonal dan 1 mwan - plis ki 1 mwan nou pe depouy Bidze Nasyonal pou nou adres bann size ki afekte nou en pep ozordi.

Kot i konsern lanvironnman Mr Speaker mon a komans lo sa *Seychelles Coastal Management Plan* ki ti sipoze ganny enplimante depi plizer lannen depi 2019 i ti'n sipoze komanse, me ziska prezan naryen pa'n ganny fer. Annefe Onorab Cosgrow ki ti Minis sa letan, Mr Speaker

napa naryen ki nou'n war ganny fer kot i konsern bann issue lo lakot, napa naryen ki nou'n ganny war ganny fer kot i konsern bann *issue* lo lakot.

Annefe la se nou Gouvernman ki met lanfaz pou fer enplimant bann diferan proze sirtou dan bann landrwa priyorite lo Praslin, dan mon kote Anse Kerlan, Amitie, osi lo kote Cote D'Or e osi dan bann lezot landrwa parey Baie Lazare li osi nou pe tande poudir i annan, nou Gouvernman ape bouze lo bann size, ki Gouvernman presedan pa'n fer preske naryen lo la.

Zot pe koz lo *failure* Mr Speaker, *failure* se ki ler zot in *fail* pou dil avek sa bann keksoz ki nou ozordi nou Gouvernman pe bezwen fer sa bann louvraz ek Gouvernman avan ek bann Lasanble avan, tou sa bann Lasanble 1, 2, 3, 4, 5 pa'n fer preske naryen Mr Speaker !

Mr Speaker ozordi annou pa blyi, nou pe koz lo lanvironnman, i annan bann issues ki nou pe war ozordi ki nou pe dil avek. Mon pa pou zanmen blyi sa lot konsern ki ankor fek souleve la ase resaman an regardan nou, kot i konsern proteksyon nou bann *marshland*.

Fek ariv en size Pasker resaman kot en lotel bann

delwil in devid dan nou lanmer e fodre pa blyi poudir sa *issue* i en *issue* depi 2014, ki ozordi ankor enn fwa nou Gouvernman bann size pertinan ki nou Gouvernman pe dil avek. E nou koman Manm Lasanble nou responsabilite pou nou anmenn tou sa bann keksoz devan, koz ek nou Gouvernman e anmenn konsern nou zabitan lo tou sa bann size ki enportan pou nou.

Ozordi mon tann zot pe koz tou sort kalite keksoz, zot pe koz sepa nou pa pe reprezent Lepep Seselwa. Mr Speaker tou sa bann letan zot in la en bann keksoz in pase dan Gouvernman presedan, koripsyon, vol, tousala nou pei at one point nou ti dan 40poursan la povrete, kot zot ti ete sa bann letan pou koz pou nou fere ek ser Lepep Seselwa?

E zot sa bann letan ler nou pei ti pe fer fas avek 40poursan la povrete, nou pa ti dan en kriz ekonomik Mr Speaker. Nou pa ti dan en pandemik Mr Speaker. Nou pa ti dan en kriz lasante, nou pa ti pe fer fas ek sa bann *issue* ki nou pe fer fas avek ozordi. Mazinen nou pei in deza dan lepase, nou pei in deza pas dan en kriz ekominik dan lepase.

E nou Gouvernman sa letan ti don sipor sa

Gouvernman ki ti la, me zot lot kote latab ozordi zot pa anvi vin donn sipor sa Gouvernman ouswa pou nou travay ansanm pou nou ed nou pep. Zot sel lentansyon Mr Speaker se fer politik bon marse pou detri sa pei.

Mr Speaker annou mazinen, mon a koz en pti keksoz. Ou konnen Lasanble avan ki ti en Lasanble *rubber stamp*, Onorab Adelaide parey i pe koze ozordi i pe koz sa bann keksoz akoz i santi, nou santi sa ki nou zabitan pe santi.

E nou, nou pa per pou koze, akoz en keksoz mal nou koze. Mwan ler ti ariv *issue Praslin* lo *nature trail* Mont Plaisir pou al Anse Georgette, mon'n koz lo la. Nou, nou pa per pou demann kestyon, nou pou anmennen *issue* akoz i nou responsabilite, pou nou koz lo nou bann *issue* ki nou war ki konsern zabitan nou distrik.

(APPLAUSE)

HON WAVEL WOODCOCK

Mr Speaker ler zot bann dalon ti pe donn bal lo *FA4JR* e osi dan *SBFA* ki ti enkli bann *MNA* lo zot bann kote latab, kot zot ti ete sa letan? Ou pa ti tann zot ditou. La ozordi ki zot anvi koz pou Lepep Seselwa apre tou sa bann keksoz ki'n arive anba zot

watch dan lepase kot zot pa ti zanmen fer naryen, zot pa ti donn preski en sou kestyon, kot zot kestyon ti ganny ekrir par La Faya ti donn zot pou zot vin demande dan Lasanble Nasyonal.

Mr Speaker ozordi tou sa bann keksoz ki lot kote latab pe koz kont ozordi zot Gouvernman ti pe al enplimante. Zot ti'n fini pronons zot lekor lo la avan eleksyon 2020. Lo size ogmant pansyon se zot Minis Finans Mr Speaker, Minis Lalanne ki ozordi mon pa pou koz lo la, i annan bann avanse Ankour - Minis Lalanne ki ti anonse poudir zot pe al ogmant laz pansyon.

E annou pa blyie osi ki se zot menm Minis e zot Prezidan, zot Gouvernman ki ti osi anonse ki ti anonse ki zot pou bezwen reviz trezyenm mwan saler. So plizyer sa bann keksoz Mr Speaker ki ozordi zot pe koz kont la, zi zot ti'n rapport eleksyon zot ti pou bezwen enplimant sa bann keksoz.

Akoz zot in fini fouy trou e zot ti pou kontinyen anmenn nou dan sa bann trou, kontinyen fouy sa bann trou pli fon, e nou Gouvernman in vini, prezan nou, nou annan sa malerezman ozordi nou bezwen dil ek sa bann keksoz e sey

bous sa bann trou ki zot Gouvernman in fouye pou tou sa bann lannen.

E Mr Speaker i pa en pti trou i en gro trou pou nou bouse Mr Speaker, me selman nou pou bouse sa trou. E sanmenm sa ki nou pe demann zot ozordi pou donn nou sa sipor pou ed nou bous sa trou ki zot Gouvernman *SPUP, SPPF*, Parti Lepep, in fouye. Donn nou sa sipor mon bann frer, pa zis kritike, pa zis gognarde.

Ou konnen Mr Speaker mon sagren zot pe koz ozordi e anvoy pou pep Seselwa, me ozordi ki nou war dan nou Lasanble, en bon pe kankan, en bon pe dispit, tou sa bann Manm proporsyonnel tou lazournen pe fer kankan ek Speaker, enkli zot *Leader Lopozisyon*.

Apre zot leve zot sorti e zot fors tou bann Manm elekte pou kit Lasanble Nasyonal pou al an deor e zot kolekte zot saler lafen di mwan, apre zot dir travay pou Lepep Seselwa! Selman zot saler zot pe touse zot, sak fwa zot *walk out* dan Lasanble apre zot tous zot gro saler lafen di mwan !

Sanmenm sa ki apel travay pou pep Seselwa, zot bann manm elekte pa tro, tro ekout sa bann mam proporsyonnel akoz si zot

kontinyen ekout sa bann Manm proporsyonnel zot pou disparet net !

Mr Speaker ler *COVID* ti tape e lekonomi ti lo son zenou zot Gouvernman, zot Minis parey mon'n dir Mr Speaker zot ti pran plizyer bann desizyon. Enn, bann desizyon sete pou ferm pei, me ler ti arriv ler pou re ouver pei pou nou reouver nou lekonomi ki zot ti fer, zot ti koz kont, zot ti *boycott*, programm vaksinasyon osi zot ti *boycott*.

Mr Speaker zot in zis sa bann Manm lo lot kote latab zot pe swiv sa ki zot Sef i dir zot laba lot kote, zot pe zis fer sa ki zot pe ganny dir, zot pe *boycott* tou keksoz a leksepsyon zis en Manm ki mon war i koz byen dan sa Lasanble ki mon annan en gran respe pou li, sa se Onorab Gill ki mon annan gran respe pou li.

MR SPEAKER

Onorab 15minit. Eskiz mwan mon ensiste lo la, mon ensite lo al akoz mon annan plizyer Manm ki'n lev lanmen pou koze. Prosede Onorab.

HON WAVEL WOODCOCK

Ok, Mr Speaker ozordi nou pei pe fer fas avek en kantite keksoz e i dan lentere nou pei e nou Gouvernman i anvi ed nou frer la deor. I nou lentansyon pou ogmant saler Lepep

Seselwa e fodre pa blyie nou fek sorti dan en *deficit* lannen pase e nou Gouvernman pe tap tou sa lannen pour ki nou *at least breakeven*, ouswa fer sirplis pou nou kapab ed nou frer ki la deor.

Annou pa blyie kot nou sorti e kot nou pe ale, e mon an frer e mon, mon santi poudir bann desizyon ki nou Gouvernman ape pran, e menm sa ki sa Mosyon pe demande pou anmennen ozordi i bann keksoz ki pou benefisyé nou pei.

Mr Speaker annou pa blyie dan lepase nou pe koz lo zil, sa Mosyon pe dir annou adres bann size zil. Dan lepase gouvernman avan lanfaz ki zot ti mete dan lespas se sirtou lo devlopman *tourism* lo bann zil. Me selman lo kote lagrikiltir in mank en pe lanfaz lo la pou devlop lagrikiltir lo nou bann diferan zil.

E annou pa blyie poudir lontan dan lepase bann zil ti bann *personal playground* pou bann milyonner, parey Remir kot zot in fer *villa* avek *tenis court* apre la ozordi sa bann keksoz in ganny abandonnen.

E annou osi pa blyie Mr Speaker enn bann pli gro *failure* - Onorab Cosgrow ti pe koz lo *failure* - enn bann pli gro *failure* ki nou'n war Sesel se laferm

kanmaron Mr Speaker. Pli gro *failure* ki nou'n war e si ozordi nou Gouvernman ki pe sey relans sa.

E nou tou nou konnen poudir sa laferm kanmaron Komite Zil avan ki ti al fer vizit laba Coetivy, zot in war sa kantite gaspiyaz bann lekipman, bann basen, bann donne. E nou konnen i annan bann basen abandonnen e kot nou konnen i annan sa bann dimoun ki'n fer plizyer milyon atraver laferm kanmaron e ozordi sa bann Sef, son bann met Sef kanmaron ozordi i lo rimann e pe fer fas avek bann sarz.

E parey mon'n dir Mr Speaker nou Gouvernman ozordi pe met lanfaz pou relans sa bann diferan sekter, pou redonn en novo viger nou lekonomi.

Kot i konsern lenerzi renouvlab Mr Speaker, ozordi nou preski antyerman depandan lo karbiran lo *fossil fuel*. pou elektrisite, pou loperasyon tou nou bann biznes. E mwan mon santi pou dir nou bezwen koup depandans ki nou annan lo *fossil fuel* lo karbiran e konsantre en pe plis lo lenerzi soutenab parey lo bann pano soler.

E nou tou nou konnen vreman la aktyelman ki pe arive dan pei annou pa sourd, annou pa fer krwar nou pa konnen ki pe arive dan lemonn. Nou tou nou konnen lemonn in fer fas ek en kriz ekonomik ki'n ganny anmenn par pandemi COVID-19 e la ozordi nou pe fer fas avek lager Larisi *Ukraine* i annan en barik delwil in arriv pi ki \$100ekek.

E nou pe ganny afekte, e sanmenm sa i enportan pou nou bouz dan sa direksyon pou nou envestir dan lenerzi - *energy* dan *hydro energy* i annan, nou dan lanmer otour nou, nou annan soley. E mwan mon santi ki in ler pou nou met lanfaz lo sa bann keksoz ki pou ede koup nou kou e nou depans e nou depandans lo *fossil fuel*. Mr Speaker ozordi in arriv en letan dan nou pei kot -

MR SPEAKER

Ou a konklir Onorab silvouple.

HON WAVEL WOODCOCK

Nou bezwen proaktiv, e sa Komite apre ki in ganny formen Mr Speaker mon asire poudir i en Komite ki pou annan sa *oversight* e pou fer bann kontribisyon ki pou ede bouz ou pep devan.

An konklizyon Mr Speaker mon anvi profite pou fer en

pledwari avek mon fere lot kote latab ki sorti menm zil avek mwan Praslin, nou antoure avek bann zil avek plizyer konsern parey Curieuse, alor mon fer en lapel avek mon fer Onorab Gill pou siport sa Mosyon pou nou get sa bann konsern ki nou annan lo zil. Pou nou ede bouz nou zil pli devan.

Pa ekout sa bann zans proporsyonnel, akoz zot pa pou anmenn nou okenn par zot. Zot vin zis met dezord dan sa pei. Avek sa 2 mo Mr Speaker.

Mwan mon pou siport sa Mosyon. Akoz mon konnen poudir sa Mosyon pou etablir sa Komite i enn ki bon e Lepep Seselwa a lonterm zot pou benefisy. Avek sa 2 mo mon dir ou mersi Mr Speaker.

MR SPEAKER

Mersi. Onorab Aglae.

HON EGBERT AGLAE

Mersi Mr Speaker. Bonzour tou Manm Onorab e tou dimoun a lekout.

Mr Speaker sa Mosyon ki la devan nou, ler mon'n ekout bann entervenan lot kote pou sey zistifye rezondet pou anmenn en Mosyon parey e pou met an aplikasyon, mon santi mwan konfize.

Napa enn ki'n kapab dir mwan ouswa sey *convince* mwan kote zot anvi sa Mosyon, dir ki direksyon ki zot anvi i bouze.

Ki son limitasyon, ki zistans dan son splander i pou ale. E mwan pou mon war en Mosyon ki pe sey *hijack* en pe travay ki Egzekitiv ki ti sipoze fer.

E nou koman en Lasamble Nasyonal ki annan en *oversight rule*, ki nou sipoze pe fer, sirtou par ler nou'n anmenn nou bann kestyon dan *Question Time*, kot nou kestyonn bann Departman Ministeryel lo bann direksyon ki zot pe pran.

E ki nou parfwa nou ganny en pe siprimen pou pa demann plis kestyon. Se sa nou louvraz ki nou sipoze pe fer, me se pa atraver en komite ki sa travay pou ganny akonpli.

Mr Speaker, depi ler lot kote latab in antre dan gouvernans, i paret ki *United Seychelles*, gouvernans sortan i pa'n donn zot sa *manual how to run the Government*.

I kler ki ozordi zot pe kasyet deryer en Mosyon, kan si zot ti *etre* fran poudir zot Gouvernman ki lafason ki serten bann ladministrasyon pe fonksyonnen, pa pe marse e dimoun pa pe satisfe, baze lo zot bann promes eleksyon ki

zot, zot ti fer ler zot ti pe konpanny pou zot vin o pouvwar.

Mr Speaker nou'n war dan lepase ki ler US ti o pouvwar, Lepep, zot, zot ti dan Lopozisyon, napa kritik anver sa Gouvernman ki zot pa ti fer lo lafason ki i ti pe delivre.

E si nou ozordi lot kote latab nou pe fer sa ki zot, zot ti fer koman en lopozisyon responsab, ozordi zot war poudir nou ki mal.

Mr Speaker fodre zot pa blye, ki en Gouvernman pou *run* i pa en latas ki fasil. E ozordi zot pe war sa zot e se sa ki zot pe anmenn sa Mosyon.

E mwan mon bann kestyon ki mon pou demande, baze lo loter Mosyon ki'n esey eksplik nou rezondet bann desizyon pou *tackle* bann size.

E Gouvernman li menm li i annan sa ki nou apel the *Cabinet of Ministers*. Kot tou desizyon pei i ganny diskite. Depi son laspe proze, depi son laspe finansyel, son laspe sosyal, tou.

Depi son laspe lasante, ledikasyon. E nou'n menm war Prezidan mont lo televizyon e eksplik en proze ki Onorab Adelaide in vin konplent ek nou la anndan ki ti ganny fer laba Anse la Mouche.

Zot ti napa kouraz pou zot met devan zot konsern pou koz ek zot ladministrasyon, pou zot koz ek zot *Cabinet*? Se atraver komite ki zot anvi akonpli sa bann dezir?

Mr Speaker Gouvernman osi i annan li bann *High Level Committee* ki kouver bann diferan sekter, differan desizyon.

Eski sa bann dimoun ki form par sa bann komite, zot pa konn zot louvraz, zot pa pe fer li byen. Akoz se s aki pe rezonnen atraver sa Mosyon ki zot pe anmennen devan nou la.

Se sa ki mwan mon pe konpran. E si en dimoun pe asize pe ekoute deor pep, i pou vvar poudir zot pe konplent poudir i annan *failure* e zot pa kapab vin devan pou dir.

E zot bezwen maske dan en Komite pou zot dir sa ki zot bezwen dir kot pe mal. Nou osi annan bann *Board* avek differan lorganizasyon.

Menm si zot in vini, zot in anvi tir en bon pe sa bann *Board*, se bann *Board* ki donn bann direksyon ki mannyer fonksyonnan pou ale, ki bann devlopman ki pe vini.

E nou rol Lasanble, se pou anmenn zot la anndan. Ler Onorab *Leader* Lopozisyon ti anmenn kestyon lo kot i konsern *SBC*, Vis-Prezidan ti

vini, en *one-man-show*, mon pou dir Mr Speaker, e nou pa'n ganny lenformasyon ki nou ti pe anvi gannyen. E antite apre i konplent, i dir li ki bezwen vin reponn son prop kestyon.

Mr Speaker ou war se sa bann keksoz ki ozordi pe retournen pe tap zot lo lot kote latab, ki pe fer zot vin avek bann *back door Motion* pou sey anvoy lanmen pou ganny en pe sa nosyon politik ki zot, zot ti konplent, poudir tir politik dan servis piblik e met tou teknokrat.

E ozordi ler tekno krak pe *apply* son travay *à la lettre*, zot vwar poudir zot koman politisyen, i pa pe fer zot zistis, e zot anvi met lanmen politik dan bann desizyon ki sa bann differan Departman i bezwen travay, i bezwen fer.

Se sa ki mon pe war pou arive. E i domaz ki nou bezwen fer sir ki kalite direksyon nou anvi pran. En lot pwen Mr Speaker, nou annan 2 komite enportan ki *Standing Orders* e menm anba Konstitisyon i prevwar sa i FPAC e COGA.

E ler mon pe get laliny ki komite, baze lo Mosyon, i pe met devan, eski nou pa pou al war en mars lo lipye kanmarad, sirtou ler nou pe koz sa bann sekter, kot i annan bann

lasirans ki sa bann Departman osi i bezwen fer.

So ki rol COGA pou fer ler pou koz lo ban lasirans ki ganny fer, swa dan nou lanvironnman, lagrikiltir, lekonomi ble, zil, eski nou pou bezwen vwar en *merger* la pou kapab adres?

Ouswa COGA li i pou bezwen reste trankil, komite ki pou *take on Board*? Nou bezwen adrese sa. FPAC li menm, zot in koz lo serten mankman, serten keksoz ki'n pase, zot pou anvi al adrese atraver sa komite. Be ki rol FPAC pou zwe alor? Tousala zot bezwen vin kler lo la.

En lot pwen Mr Speaker, Lotorite *Planning* li menm. Sesel nou annan nou en Lotorite *Planning* ki tonm ek son *parent* Minister kot nou fer bann *land use plan*, e ki si i annan bann proze ki pe vini, nou annan osi parey kot *SIB, Investment*, nou annan Departman Lenvestisman, i annan bann travayer ki travay ki sipoze bann profesyonnel ki pran bann desizyon.

Eski sa osi nou pou bezwen al met lanmen dan desizyon *Planning*? E fodre nou pa blye osi koman en Manm Lasamble, en responsabilite ki nou, nou annan, se ki ler i annan bann *Expression of*

interest pou bann diferan koz proze, nou ganny envite, swa atraver Lalwa osi, pou nou donn nou lopinyon lo la.

E se la kot si pou pa kontan en keksoz ou pa satisfie dan en direksyon ki en keksoz i pran, ou vini ou fer ou pwen devan e nou'n fer sa dan lepase.

E zot in fer en kantite ler nou Gouvernman ti o pouvwar zot. Bon ozordi zot Gouvernman i o pouvwar, zot pa kapab fer sa, zot bezwen nou pou fer sa pou zot.

Me parey Onorab Cosgrow in dir, pep Seselwa li i pa ti deside donn nou en mazorite li, 2020. I ti donn zot. *So own up* pou sa vot ki zot in gannyen, koz pou sa pep Seselwa.

E mon en keksoz, petet mon ti a siporte, avan sa Mosyon ti ava vini, se anmenn en Mosyon pou kree en komite ki mannyer nou pou ganny en direksyon ek Gouvernman pou *tackle* sa size pri lavi e met larzan dan pos Seselwa.

Sa ti ava en Mosyon irzan pou anmennen pou kree sa komite, e la mon ti pou siporte. Akoz ozordi sa pep i lafen, sa pep i dan problem, sa pep pa kapab pey son bil, sa pep napa en lasyet manze, i annan ki manz zis 1 fwa par zour.

Elektrik pe koupe, delo pe koupe, zanfan pa pe ganny

goute pou al lekol, e ler nou, nou fer en zes pou donn zanfan goute, zot pas deryer zot fer en bann manigans politik.

(Interruption)

MR SPEAKER

Arete. Silvouple, mon komans tann ankor enteripsyon, mon pou don en *warning*. Mon bezwen ki sa de ba i prosed annord.

Alor en Manm ki enteronp Lasanble dan en fason ki mon santi i pa apropriye, mon pou demann li kit lasal.

E lo size, lo lot size ki mon'n koz lo la bomaten, mon realize byensir ki mon pa kapab anpes bann manm koz lo lepase, ki en Gouvernman in fer, ki lot pa'n fer.

Zot kapab fer sa. Me selman sa ki zot bezwen evite se adres bann Manm ki la dan sa Lasanble, konmsi zot, zot pe mal fer.

Pa pou kritik zot, me pou *impute improper motives*, lalang and so on, ok. Sa i la, mersi. Wi Onorab Pillay.

HON SEBASTIEN PILLAY

Mersi Mr Speaker. Mon oule demann ou, ou gidans lo sa size.

MR SPEAKER

Wi.

HON SEBASTIEN PILLAY

Mon pa oule *impute*.

MR SPEAKER

Wi.

HON SEBASTIEN PILLAY

Me, Onorab Aglae e Onorab Loze, ler zot in fer sa bann pwen ki ou'n santi ou'n aret zot.

Onorab Woodcock in koze ava, in *impute* en *improper motive* ki nou bann Manm Proporsyonnel lo sa kote latab, nou vin dan Lasanble pou fer dezord e nou fer lezot Manm ki'n ganny elekte, leve kit Lasanble.

MR SPEAKER

Wi.

HON SEBASTIEN PILLAY

Now, ou pa'n aret li a sa moman. So petet mon pe zis dir ek ou, sa i kapab ganny vwar ki ou pe aret nou lo sa kote latab e ou pa pe aret bann Manm lo lot kote.

I pa mon lentansyon pou fer sa, me i kapab ganny vwar dan sa fason. So mon oule zis met sa a ou latansyon.

MR SPEAKER

Mersi Onorab. Mon'n swiv Onorab Woodcock. Mon santi

ki son bann komanter ti ankor annord ziskan lafen son *speech*. Mersi.

Onorab Aglae ou a eskiz mwan pou sa enteripsyon, mon santi i ti neseser. Mon a envit ou pou prosede avek ou entervansyon.

HON EGBERT AGLAE

Mersi Mr Speaker, i pa dan mon dezir pou akiz personn okenn mansonz ouswa lalang. Mon pou *stick* lo mon kontribisyon.

Wi Mr Speaker, e tou resaman nou'n antann kot bann *retailers* in zwenn ansanm pou adres serten size ekonomik, ki mon santi i enportan.

E malgre ki *Urgent Question* pa ti ganny sans pase, i annan bann fe ki'n ganny sorti ki nou santi nou vreman konsernen.

E se sa ki mwan mon santi poudir bann Mosyon ki relye ozordi avek size ki pe tous nou pep, i enportan. Nou'n ganny akize 40poursan lapovrete.

Be mon asir zot, si nou fer en *survey* lapovrete ozordi i pou par lao 60poursan dan sa pei. Sa mon asir zot.

E pou mwan Mr Speaker, rol Lasanble li menm li koman sa *oversight*, ki mon santi ki nou'n devret pe fer dan en fason onnet, fran e zis.

San mazinen lekel ki dan lopozisyon ouswa lekel ki o pouvwar. Akoz sa i nou travay koman en Lasanble. E ler mon pe get serten aksyon ki Mosyon i anvi adrese, mon demann mon lekor serten kestyon, eski sa Mosyon li menm li in ganny latansyon sa ki pli o.

Eski in gannyen sa *blessing* pou ale? Akoz mon santi poudir i annan serten zot pa pou kontan si en Komite parey i formen.

Akoz nou konnen ki pou arive. I annan pou dir, be la ou pe enterfer dan sa ki mwan mon pe fer, ou pe enterfer dan mon Minister.

Pa ou ki pou donn lord si sa semen pou pas isi, pa pou ki pou donn lord si lot *building* pou ganny konstri isi. E sa i poz en lenkyetid pou mwan.

E si zot asize ansanm, zot in koze, mon pou dir zot *congratulation*.

E pou konkli Mr Speaker, mon krwar ki en kantite keksoz ozordi in ganny fer dan sa bann sekter ki nou pe anvi adrese. En kantite.

Lanvironnman lo en sanpyon e nou menm nou, nou Prezidan i mont devan, i al pran, i al reprezante bann pri. E lo lot kote ou tann bann Onorab i vini i dir lot kote en ta problemm dan lanvironnman.

I kree konfizyon la. Lenerzi renouvlab, sanzman klima, se nou Gouvernman ki ti entrodwi sa Departman, sa Minister. I napa en kantite letan depi ler in ganny formen, e i merit ganny anbelir.

Dan plas ler zot ti vin an pouvwar, kas tou keksoz ki ti bon, ki preske bon, ki ti pe apiy nou pep, zot ti devret anbelir.

En fot ki zot fer, se zot pa'n anbelir sa ki ti la, zot le kase akoz pa zot *legacy*. Zot pa'n kontan US, zot pa'n kontan Lepep, zot vini zot briz kas tou keksoz ki ti pe marse.

Be fodre nou fer atansyon, i pa tro tar pou zot. Mr Speaker, avek sa mon pou konklir lanmenm. E mon pa santi poudir sa i *the right timing* pou anmenn en Mosyon parey Komite Sektoryel lo sa bann size.

Me fer en Komite Sektoryel, annou adres kou lavi, annou adres, adres pos Seselwa. Mersi.

MR SPEAKER

Mersi. Mersi Onorab. Onorab Larue.

(APPLAUSE)

MR SPEAKER

Mersi Onorab. Onorab Larue.

HON FLORY LARUE

Mersi Mr Speaker. Bonzour tou dimoun a lekout. Bonzour tou Manm.

Mr Speaker ozordi nou en pei ki annan en listwar avek en konmansman lagrikiltir avek letan nou'n transformen e ozordi nou'n vin en pei ki *rely* en kantite lo lenportasyon ki sorti aletranze.

Nou osi en pei en pep ki kontan son lanvironnman e sa i par nou lavi toulezour. Letan nou al travay nou vvar nou lanvironnman otour nou dan nou letan lwazir nou al lo lans, nou fer bann *hikes*, nou al fer bann *boat rides*, letan nou lafen nou al lapes dan nou letan lwazir ouswa konman en travay sa i fason ki nou, nou'n viv isi.

Mr Speaker resaman nou'n pas dan en eleksyon Oktob 2020, e sa in fer ki LDS i dan Egzekitiv e isi dan setyenm Lasanble in ganny li en mazorite absoli.

Avan nou ti fer sa Eleksyon. Nou ti demann Lepep Seselwa pou fer en komikman avek nou. E nou ti fer nou bann promes atraver sa dokiman Mr Speaker ki nou apel li en Manifesto. Sa manifesto ti la pou gid pep Seselwa pou vvar ki bann keksoz en Gouvernman LDS

pou anmennen pou li e kisia ki nou promet pou fer.

Mr Speaker pou nou kapab konpran byen e fer Seselwa mazinen kisia ki nou ti promet pou anmennen mon pou pas en pti pe dan Manifesto.

Premyerman son tit i Sesel pou tou son zanfan. Pou tou dimoun isi Sesel. Mr Speaker premye keksoz ki nou vvar lo paz 3 i koz lo nou misyon pour Sesel.

Letan nou koz lo nou misyon nou dir ki nou pou fer en pei pli meyer e nou pou fer en sosyete ki pli meyer ki pli for.

Mr Speaker lo paz 10, nou dir ki nou pou anmenn Sesel *past COVID-19* nou pou fer fas avek *COVID-19* e nou'n *past* li nou *past* li byen *safety* e *economic recovery*.

Sa bann keksoz i la dan nou Manifesto sa ki mon pe lir. E la lo paz 10 i dir ki pou nou fer fas pou nou *past COVID* nou pou bezwen kree en plan a lonterm, nou pou bezwen reviv nou lekonomi e fer li en nouveau lekonomi.

E enn bann pwen ladan i dir nou pou annan bann target anbisye pou nou vin *self-efficient* e nou pou fer sir ki nou sey ranplas bann keksoz ki nou enporte.

Mr Speaker lo paz 11 eskize Mr Speaker lo paz 20 nou kontinyen lo paz 20. Nou koz lo nou Sekter Lapes. Sekter Lapes nou dir ki nou pou fer li vin en *top industry*. Bann promes ki nou'n fer nou'n dir enn bann promes nou dir nou pou servi nou zil elwanye pou nou agrandi bann fasilit e pou fasilit bann eksplwatasyon sa bann zil.

Mr Speaker nou annan en bout lo paz 21 ki adres direkteman nou Sekter Lagrikiltir pou fer li vin en lantrepriz nasyonal.

Nou pou met priorite lo sa lendistri pou ki dimoun i kapab ganny zot lavi nou kapab ganny en gen ekonomik e menm bann dimoun ki kontan pou fer sa konman en lwazir met sa dan lavi Seselwa toulezour.

Mr Speaker lo paz 28 e 29 nou koz lo nou lanvironnman, e la nou donn li de paz, mon parti in dir ki nou, nou pou viv ansanm avek lanatir, nou pou prezerv nou lanvironnman, e nou pou vin en sanpyon lanvironnman. Nou fer en komikman pou nou retir bann plan envaziv nou pou regard ki mannyer nou *deal* avek nou salte en keksoz ki ziska prezan in en gran problem akoz in annan en mank planifikasyon.

Mr Speaker, en lot nou bann promes ki nou'n fer. I pou *shape a better country* pou nou fer en pei ki pli meyer traver nou bann lenfrastriktir. Nou'n dir dan tou nou bann desizyon ki nou pou pran, nou pou fer ki nou pou regard adaptasyon klima, nou pou regard bann opsyon pou *renewable energy* e pou nou *extend* sa ki fer ki nou kapab vin en pei ki pa sitan depann lo *fuel*.

Mr Speaker isi dan nou *Caucus* konman en parti *LDS*, nou'n diskrit lo lenportans sa bann promes ki nou parti ti fer avek pep Seselwa e zot ti krwar ladan, e zot in elekte nou avek en mazorite isi dan Lasanble e zot in met Prezidan Ramkalawan *State House*.

Me nou vwar Mr Speaker ki letan nou ti vin o pouvwar nou ti erit pei ki ti ganny deklare konman en kales kase dan milye en pandemi mondyal. Avek *COVID* nou'n vwar ki nou pei ti frenmen, ti napa avyon ki ti antre. Kantite nou ti pe demande kote mannyer nou pou fer vini manze, e si nou pou annan ase lenerzi, pou nou pep kapab alim lalimyer ouswa kontinyen dray zot transpor.

La Mr Speaker preski 2an apre nou'n vwar nou avek en lager, ki'n deklare sa lager Mr Speaker akoz son alokasyon kot

i ete dan lemonn, i fer ki bann matyer debaz, ki nou fer lafarin avek, margarin e delwil i manke dan lekonomi mondyal.

Sa pou afekte nou in deza konmans afekte nou e nou pa konnen pou konbyen tan i pou afekte nou.

Mr Speaker konman en Lasanble responsab nou bezwen adres sa bann keksoz. E la nou vwar ki Onorab Adelaide in anmenn en Mosyon ki regard egzakteman sa. I demann Lasanble pou partisipe pou partisip dan bann sekter nou pei ki afekte dimoun, lagrikiltir sa i lo kote manze lagrikiltir i sa ki nou manze i fermye ki donn nou tou manze.

Nou lanvironnman, pou nou kapab soutenir nou lekor nou bezwen fer sir ki nou kapab kontinyen plante, nou bezwen regard sa lanvironnman ki nou ladan.

Lenerzi renouvlab i en keksoz ki nou'n promet nou'n sir trete, nou'n koz lo la. Ozordi an lannen 2022. Nou pa kapab kontinyen koz lo la. Nou bezwen fer ki konman en Lasanble nou asiste nou Gouvernman, pou kontinyen anmenn devan sa bann komikman ki nou'n fer lo nivo enternasyonal e pou nou anmenn li lo en nivo ki nou pep i benefisyé.

Sanzman klima i en keksoz ki nou montre nou zanfan dan lekol nou fer *poster*, nou fer desen, nou fer konpetisyon pa kapab zis a size koze lo sanzman klima, me nou pa deside pou anmenn en *body* serye sorti dan Lasanble pou regard sa bann keksoz pou diskrit lo sa bann keksoz.

Nou bann zil Mr Speaker Sesel i en pei ki annan 115 zil. Son superfisi total later 455 kilomet kare.

Mr Speaker toultan nou dir nou en pti pei. Me mon rapel byen Prezidan Ramkalawan in fer sa dan sa Lasanble toultan i ti dir nou, ki nou pa en pti pei, nou en gran pei. Nou sifras lanmer i preski 400 mil kilomet kare.

Mr Speaker nou pa ptipti ditou. I annan en kantite keksoz ki nou kapab fer, e la sa Mosyon i regard nou bann zil, nou annan 115 sa bann zil, e nou regard Lekonomi Ble ki en keksoz ki fer ki nou pou kapab donn manze nou pep. Akoz nou, nou manz pwason *fish food* nou manze sa nou.

Prezan Mr Speaker, isi nou'n dir ki nou fer politik dan Lasanble isi nou fer politik me *as well* ki fer politik kot en bann i fer politik serye apre en bann i fer diferan kalite lezot politik ki enteres zot, nou bezwen dir ki

nou form par en sistem gouvernans dan nou pei. Nou pei i annan 3 lebra Mr Speaker.

Enn i Lezislatif isi, pardon Mr Speaker, enn i Zidisyer, kot Lakour ki i annan son Sef Ziz e la zot fer en travay lo kote legal.

Egzekitiv ki i annan Prezidan ki li lepep Seselwa in elekte li e met li *State House* ek tou son bann Minis, e nou isi dan Lezislatif Mr Speaker ou avek tou ou bann Manm nou fer Lalwa, nou demann bann kestyon, nou pas bann Mosyon.

Mr Speaker atraver bann komite ki osi enn nou bann travay akoz nou ganny peye pou asiz lo bann Komite ki egziste. Nou fer en travay *oversight* lo bann aksyon ki Gouvernman in fer.

Mr Speaker mon bezwen *remind* Lasanble ki bomaten atraver ou Mr Speaker, Onorab Lemiel in prezant nou en rapor sorti kot COGA. Dan sa rapor in dir nou bann vizit ki zot in fer bann enteraksyon ki zot in fer avek bann Minister.

E sa travay i ganny siporte akoz i annan tou le de kote latab ki asiz lo sa bann komite.

Mr Speaker nou annan de Komite ki sorti dan Konstitusyon, nou annan *Finance and Public Account Committee* Seselwa i konn li konman FPAC apre nou annan

Standing Orders Committee li i ganny preskrir par Konstitisyon.

Nou annan lezot Komite Mr Speaker. Nou annan *Committee and Government Assurances* nou annan *Communicable Diseases HIV/AIDS and Sexual Reproductive Health and Rights Committee*. Nou annan *Defence and Security Committee* nou annan *House Committee*, nou annan *International Affairs Committee*, ki apel IAC, nou annan *Media Youth and Culture Committee*, nou annan *Scrutiny of Bills Committee*, nou annan *Women's Parliamentary Caucus*.

Alor Mr Speaker fodre pa pep Sesselwa i ganny anbete isi dan sa Lasanble napa komite. I annan diferan komite, e mon *remind* zot ki Manm lo tou le de kote latab i lo sa bann Komite.

FPAC son *Chair* se Onorab LOTO Sebastien Pillay. E la parey mon'n dir zot bomaten Mr Speaker, *Chairman COGA* li Onorab Lemiel.

So zot annan en partisipasyon dan bann Komite zot travay pou fer en louvraz pou fer *oversight*. Zot pa kapab ozordi Mr Speaker vin dir nou ki zot pa konnen ki rol en Komite ki en komite i fer akoz nou form komite. Akoz zot lo sa bann

komite si zot pa krwar dan louvraz en Komite zot devret *resign* lo tou sa bann komite ki zot lo la akoz zot pran en saler pa travay lo komite akoz zot pa krwar dan kisia en komite i fer.

(APPLAUSE)

HON FLORY LARUE

Mr Speaker, nou'n ganny dir ki en novo Komite sa enn ki la spesifikman Onorab Adelaide in anmenn pou nou, kot i pe koz lo bann keksoz debaz, lanatir, lagrikiltir lenerzi bann keksoz ki dimoun i bezwen pou zot kapab manze viv. Akoz sa lemonn ki nou ladan avek sa lager nou pa konnen ki direksyon nou pe ale.

E nou konman en Lasanble responsab avek tou sa bann promes ki nou'n fer konman en group letan nou'n al Eleksyon nou'n vvar ki sa bann keksoz i pli enportan ozordi plis ki zanmen e nou bezwen nou travay pou asiste nou Gouvernman ki zot reste lo bann promes ki zot in fer e nou, nou annan en rol spesifik ki osi ganny mete dan sa manifesto Mr Speaker.

Nou'n ganny dir ki nou, nou Mosyon si in ganny otorizasyon sorti *State House*? Mr Speaker mon'n eksplike ki nou annan 3 lebra dan sa

Gouvernman. Nou, nou separe avek *State House*.

Si Mosyon sizyem Lasanble ek bann ki'n vin avan kot US ti en mazorite son Mosyon ti ekri *State House*, son kestyon ti ekrir *State House* nou pa menm parti parey zot nou Mr Speaker, Mr Speaker.

(APPLAUSE)

HON FLORY LARUE

Nou pa bezwen aprouvasyon personn zis nou Caucus i diskite, nou deside si i enportan. Nou met nou bann pwennvi devan nou anbelir sa Mosyon nou anmenn li pou pep Seselwa Mr Speaker.

Mon pou bezwen dir ki lo paz 36 nou Manifesto konman en parti letan nou ti al dan Eleksyon 2020 nou ti dir pep Seselwa en keksoz, nou ti eksplik zot, nou ti eksplik zot Mr Speaker lo paz 36 ki nou rol *LDS as the Government party National Assembly*.

E la nou parti lamazorite dan Lasanble. Mr Speaker nou'n dir ki nou pou annan nou en rol vital, ki nou bann Manm isi dan Lasanble nou pou en lavwa pou pep Seselwa ki'n elekte zot.

E nou bann responsabilite i fer ki nou desarz tou nou

travay ki Seselwa i demann nou.

Mr Speaker i dir ki nou pwen nou komunik avek nou Egzekitiv. Pou nou kapab delivre lo nou bann proze ki nou'n fer.

Mr Speaker sa i bann promes ki nou ti fer avek Seselwa. Nou ti dir zot nou pou en parti dan Lasanble ki pou demann bann kestyon.

E nou ti dir lo pwen 2 nou pou anmenn konsern pep Seselwa a latansyon Gouvernman. Mr Speaker se sa ki en komite i fer. En komite akoz bann i ganny reprezent par Manm, Manm i annan en distrik, Manm i koz ek pep Seselwa i vini i koz ek Egzekitiv nou fer bann diskisyon nou regard zot bann promes ki zot in fer nou al an detay nou zwenn nou fer bann lenvestigasyon nou regarde kwa ki pe arive pou nou kapab fer ki bann solisyon i vin pli vit.

Sa ki nou pe demande la Mr Speaker. Nou pa pe lager avek nou Gouvernman nou. Si zot dan Lasanble oparavan in mal konpran rol en *MNA* zot krwar ki en *MNA* fodre lord sorti *State House*, zot travay zis en demi zournen, zot pa oule pran zot rol serye pou pep Seselwa respe zot. Mr Speaker i pa naryen ki nou, nou kapab fer.

Me nou dan setyenm Lasanble nou konn byen nou rol, nou en gro group nou respe Seselwa nou respe nou parti e nou la pou travay pour lenter pei parey Egzekitiv i la pou travay dan lenter pei.

Nou, nou krwar dan plis dimoun i asiz lo latab pou fer en diskisyon pli vit nou vwar solisyon. Napa en sel dimoun ki desid pou nou Mr Speaker sa letan diktater kominis in fini sa. La nou dan en demokrasi.

Nou dan en demokrasi Mr Speaker, ozordi zot in tourn sa Mosyon anba lao poudir pep Seselwa fer zot krwar ki la nou'n anvi al marse lo zil, nou'n anvi al fer parti lo zil.

Mr Speaker nou'n koz lo lagrikiltir, lagrikiltir si isi nou pe ganny difikilte nou kapab trouv en lot opsyon. Annou regarde si i annan en lot opsyon. Akoz i annan tou kalite plan ki'n ganny fer lo sa bann zil. Me nou pa pe vwar kwa ki mannyer Seselwa i benefisy. Si ozordi nou dir be nou, nou pou form en Komite pou nou al regarde ki Gouvernman pe promet, pou nou regarde si Seselwa pou vreman benefisy zot pa kapab pran lakoler, akoz zot en kantite letan zot pe manage zil!

Zot in tir zil anba Gouvernman in anvoy li anba

entity zot ki'n nou'n erit sa avek zot Mr Speaker, ozordi nou pe al gete ki mannyer sa zafer i marse lo nou kote nou pa pe les Gouvernman li tousel fer desizyon.

Si en move desizyon, nou ava regarde si en bon desizyon nou ava gete ki mannyer nou kapab fer li mars pli byen. Me solman pa vin dir nou ki sa komite i napa son lenportans.

MR SPEAKER

15 minit Onorab.

HON FLORY LARUE

Mersi Mr Speaker. Mr Speaker mon ti ava kontan montre ki annan en gran lenportans sa komite, pou nou travay avek Egzekitiv akoz nou, nou pran lord avek Egzekitiv nou diskite nou anmenn pwennvi Seselwa devan.

Mr Speaker ek sa detrwa mo ki mon'n dir mon ti ava kontan anmenn mon siper pou sa Mosyon ki Onorab Adelaide in anmennen, e mon demann tou Manm pou vot pour akoz sa i pou ede pou nou anbelir tou sa ki nou Seselwa pe demande ozordi. Mersi.

(APPLAUSE)

MR SPEAKER

Mersi Onorab Ernesta.

HON PAUL ERNESTA

Mersi Mr Speaker. Mon rekonnet ki'n ariv midi e mon dir en bonn apre midi Speaker nou bann koleg Onorab e tou dimoun a lekout.

E an menm tan Mr Speaker mon pa espekte long lo mon lenthervansyon, akoz mon rekonnet ki bokou sirtou lo nou kote latab in ganny dir. I annan de diferan lopinyon ki pe ganny avanse i annan bann diferan konsern ki pe ganny dir, me an menm tan Mr Speaker ed mon pou mon kapab pou mon osi anmenn mon kontribisyon lo Mosyon ki'n ganny anmennen, ki dayer mon ava admet i pa pou enn ki neseserman diferan avek mon bann koleg lo kote latab avek mWAn.

Entervenan, ki'n koze avan mon in fer resorti si ou le annefe mon ti krwar nou dan en kanpanny elekson kot bokou bann pwen dan Manifesto i ganny koz lo la. E ki dayer e mwan mon rekonnet ki sa manifesto li menm avek sa ki zot ti koz lo la i petet mon krwar zot ti pe koz lo en Manifesto *fake*.

Letan mon dir i *fake*, kot bokou keksoz zot ti dir zot pou fer lavi Seselwa pli meyer. Sa ki zot in dir dan sa bann

manifesto mon pa krwar Seselwa in vwar sa enn.

Ozordi i annan en Manifesto ki pe ganny aplike se ki lavi Seselwa i pli dan problemm s oule nou kapab dir in pli deteryore kot zot ti pe dir zot pou revwar lekonomi pou met plis larzan dan pos Seselwa.

Me ozordi nou vwar plis larzan i ganny tire dan pos Seselwa. A sak moman sa Gouvernman pa mank loportinite pou li tir larzan dan pos Seselwa e o kontrer i met plis larzan dan sa pti group elit ki la zis pou kontrol lavi Seselwa.

Mr Speaker, i annan en lot entervenan ki'n koz osi ki'n dir ki letan nou koze nou koz plis lo negativite. Mon pa konpran letan nou kritik en keksoz swa letan nou fer sorti en konsern, nou ganny dir ki nou'n pri dan negativite.

O kontrer zot ti sipoze annan en pli gran lespri parey in ganny dir pli boner zot dan en pli gro group. Zot pa kapab les sa pri group swa rezerv pa kapab les sa pti group pran kontrol lo zot. Zot bezwen aksepte kritik e se sa lafason ki zot pou kapab bouz devan.

E si zot pa pe aksepte kritik e sak fwa nou lo kote latab nou koze zot anpes nou

koze, e napa ki kalite aksyon ki ganny pran avek nou kot nou ganny dir nou ganny nou bezwen forse montre nou protestasyon par nou *walkout* apre nou ganny dir nou zis *walkout*.

Sa *walk out* Mr Speaker, bokou fwa i zis par montre nou protestasyon lo lafason ki keksoz pe ganny mal aplike dan sa Lasamble. E en keksoz ki'n Onorab dan son prezantasyon in fer resorti ki mon pou dakor avek en keksoz ki li menm li in rekonnet dan son bann lentervansyon, in rekonnet ki son Gouvernman pe *fail*. Sa i en konsern akoz zot ti dir ek sa pep zot pou delivre.

Me ozordi nou vvar zot pe *fail* zot ti krwar zot pou an tre dan en soulye 43an ki bokou pli gran ki zot, zot pou delivre e zot pou kapab anmenn sa soulye.

Mr Speaker i remarke an menm tan letan mon pe dir sa ki zot Prezidan menm ti dir ki sa zafer i lour. I ti dir ki lanmans pwalon i so. Be en *advise* ki nou kapab dir, be si zafer i lour, Onorab in dir *Airport* in ouver lekonomi in sanze sityasyon in sanze, avyon i pase, bato i pase *pack and go*.

(laughter)

HON PAUL ERNESTA

Mon krwar si dan sa zafer dan lakwizin pa tou dimoun ki kapab antre ladan. Akoz sa lasaler i so pou zot. Zot bezwen sey fer fason sorti parey mon'n dir ale donn lespas pou dimoun kapab travay Mr Speaker sa ki anvi travay parey nou. Nou ti pe travay.

E parey nou'n dir nou'n pran 43an nou'n anmenn sa pei ozordi kot i ete. E zot pa pou kapab fer pli byen ki sa. Zot annan en gran soulye pou zot *deal* ladan pou zot antre ladan Mr Speaker.

E Onorab in osi dan son Mosyon i pe demann nou pou nou kapab anmenn sa soutyen pou son Gouvernman kapab travay e pou son Gouvernman kapab delivre Mr Speaker.

Me sa Mr Speaker e zot, zot an mazorite zot bezwen kapab pa zis parey taler in ganny dir pa zis petet zot pou dir nou en po fler, pa zis vin sa po fler. Me ozordi nou vvar zot, zot sa plak ki anba sa po fler, sa i danzere kantmenm zot an mazorite.

Zot bezwen sanz sa Mr Speaker. *Mover* Mosyon osi in koz lo *IDC*. Yer zot ti anmenn en latak asarnen lo *IDC*. E zot dir la ozordi zot bezwen anmenn sa travay pou al gete ki *IDC* pe fer egalman parey entervenan avan mon in koze. Pou al gete

ki IDC pe fer pou zot anmenn sa travay.

Me ozordi sa zafer la al State House laba akoz State House, ki pe dir ozordi IDC saviour. Tou keksoz i parfe laba e nou'n vwar zot menm zot akoz zot pa dir be son kontra in fini annou fer li ale akoz zot pa ti dir sa.

Si keksoz pa bon. Yer pa ti bon. Ozordi i bon? I bann keksoz kot nou bezwen arete sa bann lipokrizi Mr Speaker. E sa en keksoz mon krwar mon pa konnen kote si in anzandre dan zot sistenm, toulstan zot viv lo zis sa mansonz zot fer krwar lepep i tou keksoz i byen.

MR SPEAKER

Onorab ou'n konmans servi mansonz la ankor.

HON PAUL ERNESTA

Ok Mr Speaker mon ava plito dir zot fer lekonomi laverite. Petet i ava akseptab Mr Speaker non?

MR SPEAKER

Swazir ou mo, e mon pe dir ou evite akiz bann Manm lot kote latab.

HON PAUL ERNESTA

Ok Mr Speaker mon ava plito dir ok annou ozordi nou vwar en Gouvernman ki plito

avek son bann Onorab ki plito fer lekonomi laverite. Zot pa koz mansonz Mr Speaker.

E mwan mon konsernen letan mon vwar plis komite sa ki Onorab pe demann nou ozordi pou fer plis Komite.

Mon konsernen akoz se ki mon vwar swa mon tante poudir i pa vin koman en rezon pou nou sov sa pep ki'n met nou la pou nou pa fer fas avek zot, kot nou fer nou pri dan travay komite pou nou kapab donn leskiz pou dir akoz nou pa kapab al vwar nou pep. Ki dayer letan ti eleksyon zot ti monte desann pou demann sa pep sa sipor ozordi kot letan sa pep i bezwen zot sipor zot vir ledo lo sa pep Mr Speaker.

Sa mon konsernen ki sa i pa arive akoz nou konnen. Onorab in dir taler in donn en lalis bann komite ki annan. E ki nou pe fer, nou pe plito vwar nou pe azout plis komite ankor. Letan nou azout plis komite ankor i pran plis letan travay e letan ki nou annan pou nou distrik pou nou dimoun nou napa Mr Speaker.

E dan sa konteks ki mwan ki parey mon bann koleg in deza dir pli boner, mon pa pou kapab lev mon lanmen pou siport sa akoz nou bezwen ed nou bann dimoun e nou bezwen

get plis nou bann dimoun Mr Speaker.

E si zot, zot anvi fer plis komite parey in ganny dir pli boner, pou zot ganny plis larzan negliz zot bann dimoun e nou bann dimoun zot, zot pe tir plis larzan avek zot, zot pa pe gannyen sa dimoun pe ganny difikilte demen bomaten toulezour pou li fer de bout zwenn e zot, zot benefisyé avek plis travay komite Mr Speaker, mon pa pare pou lev mon lanmen an siper sa Komite - an siper sa Mosyon.

E zisteman apard mon aksyon i montre mon solidarite avek Lepep Sesselwa ki pe soufer la deor. Avek sa de pti mo Mr Speaker mon dir ou mersi.

(APPLAUSE)

MR SPEAKER

Mersi.

MR SPEAKER

Mersi Onorab Ernesta. Mon'n ariv aepre a lafen bann Manm ki'n lev lanmen lo premye *round*. Wi *un instant* eksepte Onorab Lemiel e Onorab Pillay. Mon annan plizyer Manm ki pou koze ankor. Alors sa ki mon pe propoze si Onorab Pillay i anvi se ki mon ava pas lezot Manm apre mon ava rezerv sa de

Leaders lasal parey in annan koutim dan sa Lasanble ki'n deza arive e nou ava termin deba avek Onorab Pillay Onorab Arissol zot in lev lanmen ok?

Mon aprezan kontinyen avek bann Manm mon ava pran Onorab Loizeau.

HON NORBERT LOIZEAU

Ok mersi. Mersi Mr Speaker. Bonzour tou Manm. Bonzour tou dimoun a lekout. Mr Speaker mon pou konmans lo sa Mosyon an ki tan kot Onorab Flory Larue in kite.

An Oktob le 24 Oktob 2020, 1er *LDS* ti rantre dan Gouvernman, nou ti rantre dan en moman difisil Mr Speaker. Kot *COVID* ti pe tap nou for. E pei ti an boulvers.

E kot bokou lapriyer ti bezwen ganny fer Mr Speaker. E i annan pe dir ki lanmans pwalon ti so. Wi Mr Speaker, sa moman difisil ler nou ti rantre nou ti trouve akoz lanmans pwalon ti so, akoz i ti annan sa lasaler dan lakwizin. Se ki sa bann dimoun ki ti pe *run* sa landrwa ti'n pran tou. Menm *extractor fan* pou tir lasaler dan *kitchen* ti napa! Sanmenm sa ki ti pe anvoy sa lasaler Mr Speaker deor.

E nou ler nou'n rantre nou'n refer sa lakwizin Mr

Speaker. Nou'n fer li konvenab normal pou nenport ki dirizan. Nenport ki Prezidan. Si en zour i ariv *State House* i pou ganny lakwizin ki pro pe i pou kapab kwi enn bann pli meyer repa ki i kapab donn Lepep Seselwa.

Mr Speaker ozordi nou pou koz lo en Mosyon pou kree en Komite Sektoryel. Mr Speaker mwan mon pou sipor sa Mosyon mwan. Prezan ki mon pou siport sa Mosyon Mr Speaker Akoz dan nou Manifesto ki Onorab Ernesta pa tro kontan mwan mon annan enn mwan, mon Manifesto mon parti li ni en fe dan son manifesto i napa pou montre nou Mr Speaker, selman i pe koz lo Manifesto.

Mwan mon anvi dir avek Onorab Ernesta ek tou dimoun atraver ou Mr Speaker ki dan nou Manifesto lagrikiltir i en keksoz enportan ki nou'n koz lo la.

La, la si oule enn mon pou donn ou taler. Mr Speaker lo paz 21 i dir "*growing agriculture into a national enterprise*" i dan nou Manifesto sa.

E en Gouvernman ler i vin o pouvwar dan son konpanny i bezwen annan en Manifesto, e mwan ler mon ti al dan distrik mon ti partaze sa manifesto avek dimoun.

Alors i normal ki nou manifesto i ganny swiv dan Lasanble Nasional pou nou pou dimoun ki sa ki nou'n promet zot nou pe delivre atraver. I dir "*protect agriculture land. Rehabilitate our hillside and fores'tladan*" sa Mr Speaker. Zis pou donn en pe apre mon pou tourn lo Mosyon.

"Expend commercial visibility of crops and livestock use our outer island" Mr Speaker sa i detrwa keksoz bann paragraf si bann Manm lo kote US ti ava kontan gannyen pou zot lir pou pase, pou vvar ki nou konman LDS nou annan en plan zot kapab ganny prete. Mon poz la pou bann ki petet ti ava kontan krwar.

Akoz zot zanmen zot in travay lo zot Manifesto zot. Nou, nou pou kontinyen travay lo nou Manifesto.

Mr Speaker Mosyon in vin devan Lasanble alors i annan in sorti lo Mosyon i annan in koz lo fristrasyon, nou konplent.

Mr Speaker ki i annan si i mal ki nou konplent. Kwa ki fermal ek zot si nou konplent? Nou Gouvernman ki la, si nou Gouvernman i annan keksoz i pe fer mal nou pou konplent nou pa pou fer parey zot Mr Speaker. La i fer mon rapel lontan ozordi zot pe konplent lamars pa les zot rasanble.

Mr Speaker ler zot ti pe lager pour Lalwa *POA* pa ti Lasanble nou ti lo pikep pe lager difikilte pou nou gannyen. Zot ti vot kont sa Lalwa.

Onorab *Leader Lopozisyon* zot ti dan Lasanble Mr Speaker atraver ou, i ti lev son lanmen pou vot kont mon ti krwar son lanmans semiz pou sorti ansanm avek son kol pou ale mannyer i ti lev son lanmen. I fer dezyenm fwa mon dir sa dan Lasanble.

Ozordi zot pe gele zot pe konplent. Ozordi Mr Speaker lo Mosyon in ariv lo logmantasyon lapey. Pou fer krwar dimoun larzan pa ase, be lekel ki ti donn zot sa logmantasyon larzan mwan? Lekel ki ti lager pou sa bann dimoun ganny sa larzan. Nou ki ti lager, zot, zot konnen i zot ti dir pa donnen. Nou fou, kot pou gannyen?

La zot pe trouve kot pou gannyen dan moman difisil zot trouve i annan en gap selman ler ti annan Mr Speaker zot, zot ti konplent zot pa ti oule donnen. Pou *minimum range* monte pou *tax* par lao R8000 pa ganny tire, zot ti lager pou Trezyenm Mwan Saler selman zot, zot in mal enplimant li Mr Speaker.

Relax Onorab Loze mon ki pe koze pa ou'n koze ou? Sekirite sosyal Mr Speaker ti

R3200 nou ti dir fer monte. Ki en fason ler sa de dimoun aze ki dan en *household* ler zot ava met ansanm a fer zot R10,000 ti dir labwet pouri Mr Speaker.

Zot ti dir mon rapel e nou, nou'n lager. Ozordi zot, zot pe vin lager en lager fay Mr Speaker. E la ler mon lo komite Mr Speaker, nou, nou anvi form sa Komite enn nou anvi akonpanny nou Gouvernman. Pa i byen Mr Speaker mon vwar ou *nod*? Nou bezwen akonpanny nou Gouvernman Mr Speaker.

Nou, nou pa kapab asize les nou Gouvernman tonm dan rigol parey ozordi zot in tonbe, i annan zis 10 zot Mr Speaker mon pa anvi ariv sa. Mon'n deza ganny en tim 11 mon dan Lasanble. Nou'n monte nou'n ariv nou pa anvi tonm ankor.

Se pou sa Mr Speaker, ki nou, nou anvi akonpanny nou Gouvernman. Ed li pou nou kapab ganny 4 larou nef pou nou met lo sa kales kase ki zot ti kite. Prezidan ki ti dir li ki'n vwar ler ti arive. Nou'n erit en kales kase.

Nou bezwen akonpanny li pou nou aranze Mr Speaker. Me ki nou ti vwar Mr Speaker, ler nou pe koz lo komite, e pou lenformasyon piblik Mr Speaker mon anvi dir zot pa ankor fini ekout deba zot in sot lo en

konklizyon konmkwa zot in ganny larzan. Sa komite napa larzan ganny peye. Se akoz napa larzan ki zot, zot pe konplent sa komite Mr Speaker. Akoz zot, zot le larzan.

MR SPEAKER

Stop Onorab.

HON NORBERT LOIZEAU

Mon'n dir zot.

MR SPEAKER

Retract.

HON NORBERT LOIZEAU

Wi Mr Speaker pa zot.

MR SPEAKER

Retract.

HON NORBERT LOIZEAU

I annan sertennman i le sa larzan Mr Speaker. Mr Speaker be i annan Manm dan Lasanble i annan nanm.

MR SPEAKER

Stop Onorab. Mon'n dir ou evite sa.

HON NORBERT LOIZEAU

Ok napa problem.

MR SPEAKER

Zis blyie, go ahead avek ou speech.

HON NORBERT LOIZEAU

Wi Mr Speaker, i fer mon rapel dan letan *COVID*, Onorab William a bonnfwia ki ti lo kote latab sa kote laba sa letan, ti fer propozisyon pou kree en Komite *COVID*. Sa Mr Speaker ti pou ede dan sa moman difisil pou nou vvar mannyer bann defans i ete. Ti dir non.

Mr Speaker Lasanble ti ganny dizourd, mon rapel sa byen menm, kot apre R1.4 bilyon ti ganny partaze avek dalon.

Mr Speaker saler-man zot pa ti mazin sa bann ki ti fay kote ki ti pe ganny en pti gin larzan Speaker. Zot ti mazin bann ki ti anler laba ki pa ti bezwen sa, bann ki ti byen konekte. Se sa ki ti arive. Me si nou ti fer sa komite ki Onorab William ti propoze nou ti pou kapab vvar sa bann keksoz.

Mr Speaker ou vvar lenportans bann komite nou konman bann Manm nou'n al lo teren pou ganny elekte nou, be akoz nou pa kapab partisip dan lavi nou Gouvernman vi ki nou trwazyenm brans Egzekitiv. Be i normal ki nou partisipe. Nou dir akoz nou'n al lo teren anba sa menm Manifesto ki la nou, ki Gouvernman pe travay lo la.

E nou Mr Speaker, nou bezwen konpran nou, nou annan komite. Mr Speaker be

sa lannen ki nou gannyen lo komite dimoun ki dir en ta larzan i ganny R2000. I en larzan solman Mr Speaker.

Mwan si pa ti donnent mon ti pou *ok* avek. Akoz mon'n deza dir dan katriyenm Lasanble ler nou ti pe ganny difikilte pou ganny Manm sa letan *SNP*, menm si napa en lapey mon pou vini akoz mon anvi travay pou mon pei. E mon ti reste pou R8000 malgre i ti fay. Mon ti kit mon travay ki mon ti pe ganny bokou plis mon ti vini pou R8000, akoz mon ti anvi vvar sa Sesel kot nou ete ozordi. Mon ti anvi vvar sa sanzman.

E pou mwan larzan Mr Speaker si pa ti en problem. Mon ti viv, mon ti ganny en pe isi laba. Ennler Onorab Arissol ti vini frer i annan en bout pwason la mon'n anmenn pou. Mon osi mon annan en pti *deal*, nou ti *struggle* nou de sa boug ki laba nou de Onorab nou. Nou ti ganny *peanuts*.

E Mr Speaker e dan letan avan zot, pou zot ti *Board*. mon pa konnen ki kalite *Board* mwan. Si formayka si - e *Board* ti peye Mr Speaker!

Mr Speaker sa ki nou pe gannyen lo en komite lo en *Board* sa letan zot ti pe ganny 4-5 fwa plis. Pli ba ti 8000, pli o ti dan 18,000. E nou, nou ti

lager pou kas sa bann *Board*. Pou redwir en pe Mr Speaker.

E ler nou koz komite, i annan ki ti dan Gouvernman, i dir nou pe rod larzan. Kan al gete Mr Speaker posibileman i annan ki ti detrwa *Board*, sa letan.

Mr Speaker, ler nou pe koz lo sa Komite Sektoryel ki Onorab Adelaide pe koz lo la Mr Speaker, i fer mwan mazinen be si nou ti annan tou si zot lo lot kote latab zot ti annan sa sirveyans atraver bann Komite dan Lasanble pa *Board*, Mr Speaker be sa ta gaspiyaz labi ki ti pou arive lo nou bann zil dan bann letan *prawn projects* mon asire ou pa ti pou arive Mr Speaker.

Si zot, zot pa ti *cool rubberstamp* parey zot pe dir nou *rubberstamp*, ti pou napa sa bann labi lo zil, kot ozordi basen kanmaron in vin basen moustik Mr Speaker. Tou keksoz in tonm an rin ozordi. Dan letan pase, Mr Speaker si ti annan sa bann komite ki ti pe sirvey Gouvernman, parey en Komite pou sirvey bann later.

Ozordi ti pou napa *case Ankour*. Kot i annan in pran detrwa pti bout i annan in pran isi.,

La nou tande *IEA* i annan en dimoun i annan 10 bout. Mr Speaker be i fer lapenn. Si nou

sa in arriv anba zot sa Mr Speaker aprezan ler nou dan LDS nou vini nou vwar. Nou'n dekouver e nou pe ganny. E prezan nou bezwen travay mannyer pou nou kapab *deal* ek sa. Nou ti pou kapab anpese ki nou zil Sainte Anne i ganny vann pou R1.

(APPLAUSE)

HON NORBERT LOIZEAU

Mr Speaker ozordi Sainte Anne i pou nou. *Club Med* selman ti pe pey en lot dimoun sepa konbyen pou *lease*. Nou Sesel ki nou gannyen?

Be si nou ti fer li nou menm, be tou sa larzan pa ti ava vin pou nou ? Mr Speaker tousala in ganny fer pou anrisi en lanpir. Prezan nou vin koz lo Seselwa laba ater. Nou ti annan larzan pou donn Seselwa Mr Speaker. Larzan in mal ganny partaze. Prezan sanmenm sa ki ou trouve ki Seselwa i annan i en pti pe mwen fortinen ki lezot. Akoz larises nou pei in mal ganny partaze.

Le fame 50 milyon mon pa pou al lo la Mr Speaker mon ava kit li ater. Zis pou sey fer pep Seselwa konnen ki kantite larzan ti ava annan pou nou kapab ofer ogmantasyon.

MR SPEAKER

15 minit Onorab.

HON NORBERT LOIZEAU

Wi Mr Speaker mon pou al fini. Mr Speaker nou'n koz lo lenerzi renouvlab. Be si ti annan bann mekaniz ki ti pe swiv sa bann proze, ozordi petet nou ti pou lwen. Onorab Vidot in koz lo lelis, Vis-Prezidan ti dir akfer ... zafer.

Mr Speaker be Vis-Prezidan ti annan rezon *CEO Energy Commission* ti vin la devan Lasamble en zour, ler mon ti demann li kestyon mon repet ankor dezyenm fwa, mon ti repeete lotrozour, i ti dir pa fezab pou rantre ladan akoz nou napa divan i pa fezab.

Zis en bann proze ki'n ganny gate. Mon pa konnen sa bann larzan ki'n donnen pou fer sa bann proze kot in ale Mr Speaker.

E lagrikiltir Mr Speaker, lagrikiltir i en keksoz enportan avek en Komite Lagrikiltir Sektoryel nou pou kapab konnen ki pe arive lo later lagrikiltir. Nou pa pou kapab vwar en lotel fer lo en later lagrikiltir Amitie Praslin. Kot apre en boug i konplent loder koson loder poul. Si ti annan tousala, pa ti pou arive sa.

Later lagrikiltir ti pou lagrikiltir. Pa msye sepa lekel

in fer lotel apre pou li konplent loder malpropte koson sepa ki zafer, lisyen i zape Mr Speaker ti annan en landrwa pou zot kapab al fer sa. Le problem ler zot ti an mazorite zot pa'n swiv zot Gouvernman. Zot in plifere asize les keksoz pase, aprezan ler zot Lopozisyon Mr Speaker zot pran en patant zis zot konplent, pou fer dimoun krwar ki tou keksoz i mal.

Mr Speaker se sa ki pe arive. E mwan an terminan Mr Speaker mon konnen mon'n pran en pe letan, mon anvi dir avek lepep Seselwa e dimoun dan mon distrik sa Komite i byen. Napa nanryen konsernan larzan ki pou al donne. Mon si pou nanryen i pou nanryen Mr Speaker met mwan lo la. Akoz mwan mon kontan larzan mon pa *araze* larzan. Eskiz mwan mon parol Mr Speaker.

Alors mon pou siport Onorab Adelaide dan son demars, akoz mon santi ki nou konman en *Caucus* nou pe *follow direktiv* ki nou'n al lo la konman en parti politik dan eleksyon, pou nou akonpanny nou Gouvernman, met li drwat.

E si kot fodre dir nou pou dir Mr Speaker. Akoz mwan zot konn tre byen mwan mon dir. Mon ti dir lot fwa. Bann Minis annou serye. Nou ki ti al lo teren, ekout nou ler nou koze.

Pran nou serye e mon ti dir. Akoz Mr Speaker ler mon vwar en pti bes-man lo kote nou Minis pa pe soz, mon dir pou zot leve, mon pa fer parey zot.

Mr Speaker mon pou termin la mon dir ou mersi. E mon anvi dir avek Onorab Adelaide mon pou siport son Mosyon akoz sa Mosyon i en bon Mosyon e i pou benefis nou Lasanble e pei an antye. Mersi Mr Speaker.

(APPLAUSE)

MR SPEAKER

Mersi Onorab. Bon nou ava pran poz la e nou ava kontinyen deba apre midi 2er. Mersi.

(BREAK)

MR SPEAKER

Bonn apre midi tou dimoun Manm e piblik. Nou ava kontinyen avek deba. Mon ava apel Onorab Sylvanne Lemiel.

HON SYLVANNE LEMIEL

Mersi Mr Speaker. Bonn apre midi tou dimoun. Mr Speaker mon lentervansyon lo sa Mosyon li menm i plizoumwen mwen kestyon ki mon ti ava kontan loter Mosyon, i sey ed mwan pou

donn mwan en larepons letan i fer son *summing-up*.

Nou konnen ki *Standing Orders* i permet Lasanble li menm kree diferan Komite. Mosyon ki pe ganny anmennen devan nou ozordi i pe demande pou kree en Komite Sektoryel pou *deal* avek serten Departman.

Bomaten mon'n prezant en rapor Mr Speaker konman *Chairperson COGA*, e nou konnen poudir dan Lasanble *the oversight role* li menm par egzant COGA nou fer li lo kote lasirans ki'n vin donnen isi dan sa *Chamber*.

Mon pou pran en legzant nou annan Minis Flavien Joubert, in vin reponn en kantite kestyon, in vin fer *Statement*, sirtou sa komite pe demande pou kree loter Mosyon pe demande pou kree sa komite lo kote lagrikiltir, lanvironnman lenerzi renouvlab, sanzman klima tousala i tonm anba Minis Flavien Joubert ki mon'n pran li konman en legzant.

Tou sa bann lasirans ki'n vin donnen isi dan sa Lasanble mon oule konpar li avek par egzant loter Mosyon mon ti pou kontan konnen ki kalite *oversight*, akoz loter Mosyon in *stress* lo zot pou annan en rol *oversight*.

Petet mon ti ava kontan loter Mosyon ler ou reponn sa *oversight* li menm i eski ou osi sa komite ki zot pe mazin vin avek i pou fer *oversight* depi en pe travay ki COGA li menm pe fer, or mon ti ava kontan ganny en pe plis lesplikasyon ki kalite *oversight* ki zot pe mazinen ki sa Komite Sektoryel pou fer.

Akoz i pa pou byen ki nou annan de komite ki pe fer preski menm keksoz. Nou pa vin mars lo lipye kanmarad la.

Nou pe sey travay pou anbelir. Me pa pou vin fer menm keksoz. Akoz premyerman enn nou bezwen get resours Lasanble li menm. Lasanble li menm i napa resours, i napa ase dimoun pou met lo bann komite sirtou bann sekreter ki pou travay avek nou bann komite. Nou pe kree ankor en lot komite, me nou bezwen get resours li menm. Akoz bomaten nou'n tann dir get byen sa komite, donn sa komite resours. Ki li menm li Lasanble i napa sa resours. E ler nou pe regard travay ki nou konman COGA nou pe fer, e distenksyon mon ti ava kontan konnen, egzakteman ki mannyer i pou ete ant COGA ek sa Komite Sektoryel?

Apre sa mon pe mazinen osi ki bann kalite swivi petet loter Mosyon ti ava dir mwan, ki

bann kalite swivi ki li i pe mazinen or ki kalite travay depre ki parey in vin dir nou, ki sa komite pou pe fer avek sa bann Departman e ki lasirans petet nou pe mazinen ki sa bann komite pou pe pran bann nide Lasanble Nasyonal, pou zot enplimante?

Ki pouvwar ki nou pou annan lo sa bann departman ki sa komite pou annan lo sa bann Departman pou fer sir ki petet i pran nide or serten keksoz ki konman sa Komite Sektoryel zot pe dir li petet ti ava bon pou fer sa or mon pa konnen ki mannyer zot diskisyon i ete ki kwa ki nou petet nou pe mazinen al dir sa bann Departman ki pou fer?

Akoz ozordi parey dernyen fwa mon ti fer resorti Mr Speaker, nou pe ganny pa mal kontrent pa mal difikilte avek serten bann Minister, ki ozordi i en plezir pou mon dir ki apre ki nou'n fer sorti sa defi ki nou ti pe gannyen avek sa bann Minister ki nou'n vvar lo kote *Government Assurance Committee* ki nou vvar bann larepons lo bann let pe rantre. E mon krwar in annan sa pti *push* ki'n kapab dir sa bann Minis sa bann Minister anvoy zot bann larepons pou nou kapab fer sir i nou annan sa bon swivi.

Me par kont ler sa komite li menm i ganny etabli, mon zis espere ki i pa vin en lot sa kalite problemm kot petet nou pou bezwen lentervansyon kot pou dir be dir zot *provide* plis lenformasyon, oubyen annou zwenn oubyen ou pa'n pran mon nide ki mwan mon'n donn ou.

So se sa ki mwan mon ti pe dir mon ti pou kontan ki loter Mosyon li menm i donn mwan e mon krwar bokou dimoun deor osi parey pe ganny dir nou pe ganny dir zafer pou form komite form komite.

Me dimoun an deor i ti pou byen, si nou fer zot konnen aktyelman sa enn komite ki nou pe formen wi i enportan e son rol pou tel, tel, tel. Ki kalite travay ki mwan mon pou fer avek tel, tel, tel Departman par egzanp lagrikiltir, dan ki fason mon pou entervenir avek lagrikiltir. Akoz ozordi i annan bokou problemm lo kote lagrikiltir ki fason ki nou lo kote sa komite nou pe mazin travay avek sa Departman Lagrikiltir ki zot pou ekout nou, sa ki komite pou dir zot pou zot kapab amelyor serten keksoz or serten problemm ki pe pase lo kote lagrikiltir.

Lanvironnman osi i annan pou li. Kwa ki nou krwar petet nou , nou pou kapab anmennen

an plis, ki sa Departman sa Minister li menm i pou ale i pou ekout nou. Zil nou dir sa komite i pou form pou zil osi, kwa ki nou, nou santi akoz ti annan en Komite Zil avan, nou'n ale nou'n fer bann diferan vizit, nou'n fer bann rapor men si mon pa'n tro ankor tande ki'n pase dan sa bann rapor Komite Zil avan, sa i lepase.

Me selman nou pou bezwen fer sir *as from now on* si nou annan sa bann komite li menm i pe vreman ban Komite ki morde i pe vreman bann komite ki pe vreman anmenn sa *push* ki parey loter Mosyon in vin dir i ti ava kontan pe vwar amelyorasyon sirtou dan son Gouvernman, akoz zot in fer sorti ki sa i zot Gouvernman zot ki'n anvi fer sa komite pou zot travay konzwent fer sir ki zot Gouvernman i akonpli sa k i dan zot Manifesto, sa in ganny sorti tre, tre kler.

So alors Mr Speaker mwan mon pa pou al dan sa bann gran, gran detay mwan mon oule zis plis leksplikasyon avek loter Mosyon lo ki fason sa komite pou fonksyonnen pou fer sir ki i pa pe fer menm travay avek *Government Assurance Committee* i pa pe fer menm travay avek *FPAC*, ki li kalite travay ki pe fer ki pou diferan ek pou nou.

Oubyen ki bann kalite travay ki pe mazinen fer mon pa konnen si i pou annan konmsi en pti pe lo kote son *terms of reference*, wi sa i pou vin apre me selman i ti pou bon la letan nou pe diskit sa Mosyon nou konn en pti pe plis detay lo kwa ki zot, zot pou fer diferaman avek sa ki nou sirtou lo kote *Coga* nou pe fer.

So Mr Speaker mon pa pou tard plis mon ava dir ou mersi.

MR SPEAKER

Mersi Onorab. Onorab Naddy Zialor

HON NADDY ZIALOR

Mersi Mr Speaker. Bonn apre midi Mr Speaker, tou koleg Lasanble e bonn apre midi Lepep Seselwa. Mon ti a kontan pran laparol apre midi dan tou limite.

An menm tan mon ti a voudre fer resorti ki mon pa ti pe neseserman antisipe pou mon aport kontribisyon vizavi sa Mosyon.

Me depi bomaten mon'n asize trankilman e fer ser ten analiz lo bann diferan largiman ki'n ganny met devan nou Lasanble depi bomaten ziske 2er 14 apre midi.

Mr Speaker mon ti a kontan fer resorti 3 pwen. E

mon ti a kontan osi dir ki mon pa pou long, me solman mon'n fer serten refleksyon profon sa pti moman la ki nou'n komans koz lo en Mosyon.

E remarkab ki i annan 2 lopinyon diferan. Me sa ki enportan se lekel ant sa 2 lopinyon diferan ki realis?

E san tarde mon ti a kontan dir avek Onorab Adelaide, mon ti a kontan remersi ou pou anmenn en tel Mosyon, en tel Mosyon devan nou Lasanble, en tel Mosyon pou nou konsidere.

E la mon anvi adres serten konsern, serten pwen ki mon ti a kontan loter Mosyon i konsidere. Me an menm tan fer serten reeleksyon avek Lepep Seselwa. I annan bokou nou, nou anvi vin pli katolik ki Lepap. E nou sezi tou loportinite pou kontinyelman senm konfizyon dan lespri Lepep Seselwa. E la mon pa anvi ofans personn.

Me mon anvi dir avek nou isi dan sa Lasanble, annou vin en pti pe pli realis silvouple. E mon konpran petet pandan sa dernyen 20an e plis, akoz ki mwan parmi bann e plizyer Lepep Seselwa, pa'n neseserman konpran rol e responsabilite en Manm Lasanble Nasyonal.

Senpleman parske in annan en group dimoun ki'n kontinyelman menm konfiz zot vizavi nou rol koman bann Manm.

E la mon anvi adres loter Mosyon avek serten kestyon vizavi sa refleksyon. Eski letan en komite i ganny kree dan Lasanble Nasyonal, eski sa i vedir ki nou bann Manm nou pa pe travay?

Eski letan nou ganny apele oubyen ler bann komite i ganny kree, eski sa i pa en brans Lasanble Nasyonal ki form parti nou travay anba nou bann responsabilite?

Eski letan nou, nou dir avek nou pep ki plis travay pe ganny mete lo nou e nou pa pou fer nou louvraz koman en manm Lasanble Nasyonal, eski nou louvraz se senpleman zis al lo teren? Eski nou louvraz i pa osi konpri e konplimant reprezant nou pep e pas Lezislatif e kestyonn nou Gouvernman?

Me diferans ki i annan ozordi, e la mon pe koz mon leksperyans personnel. Pou napa personn ki pou kriy ou dan Biro PS letan ki lo ou *profile picture* in mark Wavel 2020 pou kestyonn ou oubyen pou viktimiz ou Mr Speaker.

Diferans avek Gouvernman ozordi, se ki nou

ki an mazorite, nou pa pran desizyon *State House*, me nou pran desizyon isi dan sa *Caucus* e isi dan sa Lasanble.

E wi mon annan sa laliberte, nou annan sa laliberte pou nou kestyonn nou Gouvernman ek nou Prezidan.

E se pou sa rezon, se pou sa rezon ki mwan mon krwar e fortman krwar ki se *LDS* ki'n donn nou 25 manm dan sa Lasanble, pou ki *LDS* i kapab kestyonn sa *LDS* ki *State House* Mr Speaker. E se pou sa rezon ki fodre zot konpran en keksoz. Nou pa kapab *boycott* soley ler i leve e *boycott* soley ler i kouse Mr Speaker.

Nou pa kapab *boycott* akoz lapli pe tonbe e ozordi *boycott* akoz i annan zetwal. Sa i naturel, zis parey le 24 Oktob, le 25 Oktob 2020 Seselwa ti pran en desizyon pou donn *LDS* en mazorite.

E ozordi, nou apresye, mwan mon apresye. Letan mon tann mon bann koleg dan Lopozisyon pe kritike, nou pa anpes zot kritike. Me diferans ki nou, nou anvi se vin avek bann rekomandasyon, pou ki sa kritik i vreman avans nou Lasanble devan.

Be bomaten mon sagren, akoz sa bann Manm Lasanble Nasyonal ki pe ede pou, parey Mr Speaker in dir, pou abes nou

prop Lasanble. Mwan ozordi mon *form* parti sa Lasanble.

Mon anvi vvar en Lasanble, en Setyenm Lasanble ki nivo i pli o ki Sizyem Lasanble.

So wi, lagrikiltir pou plizer lannen in ganny koz lo la, me an memm tan lefe i reste ki in ganny neglize. Letan sa fermye Baie Lazare.

Letan sa dimoun ki fer elevaz zannimo Pti Barbarons, letan sa biznes Grand Anse i koz avek nou vizavi zot bann difikilte ki zot in pas ladan pou plizer lannen, i nou rol koman Lasanble Nasyonal pou kree serten mekanizm, pou ki zot osi zot ganny reprezante Mr Speaker.

E la mon anvi adres loter Mosyon. Petet ou ava tous sa dan ou *Right of Reply*. Letan nou pe ede koman en Lasanble ki dayer in ganny elekte pou reprezant lepep, letan ki nou pe pou serten azanda avek Gouvernman vizavi sa komite pou ogmant nou sekirite alimanter, pou kree lespas pou nou bann fermye, eski sa i pa pe ede pou fer redwir pri lavi?

Letan ki nou'n koz lo lenerzi renouvlab, mon apresye ki nou'n koz lo bann diferan proze ki'n annan dan lepase e ki pe kontinyen.

Me letan ou annan en komite dan Lasanble ki pe desarz son responsabilite koman *oversight* e pe regarde ki bann Polisi ki i annan an plas, ki bann mekanizm ki i annan, ki mannyer Bidze pe ganny depanse, eski sa i pa pou ede pou fer desann pri lavi? Annou aret, annou get en pti pe pli lwen ki nou bout nennen Mr Speaker.

Zil ; en ta parol in ganny dir lo zil, en ta lopinyon in ganny partaze lo zil, en ta politik in ganny fer lo bann zil e pou kontinyen ganny fer lo bann zil.

Me sa ki enportan ozordi, sa ki reste enportan se vizyon ki sa parti i annan pou Sesel e pou bann zil Sesel. Ou konnen, mannyer nou koze parfwa, konmsi zis Mahe, Praslin ek La Digue ki Sesel. Apre lezot zil sa konmsi bann pei aletranze.

Mon krwar mon retourn lo mon pwen prensipal, mon krwar nou bezwen konpran ki nou koman bann Manm Lasanble, i annan letan kot nou fer politik, politik bon marse, politik kritike. Me i annan letan osi kot nou bezwen pran en loportinite e elev.

Sa ki nou, nou anvi, se vvar bann zil ki kapab ganny devlope pou fer nou pei vin soutenab, pou ki bann

zenerasyon ki'n la, i partaz zot leksperyans pou bann zenerasyon lavenir.

Me pli enportan, pou ki nou aret donn lenpresyon, ki Lasanble i travay – (*anyway* sa i lenpresyon ki mwan mon'n santi) ki serten Manm i donn lenpresyon ki Lasanble son travay se zis dan Mardi ek dan Merkredi, e sel fason pou nou *scrutinize* Gouvernman se nou bezwen kriy li la lo *live television* pou demann kestyion oubyen pou met en Mosyon.

Mr Speaker nou rol koman Manm Lasanble i al pli lwen ki sa! E fodre pa, fodre pa ki nou kontinyen avek sa kalite politik konfizyon e kontinyen fer krwar ek Seselwa ki zot in met en mazorite *LDS* dan Lasanble e sa mazorite pa pe ekout zot lawwa. Non Mr Speaker!

Rezondet ki nou pe vin avek bann tel mekanizm, bann tel komite se zisteman parske nou pe koup lawwa Lepep Seselwa. E si i annan Manm, (parske zot ki'n dir pa mwan)

si i annan Manm ki santi poudir zot pa anvi form parti a okenn komite ki pou ganny kree, zisteman, pou materyaliz sa bann vizyon ki dan Manifesto, e pou materyaliz tou sa bann keksoz ki zot pe dir pa'n ganny fer e pa pe ganny

fer, mwan personnelman mon napa problem ek sa.

Be solman osi lontan ki mon santi ki bann azanda ki pe ganny pouse i dan lentere Lepep Seselwa, i dan lentere pei, Mr Speaker mon pou kontinyen donn tou mon sipor! Mersi.

MR SPEAKER

Mersi Onorab Zialor. Lo sa kote la mon ti annan Onorab Naidu avek Onorab Labrosse, korek? Ok, Onorab Naidu.

HON SATHYA NAIDU

Mersi Mr Speaker. Bonn apre midi Mr Speaker. Bonn apre midi tou koleg Onorab. Parey mon koleg Onorab Zialor ti'n fer resorti, mwan osi mon pa ti'n annan en gran lentere pou dir ki ozordi mon ti pe al koz lo sa Mosyon.

Me solman mon ti pe al siport sa Mosyon. Akoz mon'n rekonnet lenportans ki en tel komite i kapab anmenn anver travay ki nou koman bann Manm Lasamble i annan pou fer.

Nou bezwen realize ki sa ki *COVID* in montre nou, e menm lemonn antye, se ki sekirite alimanter i en keksoz ki ekstrememan serye.

E dan ka Sessel nou ti'n war ki nou'n met en kantite

lanfaz zis lo touris, e ler nou Sekter *Tourism* ti'n *collapse*, ti annan Lagrikiltir avek Sekter Lapes.

E se sa ki ti pe vreman soutenir nou dan en moman ki ti ekstrememan difisil. E ozordi zour i fer apepre en pti gin par lao 17 mwan depi ler ki nou Gouvernman in vin o pouvwar.

E byensir nou annan nou Minister relevan ki pe adres sa bann size ki komite pou abord lo la. Me selman i annan en pe defayans. *There is room for improvement.*

E fodre ki nou kapab rekonnet sa, e en komite i la pou fer en rol *oversight*. Se sa nou rol dan Lasamble. E pa lekontrer, e fodre ki nou rekonnet sa.

E i enportan ki bann endividé ki pou vin lo sa Komite i annan konesans, i annan leksperyans dan sa sekter, dan sa domenn, pou kapab fer sir ki zot kapab deservi zot responsabilite, dan en fason ki byen.

E mon konnen ki loter Mosyon, annefe son distrik Baie Lazare i annan en poursantaz kot i annan en kominote ase enorm, an se ki konsern bann fermye e bann peser.

E byensir zot in bezwen soumet zot konsern a plizyer repriz, poudir keksoz pa pe

marse parey zot, zot ti a voudre i marse. E li i la pou abord sa bann problem.

E byensir reprezent zot atraver sa komite. E mon garanti ki pou annan lezot Manm osi ki pou annan zot zabitan ki vreman annan en lentre, e ki pe vreman pouse pou fer sir ki zot konsern i ganny reprezante, i ganny avanse.

E alors sa komite, mon santi i la pou osi deservi son responsabilite dan sa fason. E nou bezwen rekonnet ki pou bann ki'n koz kont kreasyon sa Komite, mon demande, eski zot pa parey pou pran pwennvi bann peser, bann fermey a ker?

Wi, nou annan nou rol koman en reprezantan, nou kapab poz kestyon lo *Order Paper*. Me nou bezwen fer, nou bezwen rekonnet poudir ki nou zwenn dan en semenn, 2 fwa, 2 sitting.

E i annan 3 lezot zour kot i annan lezot travay ki nou koman bann Manm nou bezwen angaz nou ladan.

E ler i annan nou bann, koman bann Onorab, nou pe reprezent Lasanble dan bann diferan forum aletranze, tel ki *IPU, SADC* avek *ACP-EU*.

Byensir nou pe al dan diferan foronm, i annan diferan diskisyon. Me eski nou

santraliz tou sa bann diskisyon dan en sel landrwa, pou dir ki *this is how our stance*, e se koumsa ki nou pou avanse avek Legzekitiv pou fer sir ki zot delivre.

So ler nou annan en Komite kot nou annan tou sa bann *stakeholders* dan en sel landrwa, i pou permet nou pou annan diskisyon pou kapab lavans azanda ki nou koman bann reprezantan nou annan, e sa se pou reprezent laspirasyon sa pep ki laba deor, ki'n elekte nou pou met nou la anndan! E i annan en kantite size ki bezwen ganny aborde.

E wi, parey Onorab Adelaide in fer resorti, ti annan Lekol Lagrikiltir, referans ti'n ganny fer avek konstriksyon sa lekol. E i annan retar pou plizyer rezon. Me nou bezwen kapab konnen ki pe arive, ouswa ki alternativ ki nou pou annan pou kapab ankadre sa bann manrmay ki dan Lekol Lagrikiltir par lenstans.

Akoz nou bezwen kapab fer ouswa etablir bann mwayen neseser pou kapab garanti ki nou annan en lot zenerasyon bann fermey ki pe swiv.

Alors, ler nou pe koz lo kreasyon en komite, nou annan bann lentre, parey sa bann ki mon'n fek fer resorti aker.

E i enportan ki ler nou pe koz lo komite, nou fer nou mye pou koz lo sa size ki konsern kreasyon sa komite. Wi nou tou nou politisyen, mon dakor.

E sakenn de zot, zot annan zot lentere pou avanse. Napa nanryen mal ladan. Me selman fodre ki i annan laverite dan sa ki zot dir.

Pa sey konfiz sa pep parey mon koleg Onorab Zialor in fer resorti. Aret sey zwe avek vant sa pep laba deor.

Mon konsyan poudir ki i annan dimoun ki pe *struggle* laba deor, i pa fasil ditou. E nou, nou pou bezwen rod solisyon pou nou kapab adres pri lavi!

Ki mannyer eski nou kapab bes pri lavi? Sa i en size ki nou pou bezwen diskite. Pa ozordi neseserman. Me selman fodre ki nou kapab fer le neseser. Me zot dan Lopozisyon, ki mannyer eski zot a pe vreman ede?

Zot pa pe ede, zot pe senpleman kritike, zot pe sey diviz sa pep, zot pe sey vir sa pep kont nou bann reprezantan par bann keksoz ki sertern zot, zot dir e zot pa ni vreman konnen ki savedir rol en reprezantan.

Akoz zot pa'n vreman ganny, eskize, elekte par sa pep dan lepase! E lo sa size, se sa

ki mon annan pou dir, e mon pou aport tou mon sipor ver kreasyon en tel komite. Mersi.

MR SPEAKER

Mersi Onorab Naidu. Onorab Richard Labrosse.

HON RICHARD LABROSSE

Ok, bonn apre midi Mr Speaker. Bonn apre mdi tou dimoun isi prezant e tou sa ki pe ekoute dan lakour, espesyalman mon bastyon byeneme Plaisance.

Mr Speaker Mosyon devan nou ozordi i pe rod laprouvassyone Lasanble pou etablir en Komite lo bann Komite Sektoryel, ki annan Lagrikiltir, i annan Lanvironnman, Lenerzi Renouvlab, Sanzman Klima e Lekonomi Ble.

Mr Speaker, Mosyon ki devan Lasanble pou kontinyen donn son kontribisyon an faver, an faver devlopman pei.

Ozordi Mosyon pe demann nou pou siport en Komite ki pou travay pre avek bann departman ki'n ganny mansyonnen dan Mosyon.

En Mosyon ki annan en merit. An dot mo, mon krwar sa Komite osi ek son formasyon i a kapab osi vin en lot lafors pou pouse pou bann sekter ki ganny mansyonnen.

Kontinyen demare lo en nivo pli eleve, ki bokou ti a kontan war. Sa i en lagrikiltir, parey mon'n nonmen anler.

Mr Speaker sa bann sekter ki'n mansyonnen dan sa Mosyon, i bann sekter ki pe preokip bokou nou bann dimoun la deor. Rezon se ki pou en fason ou en lot sey asosye direkteman avek zot lavi toulezour.

Apre son laviktwar an Oktob 2020, ki byensir mon distrik in zwe en gran rol ladan li osi, in montre ki isi lo sa kote latab, nou pli determinen pou rod solisyon e vin ek novo nide pou fer nou pei Sesel bouz devan.

Mon'n note, i osi annan sa ki pa oule aksepte swa ki Lepep Seselwa in fer an 2020 Mr Speaker. Par ler mon santi si zot ti annan en zarm dan zot lanmen, manke en repetisyon '77 ti kapab repet son lekor.

Dan plas vin ek lide, sizesyon pou amelyor lavi nou dimoun parey zot pe kriye, si vreman zot anvi travay pou Lepep Seselwa, mon krwar nou dan en bon moman pou nou met lespri ansanm.

I zis parey ler nou, nou ti dan pozisyon, mannyer nou tri anmenn laspirasyon nou pep devan, e parey nou ankor pe fer

ozordi. E sa mon santi i manke lo lot kote latab Mr Speaker.

Mr Speaker sa bann sekter ki nou pe koz lo la ozordi, parey mon'n fer mansyon pli devan, i bann sekter ki vreman, ki vreman annan son, si nou pe koz lo en komite ozordi, nou'n ariv la pou nou koz, lo sa, mon santi ki Lasanble li menm li in antre dan son pli gran moman ankor, kot in anvi fer dimoun war deor, ki mannyer nou kapab travay pli pre ansanm koman Lezislater ek ansanm avek Legzekitiv.

Mr Speaker, ozordi konversasyon lo Sekter Lagrikiltir i entans la deor. Pa zis parmi fermye, me dan labous nou pep an zeneral. Kot dimoun pe rod sa ki pli bon e osi sa ki pli bon marse. Dan lepase mon ti kestyonn Vis Prezidan isi dan Lasanble ki ti vin koz lo lagrikiltir ek prodiksyon lo nou bann zil.

Wi Mr Speaker, bokou respons enteresan ti ganny sorti, osi byen bann Manm ki ti ganny sans demann kestyon.

E mon mazinen Mr Speaker, la i sans osi pou sa novo komite antre ler i annan bann size parey. Koman Lezislater mon krwar nou merit osi annan en platform pli pros pou donn nou pwennvi.

Zis parey bann lezot komite i fer. Nou pe, nou pa zis asize zis kritike, ouswa esper keksoz pou bouz devan par Legzekitiv, ouswa ler Legzekitiv i fer en keksoz mal nou vini nou kadase.

Mon krwar nou osi koman Manm Parlman nou pa osi zis la pou nou vot pou Bidze. me nou osi nou kapab osi donn nou kontribisyon ler nou ganny demande pou fer li.

Lagrikiltir ozordi i en pe partou Mr Speaker parey mon'n dir. Seselwa bokou nou i annan nou pti zarden kot lakour, e la osi mon krwar bann pti *spot* edikasyonnel osi par ler i manke en pti pe plis lo televizyon, kekfwa pou ankouraz plis dimoun ki annan lentre pou fer sa lo ki bann lezot fason en pti pe pli fasil, ouswa ki bann landrwa ki zot ale pou ganny zot bann keksoz pou travay avek.

E la mon sizere Mr Speaker, ki sa komite osi i vwar mannyer zot kapab met en, met sa kote ledikasyon piblik ler zot pe fer zot Komite, pou zot kapab donn plis detay lo ki zot pe fer e ki bann dyalog ki zot pe fer lo sa bann sekter ki nou'n nonmen, konmsi en pti pe pli latransparans parey nou dir.

Lanvironnman i en lot topik ki Sesel pe fer ase tre byen

depi en bann deseni lannen. Me nou pou bezwen dir osi Mr Speaker, ki depi nou Prezidan in pran latet *State House*, bokou keksoz pe ganny akonplir dan sa pti gin letan.

Nou'n menm vwar li lo televizyon, kot nou pti pei in aport plizyer pri, e osi in donn plizyer dyalog lo sa domenn. Sa travay ki li menm li Mr Prezidan in fer ler i ti dan Lopozisyon, ki ozordi mon vwar li i pe osi aport son fri.

Wi koman en Dirizan Lopozisyon i pa ti zis *boycott* ouswa konplent. I ti anmenn sizesyon ki ti ed sesel ozordi. Me nou bezwen admet Mr Speaker, ki i annan osi bann bon nide ki zot pa'n anmas a tan, ouswa zot in anmas an retar ki pe ede ozordi fer nou pep anmas sa bann konplent ki nou pe tandé ozordi bomaten.

Pa blyie Mr Speaker, i annan ki pe konplent ozordi, ti dan pozisyon pou kapab amelyor lavi sa pep sa letan. Ozordi ler lo lot zot kote latab, zot pe lager parey Samson.

Sa i fer mon rapel parol Onorab Aglae ki dir, sa i bann *fake fight*, se sa *fake fight* Onorab. Ozordi lemonn pe swivre Sesel dan son demars soutenab pou Lekonomi Ble.

E mon santi ki plis ledikasyon menm si nou kapab

fer li, e mon santi ki plis ledikasyon i kapab fer osi dan lekol. La mon pe koz lo bann zanfan en pti pe pli brav.

Par egzanp nou pe koz lo *early childhood education*. Sesel parey nou tou nou konnen, nou antoure avek lanmer, ki osi annan plizyer prodwi demer ki vreman annan bokou valer loter en biznes e osi lwazir. Menm bann pei dan la rezyon osi pe get Sesel koman en legzanp.

Pa blyie Mr Speaker, tou dernyerman nou ti annan Minis pou Lapes e Lekonomi Ble sorti *Maurice*, ti rann en vizit Prezidan *State House*. Kot dan li menm i montre ki larezyon i krwar dan sa ki nou pe fer e zot krwar dan kot e nou pe ale.

Mr Speaker mon santi mwan en pe dezapwente ek mon koleg ki sorti Plaisance. Ki en lenstans ti pe okip laplipar sa bann sekter ki nou'n mansyonnen dan Mosyon. Mon ti pe mazinen i ti a sezi sa loportinite pou donn son leksperyans.

Kekfwa reorganiz lo bann keksoz ki pa'n kapab enplimante. Mon prezimen i ti ava anvi enplimant li osi lo sa komite.

Ler osi ler nou pe get lo lakantite keksoz ki dan sa 2

sekter ki'n perdi, ler nou pe koz lo *Grant*, nou pe koz lo bann lasistans. E i dezapwentan Mr Speaker, me selman ki ou a fer sa i zot lopinyon. Nou, nou respe isi.

Pou terminen Mr Speaker, koman en dimoun ki anvi vwar mon pei bouze, sirtou sa bann sekter ki tre enportan pou nou pei, pa zis ekonomikman, e sa i form parti nou lavi toulezour. Mon kapab dir avek bann dimoun Baie Lazare ki nou isi anba dan Plaisance nou pou donn sipor sa Mosyon zot *MNA*. Mersi.

MR SPEAKER

Mersi Onorab. Me avek sa mon'n termin tou lezot Manm ki ti lo mon lalis pou entervenir.

E parey mon'n anonse, nou a pran, nou a termin deba avek le 2 *Leader*, Onorab Pillay e Onorab Arissol. Onorab Pillay ou annan laparol.

HON SEBASTIEN PILLAY

Mersi Mr Speaker. Bonn apre midi tou dimoun e bonn, apre midi tou koleg Onorab. Mon konnen Lepep Seselwa pe ekout nou, e i enportan ki nou a la oter sa ki nou annan pou dir avek nou pep.

I enterese ki ozordi nou pe debat lo en Mosyon ki pe dayer dan son fason ki in ganny

ekrir, i pa kler si Lasanble ki pou kree sa komite oubyen si Gouvernman ki pou kree sa komite.

I ti'n devret presize ki sa i pou en komite Lasanble ki pou pran sa bann diferan departman, i napa sa presizyon ladan. Sa i en mankman dan, son *wording*.

Me i kler ki nou pe vwar en keksoz tre enteresan, pe devlope. E petet mon bann koleg lo lot kote latab, zot in bezwen reakte lo lafason ki nou isi nou'n antann sa deba.

E zisteman zot in donn nou e penn en portre, e zot lespri par deryer anmenn sa Mosyon.

E mon krwar i annan en lentansyon petet senser lo lapar Onorab Adelaide ki pe santi serten soufrans laba Baie Lazare e i anvi koz pou dimoun Baie Lazare.

Me kestyon ki mon annan, se akoz ki Onorab pa kapab met sa kestyon pou Minis Lapes dan Lasanble, i pa kapab met sa kestyon pou Minis Lagrikiltir dan Lasanble. I pa kapab met sa kestyon pou Minis ki responsab pou Sanzman Klima dan Lasanble? E se sa ki pep i bezwen konpran la deor.

E se sa rezon akoz Onorab ou'n ganny sa kalite

repons an relasyon avek ou Mosyon.

Ou annan ou plis ki 1 Manm lo ou kote latab, in fer kler poudir sa Mosyon in sorti dan Manifesto *LDS*.

Be si i ti annan lentansyon reel pou ki nou travay ansam koman en Lasanble parey zot pe dir, sa ti ava en Mosyon ki pa konsern okenn Manifesto pe son lentere i vin pou Lepep Seselwa !

Me i pa sa ki'n arive. E sa ki nou'n ganny dir ozordi atraver 3 Manm Onorab, se ki Speaker ou menm i paret ou ti konnen poudir sa mosyon pe vin lo *Order Paper* ki donn mwan lenpresyon ki ou osi *attend meeting LDS*.

Ki ou'n nod, ki ou'n nod ler Onorab Loizeau in dir poudir sa Mosyon pe vin fer sa ki Manifesto *LDS* i demande pou fer.

E ki definitivman prezan i kler ki lentansyon se pou vin realiz en Manifesto, en pwen dan Manifesto *LDS* atraver sa Mosyon.

Be i pa sa ki Onorab in dir dan son lentrodiksyon. E se sa ki kree en problem avek lentansyon ki sa Mosyon pe vin devan Lasanble.

So premyerman si nou annan en problem ek son lentansyon, i *then call into*

question, akoz ki sa Mosyon pou vini?

Annou pran keksoz dan konteks ki nou pe diskit li. Ler Prezidan Larepublik ti vin fer son SONA, i ti dir ki napa okenn problemm dan Sekter Lagrikiltir.

E ti menm dir ki i annan zis pozitivite dan sekter Lagrikiltir.

E an repons Diskour SONA Prezidan, *Leader Zafer Gouvernman* ti dir ki, ki mannyer ou reponn en diskour ki'n sitan byen fer, sitan byen prepare, sitan byen delivre?

Me si tou keksoz ti sitan byen fer, byen prepare, byen delivre, ki mannyer ozordi mon pe tann dir ki i annan tou sa problemm, tou sa problemm ki nou lo sa kote latab nou pa'n mank en lokazyon pou kosyonn Gouvernman lo la, e ki zot, zot ti fer lo lot kote latab?

Bat lanmen, tenny mikro e blanm nou poudir nou mekontan par lefe ki nou'n perdi pouvwar. Be nou depi Oktob 2020 nou pa o pouvwar nou.

Seselwa in deside donn zot mazorite pou travay avek. So si ozordi par egzanp i depan lo en *press conference United Seychelles* pou dir ek dimoun ki par egzanp napa *agronomist* kot Lagrikiltir, napa *veteriner* kot

Lagrikiltir, nenk 2024 ki nou pou gannyen, ki i mank langre.

Sa menm *press conference* ki nou pa oule i pas live, se sa ki pe edik dimoun, se sa ki pe dir dimoun ki pe pase.

E ler Manm dan Lasanble i vin redir bann menm keksoz, nou ganny problemm. Nou ganny pa mal difikilte, pou zwe nou rol koman en Lopozisyon.

E apre zot blanm nou, zot dir ek nou koumsa poudir nou, nou bezwen vin ansanm, vin koz ek zot, vin travay ek zot.

Be ou lentansyon se realiz ou Manifesto, les fer en azanda politik, e ou oule trenn nou ladan? Zot bezwen realist.

E sa ki mon pe dir la i sorti dan en *Tête à Tête*, ki fek ganny fer avek Sekreter Zeneral LDS atraver ou Mr Speaker ki Deputy Speaker Lasanble Nasyonal Onorab Henrie.

Onorab Henrie i dir,
"en kantite konversasyon i ganny fer deryer rido, en pake travay i ganny fer deryer rido."

Be nou pou vin lo en Komite, ler travay pou al ganny fer deryer rido apre pou vin dan komite. Be nou ki mannyer nou pou konnen kwa ki pase deryer rido?

Se zot ki'n dir. So zot bezwen admet ki i annan en lenterferans direk travay ki

Lasanble Nasyonal pou fer avek Legzekitiv.

Akoz Onorab Henrie in dir ou poudir Prezidan pou *attend* sa *forum*, sa atraver ou Mr Speaker, i annan sa Komite ki pou ganny formen e Prezidan pou la li, ek Vis-Prezidan.

Be i bezwen annan en separasyon pouvwar, taler i annan en Manm in sey donn nou ledikasyon lo separasyon pouvwar e i pa'n kapab, e mon a fer pou li.

Separasyon pouvwar i vedir ki ler tou le 3 brans i kapab egzers en fer zot rol dan lendepondans. Me sa i pa le ka. Akoz ki pou arrive ler sa komite pou'n formen?

Ou pou ganny ou en Minis ki vin la, ki pou komans dir ou poudir be sa in diskit avek Komite Sektoryel. Be i pa sa ki Seselwa i anvi konnen.

Seselwa i anvi konnen ki ou annan pou dir, i anvi tande, ki mon pe dir sa. E sanmenm sa rezon akoz Lasanble Nasyonal i pas *live*, pou dimoun tande.

Be nou pe retir sa pouvwar dan lanmen Manm, anmenn li deryer rido, pou nou *achieve* en azanda politik.

E apre mon ganny en manm ki atraver sistenm ki mwan mon'n siporte e li in siporte e li in siporte, in nobou

ariv kot in arive, pou li vin donn mon lesion lo moralite.

Onorab *sorry*, ou pa pou donn mwan lesion lo moralite ou ! En keksoz ki fondamantal dan tousala, tou sa keksoz ki pe arive dan sa pei, enn antre zot pa ankor kapab debout e koz lo la dan en fasin konkret.

Menm si zot santi i pe arive. Nou ganny nou en konferans, en *meeting* ki ganny fer avek bann *retailers*, en *retailer* i debout i koz lo *fake* sertifika ki bann dimoun ki pe ganny *GOP* pou anmennen, ni enn antre zot pa koz lo la. E lefe ki nou anmenn en *Urgent Question* pou koz lo la, nou pa ganny sans anmennen, akoz aparaman napa en lirzans.

Be i annan en lirzans, akoz i annan Seselwa pa pe ganny travay atraver servi *fake certificate* pou donn *GOP* en dimoun!

Rezon akoz mon servi sa pwen, se pou ilistre ki i pou annan, i annan en mank konfyans an relasyon ek vre lentansyon sa Mosyon.

Si ler sa bann Manm ki ti'n reponn, bann keksoz ki ti'n ganny dir lo nou kote latab, mon pa ti'n tann nonm sa mo Manifesto, mon ti ava aksepte petet nou ki pe pran keksoz dan en fason negativ.

Be *as soon* ki mon tann en dimoun komans koz mon sa i son manifesto, be *sorry*. *Sorry*, eski mwan mon pou vin fer ou realiz ou Manifesto?

Non, mwan mon rol se ki *keep* ou Gouvernman *in check*. E o, ou rol, langazman ki zot ti donn pep Seselwa, nou tou koman Manm Lasamble se pou nou kit Gouvernman *in check*.

Nou pa kapab vin *part and parcel of* Gouvernman. E la i enportan, i enportan pou mon fen en pwen ek pep Seselwa la deor. Eski Seselwa i konnen ki kantite *gymnastic* mwan mon bezwen fer pou anmenn en kestyon la anndan?

E ler mon pe ganny blanmen, zot pe dir mwan *Leader Lopozisyon*, mat ou. Mon oule mate, be si ou ti'n donn mwan en mazorite mon ti a kapab fer bokou plis e mat plis!

Ou'n pran mazorite ou'n met dan lanmen bann boug ki'n pran en lasenn in anmar dan zot lipye Seselwa, mon pe dir zot sa bann dimoun in anmar zot lipye. E prezan ou a vin dir ek mwan, travay pou fer pei marse. Ou bezwen mon kontribisyon pou fer pei marse !

Si ou ti bezwen mon kontribisyon pou fer pei marse, ou ti ava ekout mwan ler mon ti dir ou apre ou *State of the*

Nation Address, pa vin dir ek Seselwa ou pou al donn li en logmantasyon saler an 2022.

Ou pa pou kapab. E sa se rezon akoz nou bezwen koz dan sa fason. E personn antre zot pa'n dir, pa'n koz lo la, pa'n menm fer komanter lo la ...

MR SPEAKER

... arete.

HON SEBASTIEN PILLAY

E ozordi nou sipoze ganny en Mosyon.

MR SPEAKER

Aret en moman.

HON SEBASTIEN PILLAY

Mon pa pe sede Mr Speaker!

MR SPEAKER

Aret en moman.

HON SEBASTIEN PILLAY

Mon pa pe sede Mr Speaker.

(Mic switched off)

MR SPEAKER

Aret en moman Onorab Pillay. Mon'n donn ou en kantite fwa, permision pou, mon'n donn ou en kantite fwa permision pou *raise point of order*.

Ou pa kapab dir poudir mon pa kapab donn en lot Manm osi menm privilez. Onorab Georges ou pe *raise* en *point of order*.

HON BERNARD GEORGES

Yes Mr Speaker, avek ou permision mon pe raise en *point of order* anba *Order 43(5)*. Ler en mosyon in ganny segonde, kestyon i ganny propoze avek Lasanble par Speaker, e ou'n fer.

"And debate may then take place on that question."
Deba i bezwen lo en Mosyon.

Ler ou pe koz lo en Mosyon, ou napa laliberte pou ou koz lo tou sa ki ou anvi koze, ou bezwen koz lo sa Mosyon.
That's my-

(Interruption)

MR SPEAKER

Mersi. Arete. *Order!*
Onorab Georges, petet i en defayans lo mon par, me selman i annan en kantite adres dan sa Lasanble ki pa'n lo Mosyon.

E lefe ki mon'n permet e mon pa anvi koriz Manm lo zot adres konstaman toulstan, mon ankouraz bann Manm pou adres pwen lo Mosyon.

Me souvan i annan zot divage, zot fer politik. E zot al

dan tou direksyon. Onorab Pillay mon ti a zis envit ou pou evit bann lakizasyon larz e kontinyen avek ou Mosyon, kontinyen avek ou ladres.

E si ou kapab, annou allo Mosyon pou ede sa Lasanble ariv lo en desizyon lo li. Mersi. Onorab Georges mersi pou ou *point of order*.

HON SEBASTIEN PILLAY

Mersi Mr Speaker. Mr Speaker mon bezwen dir ki mon ti pe swiv ou *ruling* e mon bann komanter ki mon ti pe fer, mon ti pe fer li dan en fason pou ilistre mon pwen, an se ki konsern nou pe demann, nou pe kree en komite.

Be mon santi Mr Speaker, si sak fwa ou pou donn en *ruling*, Onorab Georges i bezwen entervenir, sa i montre mwan ki li menm li i mank respe pou ou *ruling*.

MR SPEAKER

Non.

HON SEBASTIEN PILLAY

I en keksoz ki i bezwen aret fer.

MR SPEAKER

Ale, ale.

HON SEBASTIEN PILLAY

Respe ou *ruling* koman Speaker.

MR SPEAKER

Let's get back to the subject
Onorab Pillay.

HON SEBASTIEN PILLAY

It's very unbecoming lo son par. Mersi Mr Speaker. Mr Speaker, mon pwen, anmenn sa referans avek sa largiman lo saler, logmantasyon saler, sete pou montre, ki koman en Lasanble, ler nou santi ki Gouvernman pe al dan en direksyon ki mal, nou pa kapab al dan en komite deryer en lasal pou dir li.

Nou bezwen dir li a sa moman ki nou bezwen diri li. E se sa nou problem ki pe arive ozordi.

Nou pe tro ganny envite pou al deryer dan komite, par legzanp ler nou ti pou diskit plis later, nou pou al diskit dan komite eksetera.

E sa i bann keksoz ki Seselwa i bezwen tandem. Ou konpran? Par egzanp an relasyon ek sa Mosyon. Annou regard en sityasyon ki pe evolye, kot STC ozordi.

Gouvernman in deside apwent en *Board STC* e en *CEO STC* ki mon krwar san okenn konsiltasyon avek menm son bann Manm ki lo mazorite lo son kote latab.

MR SPEAKER

Onorab.

(Mic switched off)

HON SEBASTIEN PILLAY

.... Me an relasyon avek ...

MR SPEAKER

Ou war problem, ou war problem ki nou annan. La ou pe fer en alegasyon ki *unsubstantiated*.

E sa i enn bann problem ki, i enn bann direksyon dan *Standing Order*. So annou sey evite tousala. E i pli fasil pou evite si ou reste lo Mosyon. Mersi.

HON SEBASTIEN PILLAY

So, sa Board in ganny apwente e i annan en desizyon ki ti konsern aste pou avek bann fermye lokal. E ti annan en cold store ki ti'n build pou sa purpose.

E avek larzan, *Live Stock Trust Fund*. Me eski ozordi STC pe aste pou ek sa bann fermye lokal? E si ou koz avek en bon pe fermye, parey mon'n fer, zot pou dir ou non.

Sa i en realite. Eski mon pa pou met sa an piblik, mon pou al met sa dan en komite. Akoz ler mon met li an piblik, STC i bezwen mate e reakte li.

Se sa pou vwar Lasanble, se sa pouvwar Parlman, nou *parler* pou fer ki i annan en reaksyon.

Se sa, nou *drive*, nou *drive* Gouvernman pou reakte dan en fason pozitiv lo bann keksoz ki nou krwar i devret ganny fer. Napa personn ki devret ankoler ler mwan mon pe koze.

Akoz mon'n ekout tou Manm, mon pa'n enteronp personn. Mon pa vwar rezon akoz apre midi i annan en Manm ki bezwen kontinyelman pe enteronp mwan.

Mon pwen i senp, tre senp. Si nou annan diskisyon ki bezwen ganny fer, mwan mon krwar Onorab Adelaide *sorry*, i devret ganny permisyon pou anmenn en kestyion pou kestyonn Minis Lapes.

Akoz ki ou'n deside fer en lapas dan mon distrik. Pou kestyonn Minis Lanvironnman. Akoz dan tel proze, napa konsiltasyon avek mon zabitan.

I pa pou vedir ki Onorab pe pa fer son louvraz, be non. I pou vedir ki koman en Lasanble, koman en Lasanble nou pa pe perdi nou rol e nou pouvwar ki anba Konstitisyon, in donn nou pou fer nou travay, pou fer *oversight* lo Gouvernman.

Mr Speaker ozordi par egzanp *State House*, ki Minis, ki

Minister, ki sipoze Responsab pou Zil, apwentman pou bann dimoun ki pou get zil oubyen IDC i ganny fer par *State House*.

Ankor enn fwa dan Lasanble, an relasyon ek sa Mosyon, mon'n tann koz lo IDC. Be aret koz lo IDC, zot o pouvwar.

Sa bann keksoz aret vin dir nou. Pa zot in dir, Seselwa in krwar, in tir nou o pouvwar in met nou la.

So aret blanm nou, zot fer aksyon, or si zot anvi sanz tel dimoun kot IDC, sanze. Si zot anvi tir IDC met zil anba Gouvernman, fer li.

Me zot ki bezwen pran desizyon, aret blanm nou pou 43an isi laba. Zot in blanm nou pou 43an, Seselwa in tir nou. nou aksepte, nou dan Lopozisyon, nou fer nou rol.

Me Gouvernman zwe son rol an relasyon ek zil. E de plis se Prezidan ki Minis pou zil ozordi. Mon pa pou soz *conduct* Prezidan, ouswa i bezwen mon krwar Vis-Prezidan.

Me si i *State House*, lansenny pli o nou pei, zot pa konnen ki pe pase lo zil, eski nou, e sa i montre zot pe mank konfyans, zot pe mank konfyans dan pli o lenstans pei pou li zer sityasyon bann zil.

Mon krwar sa i bann keksoz ki nou bezwen met an

perspektiv. Akoz mon'n war bokou Seselwa pe fer komanter lo bann size ki'n pase resaman.

So eski nou pou tir sa ban size dan domenn piblik e anmenn li dan en problemm prive, deryer rido, oubyen nou pou gard li kot i devret été, pou ki Seselwa i konnen kwa ki pe pase. Se sa mon konsern ki nou annan avek kreasyon en tel komite.

Akoz i pou fasil pou Legzekitiv, e mwan mon konnen, akoz mon'n deza dan en mazorite dan Lasanble.

Kot ler ou annan en Legzekitiv ki for, sa Legzekitiv i servi son louvraz son lafors e i fer bann Manm Lasanble si ou oule, dan plas met keksoz dan domenn piblik, ou gard li dan domenn prive, ou gard li dan sa *meeting*.

Me apre ou vvar poudir malgre ki ou anvi keksoz i ganny fer koman mon Lasanble, i pa ganny fer, akoz zisteman Legzekitiv i konsider son lekor tro for.

E dan sa bann size koumsa, i bann size enportan. Par egzanp Onorab in mansyonn Lekonomi Ble, mon dakor ek li.

Be mon ti anmenn en kestyon pertinan lo la, e mon ti *raise* serten pwen pertinan dan deba lo Bidze. Mon ti demann

Minis ler ou pe koz sa bann Fon, lekel ki pou ganny akse?

Donn nou detay. Be larepons Minis Finans ti dan negativ, mon *still* pa ankor kapab, e *still* personn pa ankor vin devan pou eksplik nou.

E sa i kler, i montre poudir i annan en mankman, en mankman si oule respe pou Lasanble par Legzekitiv.

E sa i manifeste par egzanp ler ou vvar Vis-Prezidan i vin reponn en kestyon ki konsern diferan departman anba Konstitisyen, i vin li tousel pou li vin reponn sa kestyon.

Be, i montre ki i bezwen en Mosyon, en mosyon i bezwen fer sir ki Egzekitiv i gard sa respe pou nou.

E annou regard, annou regard en pwen enportan dan sa Mosyon, ki anmenn nou lo sa sityasyon sekirite alimanter e divertisman biznes.

E sa i bann keksoz ki'n pas dan Lasanble, mon pa pe envant. Onorab Labonte i anmenn en kestyon lo Lendistri Kannel.

In pas dan Lasanble, i relev ek sa akoz Lendistri Kannel i pou annan *involvement* sa bann Minister ki la.

Me Minis pa koz ditou lo Lendistri Kannel. Minis i koz lo lavenir, lo dimyel e i menm

donn Onorab Labonte en santiyon. Mon pwen i se ki ...

MR SPEAKER

Me eskiz mon Onorab Pillay. Minis mon oule zis koriz lo en presyon, akoz mon oule gard limaz Lasanble sa ki pase ladan. Minis in reponn en kantite lo Lendistri Kannel.

E deba in kontinyen en kantite lo Lendistri Kannel. So mon pa anvi ki ou donn en move lenpresyon lo sa ki'n pase dan Lasanble. Mersi.

HON SEBASTIEN PILLAY

Mersi Mr Speaker, mon ti konnen ler mon fer sa pwen ou pa pou kapab reziste. Be sa i montre klerman problemm ki nou ladan.

MR SPEAKER

Silvouple.

HON SEBASTIEN PILLAY

I montre klerman problemm ki nou ladan, problemm ki nou ladan, se ki mwan koman en Manm Lasanble ki'n la, ki'n swiv sa deba, mon realize poudir nou pou annan nou en Legzekitiv ki pou oule vin servi bradfer kont Lasanble e pou sey kontrol Lasanble si nou al dan laliny komans fer sa bann keksoz koumsa.

E si ou pe dir mon poudir parey Onorab Henrie in met devan, ki sa i bann diskisyon ki pas deryer rido. Ber lekel ki par deryer sa bann diskisyon.

Se sa ki nou bezwen, nou bezwen etablir. Akoz mwan mon pa pou form par okenn *attempt* pou fer Lasanble perdi son rol *oversight* ki li i annan. E sa i kler e i enportan.

Mr Speaker si ozordi *State House* pe ganny servi pou *call* bann *first time voter*, pou ankouraz zot pou al anrezistre pou vote, be napa nanryen ki sa Gouvernman pa pou fer.

MR SPEAKER

Onorab, ki, konbyen sa bann kalite alegasyon ou pou fer? La ou pe akiz *State House* konmsi i pe enterfer avek lazennes si i resevwar lazennes.

(Interruption)

MR SPEAKER

Bann Manm silvouple, Onorab Arissol pou annan laparol, si i annan pwen ki i bezwen reponn, i a reponn. Selman mwan mon zis anvi ki, mwan mon rekonnert drwa lekspresyon Onorab.

Me selman konmsi ennler i pran tro liberte avek son drwa lekspresyon. Onorab Pillay annou sey retourne lo Mosyon.

HON SEBASTIEN PILLAY

Mersi Mr Speaker. Mr Speaker sa ki mon al dan en deba avek ou, me ou osi realize ki poudir pandan letan ki mon'n koze, ou'n tenny mon mikro pa plis ki 4 fwa.

MR SPEAKER

Wi.

HON SEBASTIEN PILLAY

Me i annan Manm ki'n koze ... i annan Manm ki'n koze, ki'n koz avek bokou plis venen, mon pa'n atak okenn Manm personnelman, mon'n koz lo rol Lasanble nasyonal avek Legzekitiv. E ou'n vwar li neseser pou tenny mon *micro phone* 4 fwa.

MR SPEAKER

Mon bezwen ...

HON SEBASTIEN PILLAY

San ki mwan mon'n reakte, san ki mwan mon'n montre.

MR SPEAKER

Mon bezwen fer li ler mon war ou pe mal ale. Kontinyen.

HON SEBASTIEN PILLAY

San ki mon'n montre okenn mank respe, akoz mon oule montre Lepep Seselwa ki i pa mwan ki inisyé sa bann

keksoz. E ki ler i arive mon pou napa swa me osi pou reakte.

So, mon ti a kontan ki nou ozordi apre midi nou pran konsyans 2 keksoz. Mon dan Lasanble dan en mazorite absoli.

Mon'n dan Lasanble, dan en Gouvernman minoriter. E ozordi mon dan Lasanble avek en Lopozisyon ki minoriter. E tousala mon'n aprann diferan konportman, differan Gouvernman baze lo sityasyon kot zot trouv zot lekor ladan.

Dan sa enn premye kot ou an mazorite. Gouvernman i pratikman desid ki mannyer i anvi pou *challenge* li *as much* ki ou kapab.

Me bokou *challenge* i ganny fer atraver bann komite deryer rido. Dezyenmman, ler ou annan en lopozisyon mazorite, bokou *challenge* ti ganny fer an piblik.

E la mazorite *challenge* i ganny fer an piblik, zisteman akoz pou ranforsi lenportans rol lezislatif e rol *oversight* ki Lasanble i annan.

La nou dan en trwazyenm konteks la. Sa trwazyenm konteks si nou get dann laglas i reprezant sa enn premye ki mon'n reprezante.

Mwan mon ti a senserman pa kontan ki nou retourne dan en sityasyon kot nou annan en

Gouvernman ki sitan *powerful* e ki oule *dictate* avek Lasanble Nasyonal ki mannyer i pou fer son travay.

E mon konnen i annan bokou Manm lo lot kote latab, ki sansib avek sa ki mon pe dir, menm si zot pa pou oule admet piblikman.

E ki zot realize poudir i pou inevitableman anmenn nou ver kot nou pou annan en tansyon kot Lasanble pou oule zwe son rol. E Gouvernman pou oule defann son pozisyon ki i pe pran lo serten size.

I kler Mr Speaker ki ler nou pe diskit sa bann topik ki la, e ou pe koz lo etablir en Komite Lasanble ki pou travay avek tou sa bann antite, ou osi annan en eleman resours ki pou vin avek.

Resours ki ozordi i tre limite, par lefe ki Lasanble i pa ganny resours an plis avek Gouvernman.

E serten sa bann *areas*, par egzanp lagrikiltir, i pou demann konpetans dan sa domenn pou annan serten *expert* oubyen resers ki bezwen ganny fer.

Lenerzi renouvlab, e byensir ler nou regard lekonomi ble ki en konsep ase konplike pou en kantite dimoun, i pou osi annan en nesesite annan resours.

Kestyon ki osi leve, se eski dan anmenn sa Mosyon, Onorab in konsider nesesite pou annan sa bann resours? E lenportans prezan ki mannyer ou pou fer Lasanble ganny sa bann resours.

Me si ozordi *as we stand* i ankor parey kot Legzekitiv ki pe *dictate* Bidze ki Lasanble Nasyonal pou gannyen, ki mannyer ou pou kapab akonplir sa ki ou oule akonplir?

So i annan en kantite kestyon pou nou kapab reponn lo la. E mon konnen i annan keksoz ki mon'n dir, ki parti mazoriter dan Lasanble pa'n kontan.

I mon devwar pou dir li, e mon pou dir li kan mon bezwen dir li. Napa personn ki pou anpes mwan koze.

Zot ase tenny mon mikro kantite fwa ki zot anvi tennyen. Zot a sey met mwan deor kantite fwa ki zot anvi met mwan deor.

Me pou aret koze, mon pa pou zanmen aret koze. Mon Gouvernman in travay pou li fer sa ki i ti kapab ler i ti la. Mon Gouvernman in sey son mye pou li delivre ler i ti la.

Seselwa an 2020, i pa'n satisfe, e in deside pou li sey en lot Gouvernman.

Kestyon fondamantal ki Seselwa i pou demande ek sa

nouvo Gouvernman se fer pli byen ki sa nen ki ti la. Be dan fer pli byen, pa repet sa ki mal. Mersi Mr Speaker.

MR SPEAKER

Mersi Onorab. *Point of order*, wi Onorab Henrie.

HON GERVAIS HENRIE

Mr Speaker anba *Order 61(1)(d)*, mon oule *raise en point of order* pou koriz en *misapprehension*. Preski mon non in ganny mansyonnen 34 fwa dan entervansyon Onorab Pillay.

Kan mwan mon pe reste an deor sa deba ozordi. Mon pa konnen akoz in mansyonn mon non.

Mon pa'n anvi enteronp li Mr Speaker, akoz mon'n anvi, mon pa'n anvi anpes li koze, les li koze pou Seselwa vwar mannyer i dezonnet e i en rizer.

MR SPEAKER

Non, non, non, non, ou *point of order*, ou *point of order* pa ale.

HON GERVAIS HENRIE

Mr Speaker.

MR SPEAKER

Fini fer ou *point of order*.

HON GERVAIS HENRIE

Letan in dir poudir mwan mon'n dir konversasyon deryer rido. I pe *mislead* piblik Seselwa, parti tou politik, zot bann zofisyé i annan en konversasyon.

Lo ou telefond tanzantan ou al deor ou, lekel ki *call* ou, lekel ki pe dir ou pa bezwen anmenn kestyon later *US* dan *FPAC* ouswa Rapor *COSPROH*?

MR SPEAKER

Ok.

HON GERVAIS HENRIE

So sa bann konversasyon deryer rido ki pe anmar son lipye Mr Speaker koman Chairman *FPAC*. Mersi.

MR SPEAKER

Mersi. Wi. Permet mwan *rule* sa enn avan. Mon krwar i annan en pwen, wi *Leader Lopozisyon* in fer souvan referans avek en programm en *interview* ki Onorab Henrie in donnен.

E mon pa konnen si son lenterpretasyon i korek mannyer i dir.

Selman mon santi poudir Onorab Henrie i annan sa drwa pou li klarifye sa ki i krwar i en *misapprehension*. Mersi. Wi lekel ou *point of order* prezan Onorab Pillay.

HON SEBASTIEN PILLAY

Mersi Mr Speaker. Mr Speaker mon ti a kontan fer 2 *point of order*. Premyerman i annan en *imputation* ki'n ganny fer, ki mon dezonnnet, ki mon ti a kontan fer.

MR SPEAKER

Mon'n koriz li, mersi.

HON SEBASTIEN PILLAY

Non, ou'n fer li.....

MR SPEAKER

Mon'n fini koriz li.

HON SEBASTIEN PILLAY

I devret *retract* sa mo, in dir e i devret *retract*.

MR SPEAKER

Mon'n koriz li, mersi.

HON SEBASTIEN PILLAY

Parey tou Manm lo mon kote latab in bezwen *retract*, i osi i bezwen *retract* sa mo ki in servi. Mon pa dezonnnet mwan.

E dezyenmman, eski mon pou demann li, dan *Tête à Tête*, i pa ti dir poudir i annan, ler Patsy ti demann li *regarding* bann konversasyon, eski i pa ti dir, plizyer konversasyon i ganny fer, ki nou pa pe war.

E bann konversasyon souvandfwa i pas deryer rido. Eski i pa ti dir sa?

MR SPEAKER

Mersi.

HON SEBASTIEN PILLAY

Eski i pa ti dir ti annan plizyer konversasyon.

MR SPEAKER

Mersi.

HON SEBASTIEN PILLAY

Eski i pa ti dir ti annan plizyer konversasyon.

MR SPEAKER

Mersi.

HON SEBASTIEN PILLAY

E Mr Speaker avek tou respe ki mon annan pou ou. Si ou pou *rule* en *point of order*, Onorab in akiz mwan ki mwan mon pe pran *call* pou pa anmenn rapor *COSPROH*.

Onorab pa i okouran poudir rapor *COSPROH* pa i form parti en *case* Ankour ozordi. I pa okouran sa li? I pa okouran. So pa bezwen akiz mwan.

Dezyenm an se ki konsern later *US*, pa son Onorab lo son kote latab ki ti alert Lasanble poudir i annan teren, i annan *case* kot Anti-Koripsyon.

Mwan ki'n dir? So mon krwar ou devret fer li *retract* sa 2 *statement* ki in fer.

MR SPEAKER

Onorab, ou'n fini fer ou *point of order*, ou a permet mwan *rule* lo la. I annan en kantite pwen.

Lo size son *statement* dan son *interview*, i pa'n *deny* poudir i ti fer sa. In dir sa in ganny mal interprete, so mon'n aksepte sa.

La mon'n menm blyie ki ti ou premye *point of order*. Ar wi, dezonne, mon'n koriz li, mon'n koriz li, i pa akseptab, Onorab Henrie sa remark ki en lot Manm i dezonne i pa akseptab e mon'n fini fer sa pwen kler plizer fwa.

Dan Lasanble.

(*Interruption*)

MR SPEAKER

Mersi. Mersi, mon'n fer, mon'n pran menm reaksyon avek lezot Manm.

Sa ki ti aret la, sa ki ti dir i lalang, sa ki ti dir i mansonz, mon pa'n fer *retract*, mon'n zis dir li arete, e sanmenm sa ki mon pe fer. Mon pas laparol Onorab Arissol.

HON SANDY ARISSOL

Mersi Mr Speaker. Bonn apre midi tou Manm bonn apre midi tou dimoun a lekout. Bonn apre midi bann Manm Lasanble Nasyonal. Mr Speaker mon ti a kontan komanse par, felisit tou mon bann Manm *LDS*, pour sa travay ekselan. E sa travay dir ki nou'n fer pandan sa 16mwan.

Mwan anvi profite felisit nou Gouvernman, dirize par Prezidan Ramkalawan, pou sa travay ki zot pe fer pandan sa dernyen 16 mwan pou anmenn pei kot i ete ozordi.

Mon ti a kontan osi felisit ou koman Speaker, menm avek bokou takinasyon ki ou gannyen parfwa lo nou kote latab, an zeneral dan Lasanble Nasyonal, felisit ou pou sa travay, pou sa tanperaman, pou sa *calmement*, ki ou annan parfwa. Zisteman pou ou kapab *deal* avek nou.

E mon ti a kontan profite, felisit mon novo Sekreter Zeneral mon parti pou sa zoli *interview* ki in donne lo televizyon.

(APPLAUSE)

HON SANDY ARISSOL

Mr Speaker, en Manm Lasanble Nasyonal son rol se Lezislasyon, sa ki nou apel *Bills*, nou apel li Lalwa, se anmenn kestyion dan

Lasanble Nasyonal, pou nou rod leklersisman, parey mon bann Manm i fer.

E osi i annan en lot kot nou kapab anmenn Mosyon, dan Lasanble Nasyonal pou nou rod leklersisman, pou nou koz lo serten size. E pou nou zisteman parey sa ki Onorab Adelaide in anmennen, pou etablir serten komite dan Lasanble Nasyonal.

I pa fer premye fwa sa i arive dan setyenm Lasanble. i premye fwa e bann Lasanble avan, in deza annan. Sizyem Lasanble ti annan en Komite Zil. Ki bann Manm US ti lo la. Me sa pwen enportan Mr Speaker, se ki sa komite ki la, napa nanryen pou fer avek larzan. Napa okenn Manm lo sa komite, ki pou ganny peye.

E mon konpran la prezan akoz US pe lager for, zot pe dir zot pou pe vin lo sa komite. Onorab Wallace in tap lanmen lo latab, in dir non i pa pou form parti sa komite. Parske sa komite, pa peye!

(APPLAUSE)

HON SANDY ARISSOL

Alor zot devret vin fran avek Lepep Seselwa. Dir ek Lepep Seselwa ...

(Mic switched off)

MR SPEAKER

Onorab Arissol. Mon bezwen aret ou silvouple. Mon krwar poudir sa ki ou pe dir, i *impute improper motives*. Ou pe dir bann Manm, bann Manm pa pe pran, plas lo sa komite akoz napa larzan. Mon krwar sa i pa korek. I e mon ti a dir ou, kontinyen e evit sa referans. Mersi Onorab.

HON SANDY ARISSOL

Mersi Mr Speaker. Mon a repran mon fason dir. Dan en fason pli *gentille*. Alor Mr Speaker, bann Manm lot kote zot pe refize partisipe lo sa komite. Pa akoz napa finans, me zot pe zis refize koumsanmenm akoz zis en labitud refize.

Nou lo sa kote latab, menm napa finans Mr Speaker, nou, nou pou partisipe lo sa komite, e nou pou etablir sa komite.

(APPLAUSE)

HON SANDY ARISSOL

Dezyenmman Mr Speaker, nou pou envit zot pou vini lo sa komite, menm si i pa peye lo sa komite. Mon'n re-fraz, *rephrase* mon fason dir Mr Speaker, pou Onorab Wallace konpran ki mon ti pe dir.

Mr Speaker, i enportan dan nou pei ozordi, fodre pa nou ganny en parti Lopozisyon ki vin irresponsab. Fodre pa ki nou annan en parti Lopozisyon, ki pares. Mon pa pe dir bann Manm mwan Mr Speaker, mon pe dir parti politik.

Fodre pa nou annan en parti Lopozisyon, ki pares, ki pa zwe zot rol. Ki pa anmenn okenn Mosyon pandan sa dernyen 16mwan. Ki pa anmenn okenn lamannman lo okenn Proze Lalwa dan sa Lasanble. Apre sa bann menm dimoun, i vini i dir ek nou, "Ah, be plito nou ti anmenn en Mosyon lo partaz manze. Sa ti pli relevan."

Be akoz enn zot Manm pa ti anmenn en Mosyon lo partaz manze? Be akoz enn zot Manm pa anmenn en Mosyon pou nou partaz larzan kot Lorloz? Personn pa anmennen Mr Speaker, ler nou, nou anmennen, zot rod tou leskiz parey zot labitid. Zot vini zot kree en *chaos*, zot maltret tou dimoun, apre zot dir zot fer lapenn. Ozordi zot in vwar zot dan Lopozisyon, e i annan zis 10 zot.

Mr Speaker si i annan zis 10 zot, i rezulta travay ansyen *Cabinet*, sa ansyen ladministrasyon ki Onorab Wallace ti form par ladan! Se

pour sa rezon i annan zis 10 zot, dan Lasanble Nasyonal. Sa rezulta ki Onorab Wallace i devret dir nou.

Letan Onorab Ernesta, i vini i koz lo elit, lanmans pwalon i so. Lakwizin pe pran dife. Sa menm lanmans pwalon Mr Speaker, ti so Takamaka! Sa menm dife pa ti pran zis dan lakwizin, ti pran dan distrik Takamaka kot Onorab Ernesta. Me gran mersi Onorab Terence Mondon ti vini ti tenny sa dife.

E ozordi Onorab Terence Mondon i la dan Lasanble Nasyonal, pou siport sa Mosyon ki pe ganny refize, par Onorab Ernesta ki li lanmans pwalon ti tro so dan son distrik Mr Speaker.

E ozordi i deklar li koman en zabitan Anse Boileau. Be Mr Speaker, nou koman Manm Lasanble Nasyonal nou rol se *oversight* lo Gouvernman. Eski ou le dir mwan akoz i nou Gouvernman ki la deor, nou napa drwa demann kestyon, nou napa drwa anmenn en Mosyon, pou nou zisteman parey Onorab Larue in dir. Pou nou gid nou Gouvernman, parey Onorab Loizeau in dir, pou nou asiste nou Gouvernman.

Parey Onorab Adelaide in dir, pou nou donn sipor nou Gouvernman pou rode, ki

mannyer nou pei i bouz pli devan. Eski sa i vedir i mal? Nou annan en problem ek nou Gouvernman.

Nou Gouvernman pa pe fonksyonnen. Nou Gouvernman i fel pandan sa 16mwan ? Mr Speaker sel group dimoun ki'n fel, dan sa pei se bann *MNA US* ki nou vvar dan Lasanble Nasyonal ozordi.

(APPLAUSE)

HON SANDY ARISSOL

Letan Onorab Cosgrow i vini lo sa Mosyon i dir ek nou Mr Speaker - wi, wi, wi pa ankor fini avek ou. I dir Mr Speaker, poudir lo rezo sosyal nou vvar bann dimoun pe demann zonnyon kanmarad. Bann dimoun pe partaz lasyet manze ozordi, mizer en kantite. Disel i vann R10.

Be i annan en keksoz i pa dir nou Mr Speaker Onorab Wallace, lo medya sosyal, sa ki'n osi vvar, nou vvar gato laniverser, nou vvar plizyer boutey bwar dan *birthday*, nou vvar dimoun pe poste zot *voyage*, nou vvar dimoun pe poste bann nouvo keksoz ki ou kapab aste. Tousala nou annan lo rezo sosyal.

Zot kontinyen vin dan nou Lasanble, apre zot servi non Lepep. Dimoun pe ekoute la

deor, be dimoun i ekout nou osi. Dimoun i osi ekout nou ler nou koze.

Alor letan Onorab Wallace i vini i dir ek nou sa Mr Speaker, sa osi pa responsab. Parske i koz zis en kote Roupi, me lot kote Roupi, i pa zistifye oubyen parey son *Leader* i kontan dir, i pa *substantiate*, letan i vin dan Lasanble Nasyonal. Tousala i enportan sa.

Mr Speaker, i annan plizyer Lasanble dan lemonn, toulstan zot annan bann komite ki *over*, ki *overshadow* en Minister. Sesel nou pa leksepsyon nou. Sesel ozordi nou annan nou Komite *FPAC* par egzanp. Ki get en pe lo kote finans. Nou annan *HIV and AIDS*, Mr Speaker, ki get en pe lo kote lasante.

Nou annan *IAC*, ki get en pe lo kote *Foreign Affairs*. Nou annan *Media Youth*, Kiltir ki get en pe lo sa komite, ki get en pe lo sa Minister. Be si Onorab Adelaide ozordi apre midi in anvi anmenn en Mosyon pou etablir en Komite ki pa peye, mon repete, ki pa peye. E se pour sa rezon nou pe vvar nou, nou tousel, pou li rod sipor pou lagrikiltir, lanvironnman, lenerzi renouvlab, sanzman klima, eski sa i drol? Non, en komite ki pou ed nou, *supervise*

en lot Minister dan nou Gouvernman. Sa osi nou rol koman Manm Lasanble Nasyonal. Fodre pa nou konfiz piblik, pou donn lenpresyon poudir i annan plizyer lezot size nou ti kapab koz lo la.

I annan plizyer lezot size Mr Speaker, ki nou ti kapab koz lo la, ki zot ti kapab anmennen. Non, Mr Speaker zot pa anmennen, ou konnen ki zot fer, zot abiy bann dimoun an *Tinky Winky*, zot desann kot Lorloz sou. Zot debout ek en plakar, zot dir "mon lafen." Selman ler nou al *investigate* Mr Speaker, i annan en bann zot ki pe tenir plakar mon lafen, zot pe lwe lakaz avek Gouvernman.

Selman zot lafen. Apre nou vwar zot avek zot *Jameson*, dan kwen miray pe kasyet, zot pe bwar. Oubyen Mr Speaker, ki zot fer, zot fer lamars kot SBC, zot rakle detrwa dimoun dan distrik ki zot kapab donn en bwat manze ek en labyer *EKU* so. Zot anvoy zot kot SBC, "kriye, kriye, kriye," apre ou vwar detrwa zot i pas par dernyen. Letan lamars in fini, zis pour li *capture* dan portre, pou al devan poudir i ti pe siporte.

Me kestyon ki nou bezwen demande, konbyen zot ki asiz la anndan ki ti dan lamars Mr

Speaker, pou montre solidarite e sipor anver bann dimoun ki vreman zot koz lo la, ler zot dan Lasanble Nasyonal? Enn dan san parey labitid.

Apre ou konnen ki Lopozisyon pou fer Mr Speaker, zot pou anmenn *PNQ* pou lager kont bann *Sri Lankan* dan nou pei ki pe debout kot Lorloz. Kan sete *US*, ki ti anmenn Prezidan *Sri Lankan* pou vin Sesel, etablir en kontak, etablir labank, zisteman pou nou annan sa partenarya. La ozordi zot pe lager ek *Sri Lankan*.

Zot vin dan Lasanble, zot anmenn *PNQ*, kestyon pou zot lager, kont SBC ki pa pe kouver zot. Akoz i bar zot, tir li. Zot anmenn kestyon, zot anmenn *PNQ* lo voyaz Prezidan, selman Manm Lasanble osi i vwayaze.

Zot anmenn *PNQ*, lo lager lo avek *fine* R5000 letan en group dimoun i deside fer dezord e pa obei Lalwa ki nou, Manm Lasanble nou fer, isi dan sa Lasanble.

Mr Speaker, be sa i fer ki i pa responsab. Alor nou koman bann Manm Lasanble Nasyonal, i enportan dan nou rol parey mon'n dir. Lezislasyon ki *Bills*, Lalwa, kestyon e Mosyon.

Se pour sa rezon ozordi, nou dan Lasanble Nasyonal, nou'n kapab anmenn sa

Mosyon e nou pe siport Onorab Adelaide.

Mr Speaker, Mosyon Onorab Adelaide, i dir;

Dan en bi pou asir devlopman soutenab ekonomik e sosyal, tout an prezervasyon nou lanvironnman e anrisir nou pei, Lasanble Nasyonal i aprouve pou etabli en Komite Sektoryel ki pou travay pre avek sa bann departman, e dan sa bann domenn swivan:

Lagrikiltir, Lanvironnman, Lenerzi Renouvlab, Sanzman Klima, Zil e Lekonomi Ble.

Eski sa i vedir ankor enn fwa poudir, nou Gouvernman i pa bon, nou Gouvernman in fel? Mr Speaker, ler mon get Mosyon ki ti ganny anmennen par Onorab Regina Esparon, ekout byen son Mosyon;

"Lasanble i rekomande ki Gouvernman i pou met an plas bann Polisi kler, e reviz Lalwa kot i neseser pou protez bann travayer ki ganny agrese fizikman e seksyelman dan landrwa travay."

Eski letan Onorab Regina Esparon anmenn sa Mosyon i vedir ki Gouvernman, pa pe ekout nou. Gouvernman pa tande? Non, Onorab Regina Esparon pe senpleman attraver son Mosyon, ki nou'n pas lo la yer. Pe reviz Lalwa, pou rod bann Polisi kler, pour ki en

keksoz i ganny fer. Parske nou annan plizer bann prodwi labi dan nou landrwa travay.

E nou, nou pe lager pou sa pa ariv ankor. Parske ozordi ou annan, par egzanp dan plizer fanmir, ou annan manman ki siny 'Arr', son garson i siny 'Ri', son fiy i siny 'Sol'. Alor sa Mosyon ti pe koz lo la. Pou nou etablir, bann Polisi kler.

Pou ki labi pa ganny arrive dan landrwa travay. Menm parey ganny arrive dan bann *store* laboutik dan lepase lo bal zonnyon, oubyen lo bal ponmdeter.

Alor Mr Speaker, lagrikiltir ki Onorab Adelaide pe koz lo la. Eski ou pe dir mwan, poudir US i kont lagrikiltir. US pa krwar dan lagrikiltir? Me par kont dan vye ladministrasyon zot ti annan en Minis Lagrikiltir, Mr Speaker.

Si mon rapel byen, lo *internet* taler ler mon ti pe gete, zot dir mwan i apel Minis Wallace Cosgrow. Ler mon ti pe gete taler. Lo *internet* i annan. La souden ou le dir ek mwan, US pa krwar dan lagrikiltir ?

Mr Speaker nou, koman en Lasanble serye, nou anvi fer en travay siport nou Minis pou Lagrikiltir. Akoz? Premyerman, nou annan bokou nou bann zenn ki al lekol kot Lekol Lagrikiltir, nou bezwen donn

zot sipor, an relasyon avek travay ki fer laba. Bann lekipman, ki zot servie pou nou rode ki arive ek zot ler zot sorti kot lekol.

Nou pe koz plis later, pou nou bann zenn ki sorti dan Lekol Lagrikiltir. Plis later, pou nou fermye nou pe koz lo la. Se sa ki sa Mosyon pe rode. Nou pa pe rod larzan avek sa, avek sa Komite nou. Oule dir mwan US, pa krwar ladan? Plis later pou fermye, pli led pou Lekol Lagrikiltir? Sa lenpresyon ki zot pe donnent?

E sa pour sa rezon, zot pa pe siport sa Mosyon. Nou bezwen rode atraver sa Mosyon Mr Speaker, ek sa Komite ki pou ganny etablir, Lagrikiltir ki mannyer nou kontinyen asiste e ed nou fermye. Onorab Adelaide in donn en legzant li.

Si nou kapab prodwi manze zannimo isi menm. I a ed nou, redwir kou. La ek lager *Ukraine* avek *La Russie*, kantite keksoz, pe pase. Zis parey *COVID* in montre nou.

Mr Speaker, lanvironnman. Eski ozordi Sesel, nou pa anvi en pli meyer lanvironnman, pou nou menm nou koman bann Seselwa. Nou bann fermeye, nou bann zenn i kapab devlope? Eski US nepli krwar dan lanvironnman,

soudent ler zot in vin Lopozisyon?

Ler zot vini, zot koz lo bann plant anvaisan dan nou lanvironnman. Eski sa komite ansanm avek Minister, nou pa kapab fer en travay konkret, pou ede ki mannyer nou zoli pei i ganny depaye dan sa lanpayaz?

Mr Speaker, letan nou al lo lenerzi renouvlab, ki nou Mosyon pe demande. Eski pa nou tou nou koz lo lenerzi renouvlab ozordi. Nou tou nou koz lo la. Eski ou le dir mwan US nepli krwar dan lenerzi renouvlab? Zot koz zis lo lelis ki pa pe fonksyonnen, ki Vis-Prezidan swadizan ti riy lo la. Oubyen pa ti ekrir lo la, oubyen ti koz lo la.

Sa ki US in krwar ladan. Zis letan zot ariv dan Lopozisyon Mr Speaker. I pa kapab sa lenpresyon. Ler nou get zot, zot bann dimoun responsab dan en sans. Me selman zot pe refiz en keksoz pozitiv, parey mon'n dir nou, nou pou fer li. Menm i pa peye, nou pou fer li pou lanmour Sesel. Nou pou fer li pou nou bann fermeye, pou nou bann zenn Seselwa. Se pour sa rezon nou pe siporte.

Zil, en topik enteresan zil. Letan zot in koz lo zil, Prezidan ti dir sa lo zil. Prezidan i annan

bann restriktirasyon, ki'n konmans fer. Ler i fer restriktirasyon, US i vini i dir nou pe fer viktimizasyon.

Nou pe pouz tou bann dimoun ki'n travay avek zot. Nou pe pouz tou bann dimoun ki prodwi. Mr Speaker, me selman i annan en keksoz enteresan, ki mon'n tann Onorab Cosgrow in dir ankor li menm. Letan in koz poudir nou Gouvernman in fel, pa pe delivre. Be i annan en keksoz nou bezwen pran kont Mr Speaker.

Dan plizyer Minister, vre i annan trenn lipye parey Prezidan ti dir. Ou konnen akoz Mr Speaker? Parske letan i annan plizyer zot i al laba la, bann dimoun, bann travayer.

"Yes Minister!"

"Minister welcome!"

"Minister please" asize,

"Ah! Yes Minister!" Bann dimoun i ankor tret zot parey Minis.

Mr Speaker mon'n ganny lenformasyon, i annan en travay ki pe ganny fer anndan ek bann fanm, ki travay dan Minister Gouvernman, pou kree en Lasosyasyon bann Madanm, zisteman pou fer serten travay, anba, anba. Sa osi nou tande. Sa osi nou'n tande. Sa osi nou'n tande.

(Interruption)

HON SANDY ARISSOL

Anr, sa alegasyon !

Mon kontinyen Mr Speaker?

MR SPEAKER

One second. Non, mwan mon ti koriz alegasyon kont Prezidan e kont Gouvernman. I vre, Onorab Arissol, in fer en referans ek en keksoz ki pe pase. Sa i pa direkteman, i pa'n vreman dir direkteman US, oubyen kwa. Mon krwar i pa en pwen enportan, pou mwan dir fodre i substantiate oubyen sa. I pa'n adres Gouvernman, i pa'n adres US. In dir sa pe pase.

Onorab kontinyen. Mon a fer, Onorab Georges remarque poudir ladres Onorab Arissol, i pa neseserman plis lo Mosyon ki okenn lot ladres.

E zot a vvar, zot a vvar mon pe permet li, parey mon'n permet lezot. Mersi Onorab Arissol.

HON SANDY ARISSOL

Mersi Mr Speaker, mon retourne ankor lo bann pwen Mosyon. Parey mon'n fer resorti an relasyon ek Onorab Adelaide. Mon'n koz lo lagrikiltir, mon'n koz lo lanvironnman, mon'n koz lo lenerzi renouvlab. Mon'n koz lo sanzman klima.

La mon ti'n arriv enn pti kou lo zil. Be apre letan mon'n arriv lo zil, mon'n antre enn pti kou dan bann Biro Gouvernman. Sanmenm sa ki'n fer sa ronfleman. So mon ava retourn lo zil kot mon ti ete.

Alor lo bann zil Mr Speaker, ki nou pe rode anba sa Mosyon pou nou kapab etablir en Komite zisteman, pou nou kontiny sa travay ki Komite Zil ki bann US oparavan, ti lo sa Komite. Pou nou asire ki bann zil par egzanz.

E COVID in montre nou, ki bann zil i kapab ganny servi pou prodiksyon alimanter. Se tou ki nou pe rode nou. Nou pa pe rod plis larzan pou nou, nou.

Ler nou pe fer sa, nou pa'n bliy tou bann dimoun an deor nou. Nou pa'n bliy travayer nou. Non! Dan sa bann demars ki nou pe fer, nou oule ki i annan bokou pli lanplwa. Si zil i ouver pou devlopman lagrikiltir, i ava kree plis lanplwa.

Ler i annan plis lanplwa, sa i vedir ou garanti en saler dan ou lanmen. E ler ou garanti en saler, i vedir en lasyet manze. Sa ki nou pe rode pou nou dimoun. Nou pe rod sa pou nou kominate, pou nou pei, pour ki Lepep Seselwa parey nou Manifesto ki nou'n vvar lev

anler par Onorab Loizeau, e Onorab Larue.

E komitman ki nou Gouvernman in donnен, pou kontinyen travay pou Lepep Seselwa, pou nou kontiny sa travay ki nou pe fer. Se tou Mr Speaker ki sa Mosyon, anmennen par Onorab Adelaide. Wi ki ti ganny diskite dan nou *Caucus*. Sa ki nou fer tou le Lendi. Koman en group, en group serye Lasanble Nasyonal. Nou zwenn tou le Lendi, pou nou pas lo nou travay Lasanble Nasyonal, ki i kestyon, ki i *Bill*, ki i Mosyon, zisteman pou asire ki nou tou nou lo menm paz.

Me pa annan konfizyon, parey lot kote kot US, letan ou ganny Manm Port Glaud, Onorab Aglae vini dir ek nou koumsa. Non! Non! Nou bezwen annan en komite, nou bezwen annan en komite. Selman an menm tan Onorab Wallace Cosgrow, depi boner in fini dir nou i pa oule okenn komite. Sa i apel konfizyon. Konfizyon i apel-e sa.

Fodre pa nou annan en Lopozisyón, bann Manm Lopozisyón ki konfize. Fodre, parey nou'n dir zot *align*, zot pe swiv, zwenn en kou dan Lendi zot osi koman en *Caucus*. Diskite, balanse pou zot asire poudir zot lo menm paz avek

nou. Ki an mazorite dan Lasanble Nasyonal. E avek nou Gouvernman ki pe fer en travay ekselan laba deor.

E pa blyie nou pou la ankor en 5an. Mon pa konnen kot zot pou ete. *Ah!* Sa ti en reaksyon ki mon ti anvi Mr Speaker. *Ah!* Vwala. Sa riye mon ti ekspekte sa.

E mon *happy* avek sa. Parske sa ki enteresan pou note. Ki'n ganny dir taler. Mon repeete Mr Speaker, mwan mon *happy* letan i annan Lopozisyon dan Lasanble Nasyonal, parske mon konpran zot reaksyon ozordi.

Parske mwan osi mon ti lo sa kote latab. Me nou, nou ti ganny plis labi Mr Speaker. Letan ti annan en lot Speaker ki ti asiz la anler lo zot kote. Ozordi ou, ou pe gid nou. Ou pe dir ek nou *Standing Orders*, ou pe dir ek nou ki pou fer, ou pe gid nou. E ou menm ou arete, ou tenny nou mikro zis pou nou pa dir plis.

Mon kontan, mon apresye pozisyon. I en pe difisil kot zot ete laba lot kote, mon konpran. Be nou'n deza laba lot kote. Zot a pran li pti pa, pti pa, pa lager avek. Pran li dousman e zot a vini a lavenir. E nou swet zot bonn sans dan sa demars ki zot pe fer.

E nou espere ki, nou pe anvoy nou lanmen avek zot parske nou kontan letan zot la. Nou pe anvoy nou lanmen avek zot pou zot travay ansanm avek, nou. Zis parey letan Onorab Lemiel in prezant son rapor lo COGA.

In fer resorti byen kler Mr Speaker. Poudir napa zis Manm lo son kote, be i annan Manm lo nou kote osi parey. Alor letan nou travay ansanm, nou fer travay ekselan pou nou pei. E en zoli rapor i ganny prezante avek Speaker Lasanble Nasyonal.

Alor vini mon bann frer, koste, annou pa rat sa sans. Fer li pou Sesel, e pour nou kapab anmenn nou pei pli devan. Avek sa detrwa mo mon remersye ou Mr Speaker.

(APPLAUSE)

MR SPEAKER

Mersi. Bon mon ava envit loter Mosyon, Onorab Adelaide pou prezant son konklizyon, *summing-up*. Onorab.

HON FRANCOIS ADELAIDE

Mersi Mr Speaker. Bonn apre midi ankor en kou, tou dimoun a lekout. Mr Speaker, ozordi in vreman en zour enteresan. E mon, dabor mon le remersye tou bann Manm ki'n koze.

Sirtou bann Manm, ki lo sa kote latab. *LDS*, zot in montre poudir, pa fasil pou zot ganny distrakte avek bann dimoun ki mazin negativ, lo ki mannyer pou kit nou pei an retar e an aryer.

So mon remersi zot, mon demann zot pou donn zot en bon laplodisman, akoz zot in fer vreman en bon travay.

(APPLAUSE)

HON FRANCOIS ADELAIDE

Mersi. Mr Speaker, mon le osi remersi, nou bann siporter la deor, ki zot menm zot in dir nou, zot konpran, ki sa bann ki mannyer nou passe dan sa Lasamble. I difisil ler ou anvi, fer ou pep bouz devan. Ou anvi anmenn bann bon keksoz pou zot, me ler ou annan bann dimoun ki sarze avek negativite.

I difisil, me solman nou pe dir zot ki nou mazin zot. Nou konnen akoz zot ti vot pou nou. E nou konnen akoz zot in donn nou mazorite dan Lasamble. E nou bezwen fer sir nou delivre, nou fer sa travay. Pour ki zot menm zot, zot benefisy, e pei i bouz devan.

Mr Speaker, mon kontan ki personn la lo nou kote, nou pa'n sot dan labou avek Onorab Loze. Menm ki i ti le *divert* sa

konversasyon, pou fer sa Mosyon vin irelevan. Mon kontan ki nou'n koz lo bann fe, e lanvi pour nou pei e nou bann dimoun bouze.

E sa i vreman, mon vreman apresye. In montre mwan poudir sa Mosyon, ki nou'n anmennen, malgre sakenn in kontribye enn pti bout, in enn ki mon krwar Lepep Seselwa in konpran. Sirtou pou mon bann fermye Baie Lazare. Zot in konpran, ki dezir, ki lanvi mon annan pou fer sir ki zot *attend* zot lobzekatif.

Mr Speaker, mon repeete, mwan mon rol dan Lasamble Nasyonal se *oversight*. Byensir mon fer li dan trwa fason. Mon par ler, mon anmenn Mosyon. Par ler mon anmenn kestyon, me dezole zis pou reponn Onorab Pillay Onorab *Leader Lopozisyon*, ki kestyon lo sa bann size mon'n anmennen.

Me ou konnen i annan bokou nou, bokou Manm e pa tou kou, ki nou kestyon i mont a ler. E nou sey rod bann lezot fason, pou nou kapab anmenn nou, nou soutyen nou pep a bann lotorite pli o, pou zot konpran, e pour zot sey ed nou.

So pa ezite, i annan kestyon ki nou'n anmennen, i annan Mosyon. E pa zis sa, menm par ler mon anmenn bann zofisyne Gouvernman,

menm Minis dan distrik. Pou nou kapab vwar bann problem e sey ede.

Mr Speaker nou vin la dan Lasanble, pa pou nou vin fer *show*, pa pou nou vin get *show*. Me nou'n vin la pou nou koze, travay e fer sir ki nou pep i benefisyé.

Mr Speaker, mon pe get mon travay koman en Manm Lasanble, avek enn ki bezwen tout senserite e laverite.

Parey Onorab Arissol in dir dan son dernyen *summing-up*. Sa kestyon zot in demande. Eski pou annan kontribisyon moniter, pou bann Manm. Byensir se non.

Nou pe fer sa avek leker, akoz parey mon'n dir. Nou'n al devan laport dimoun. E nide dimoun in koze, e nou bezwen fer sir ki nou ekout zot. E pa tou keksoz ki ou bezwen larzan par ler. Si ou annan sa, latansyon ekout zot. E ou annan sa volonte pou fer sa bann keksoz, byensir zot pou satisfe.

Petet Mr Speaker en larepons ki mon krwar, ki mon devret rann Onorab Lemiel. Akoz manti pa bon, i pa'n koz nanryen negativ lo la. Parey bann lezot Manm, me plito in rod leklersisman. E mon anvi dir ek Onorab Lemiel, mon kontan sa kestyon ki ou'n

demande akoz ler ou get son rol i en pe parey.

Me vi ki ou koman *Chairman Komite COGA*. Ou pe *oversee* tou bann komitman Gouvernman. E i en bon pe travay lo ou. E nou, nou pe fer sir nou pe pran bann pti sekter ki nou pou ed ou nou osi. Apre ler ou pou refer ou rapor en lot zour, ou kapab annan bann detay pou ou trouve si vreman sa in ganny delivre, sa i pa'n ganny delivre.

Zis parey ler ou malad ou al kot en Dokter, premye kou ou al kot en *general practitioner ok*. E si i vreman annan en pti problem, ki merit plis latansyon, i anvoy ou petet kot enn spesyalize. Se vwala diferans. I annan en ki pe fer sa gro travay, apre i annan sa enn ki pe fer sa pti travay, pou li anmennen pou kontribye pou fer sir ki sa i vin enn an totalite. E ki keksoz, i vin byen. E dimoun pa fristre.

Mr Speaker, parey mon dir nou'n tande bann Mosyon sorti, bann parol sorti lo lot kote latab, ki zot ti a prefere ki sa bann dernyen letan la. Avan ler ki Lasanble, i al lo *recess*, ki nou ti ava anmenn en Mosyon, pou koz lo saler travayer.

Parey Onorab Arissol, in dir, si vreman zot ti anvi koz lo saler travayer, zot ti devret

anmenn en Mosyon. Pa zis asize la, fer krwar zot pe mazin Seselwa. Me zot pa fer nanryen kan, tou le lafen dimwan elekte pa elekte, proporsyonnel menm zot pa fer nanryen, zot pe tous bann gro, gro saler.

E pep Seselwa ki pe peye pou zot sa. E mon krwar zot devret annan en konsyans, poudir la prosenn fwa ler zot vini, fer keksoz pour benefisyé Seselwa. E pa blyie Mr Speaker, si vreman nou ti anvi aranz lapey travayer, avan nou pran pei, lekel ki ti pe ansarz *DPA*?

Tousala i bann keksoz, bann konversasyon kot nou bezwen kapab kontribye, kontinyen diskit lo la. E apre nou a gete si vreman zot serye. Ouswa si zot vin la, zis pou zot *boycott*.

Mr Speaker, Mr Speaker sa komite ki nou pe formen. I annan ankor en lot pti rol ki nou bezwen eksplik Seselwa, pou fer zot konpran poudir nou pa anvi zis form komite akoz nou anvi form Komite. Non Mr Speaker.

Mr Speaker si ou pe swiv aktyalite konmela, tanzantan ou pe vwar i annan en *workshop*, lo sa zafer *Effective Civil Servant*. Mr Speaker, menm pei in sanze, Sesel i reste pou tou son zanfan. I ankor annan bann siporter *LDS*, i

annan bann ki siport *US*. I annan bann ki napa lopinyon.

Me sa ki ou kapab remarke poudir, trenn lipye i ankor annan. Menm si Minis i donn lord, *PS* i donn lord. Keksoz pa ganny fer parey i devret. E dimoun, i reste fristre.

E mwan koman sa Manm Lasanble, ler mon pas dan distrik. Mon tann sa bann konplent, mon bezwen fer li mon dewwar, vin asize avek mon bann Manm *Caucus*. Koz keksoz ki reflekte lavi sa Nasyon. Rod fason pou nou amelyore, e fer li vin pli byen.

Mr Speaker, mon pa pou tarde lo sa, lo sa *reply*. Mon konnen mon pa pou kapab reponn tou Manm. Me solman an gran liny tou lo sa kote latab i konnen, akoz sa Mosyon i vreman enportan. E akoz nou bezwen donn li sa sipor, pour ki nou tous lavi nou pep e nou retir fristrasyon e nou ed nou Gouvernman.

Parey Onorab Arissol ankor in dir. Ankor 5an *from* la, nou pou ankor la, e ankor 5an *from* la, zot pou nepli la. So mersi zot tou. Mon demann zot pou apiy mwan e vot pou mon Mosyon. Mersi Mr Speaker.

(APPLAUSE)

MR SPEAKER

Mersi Onorab. Prezan mon pou apel bann Manm pou vot lo kestyon ki devan zot. E kestyon i lir koumsa: -

Dan en bi pou asir devlopman soutenab ekonomik e sosyal, tout an prezervasyon nou lanvironnman e anrisir nou pei, Lasanble Nasyonal i aprouve pou etabli en Komite Sektoryel ki pou travay pre avek sa bann departman, e dan sa bann domenn swivan:

Lagrikiltir, Lanvironnman, Lenerzi Renouvlab, Sanzman Klima, Zil e Lekonomi Ble.

Manm ki an faver lev lanmen silvouple? Mersi, Manm ki kont? Mersi. Lo kestyon ki mon'n fek lir, 22 Manm in vot pour, 0 kont e 10 in *abstain*. Alor sa Mosyon in aprouve par Lasanble. Mersi Madanm Deputy Clerk. Bon mon remersye Manm pou zot lentervansyon, lo sa deba ki'n tre animen.

Mon remersye zot, ki mon krwar an zeneral Lasanble in swiv mon lapel, pou gard lord pou sa deba. Menm si in tre politicize, e tre controvers avek diferan lopinyon, lo diferan kote.

Avek sa nou'n arriv a lafen nou travay, pour sa peryod. E mon pou-

HON SEBASTIEN PILLAY

(Off-Mic)

MR SPEAKER

Non Onorab Pillay, mon'n fini, mon pe terminen silvouple. FPAC, FPAC pe zwenn kan, Onorab?

HON SEBASTIEN PILLAY

Mersi Mr Speaker, mon le zis enformen ki mon annan en miting life FPAC demen avek PEMC. Ki pou dimoun ki annan, ki'n annan konsern oubyen zot annan bann lenformasyon ki zot ti a kontan konnen lo PEMC, son rol.

FPAC pe komans en seri miting pou regard dan tou bann diferan SOEs. E demen nou pou koz avek sa antite ki sipoze, pran rol pou regulate li. E pou annan bann kestyon bann Manm. E sa pou pas *live* lo radyo avek televizyon. Mersi.

MR SPEAKER

Mersi Onorab pou sa lenformasyon. Bon nou pe termin nou travay, pour sa semenn. E osi nou pe al pran recess. Nou dat repran Lasanble, i Mardi le 10 Me. Savedir nou komans travay, an zeneral son semenn le 9 Me.

Mon pou pran lokazyon pou swet bann Manm en zwayez Pak, e osi pou swet nou piblik ki pe swiv nou. Fotespere

zot a pas en bon lafen semenn *sainte*, an refleksyon, lo lavenir nou pei. E mon envit bann Manm osi, pou fer osi menm refleksyon, lo lavenir nou Lasanble.

Mon a swet zot bonn *fin* lasemenn, e mon swet zot bon kouraz pou zot travay ki zot pou fer dan zot distrik. Mersi. Nou ava *adjourn*. *Adjourn*.

(ADJOURNMENT)